

ASO LUA, 23 IUNI 2015

Na nofoia le Nofoa e le Fofoga Fetalai i le itula e 3:00 i le aoauli.

TULAFONO TAU FAAOFI O LE FAATATAUINA O TUPE FAAOPOPO (NU.2) 2014/2015 & TULAFONO TAU FAAOFI O LE FAATATAUINA O TUPE 2015/2016 - felafolafoaiga faaaauau i luga o le faitauga faalua - Aso 3

FOFOGA FETALAI: Ia, e momoli atu le faafetai ma le faamalo i lenei vaega o le taeao na liugalua, o lea ua mafai ona toe aofaga potopoto le tatou Maota pei ona faapolokalameina. Faamalo atu le onosai, faamalo le faapalepale, faamalo foi le usufono i le paia ma le mamalu o le tatou Maota nei. E faatalofa atu foi i nisi o sui usufono faatoa tatou mafuta ona sa feagai ma feau ma tiute ma faiva o le aso. Faamalo le faamalolosi mai, malo le tauatai ma taumafai pea e tauavagameaina mo le itumalo. O le mea lena e iloa ai le sui usufono matapoto o le toaga mai e fai mea a le itumalo ma e le misia le tatou Fono. Faafetai atu o lea ua tatou taunuu mai i le amataina o le vaega muamua o le tatou polokalame o le afiafi, e i ai le talitonuga e papaaveloa le faamoemoe o le tatou po ma ia uma uma lauga a sui usufono i le afiafi lenei. E tatau ona ta le itula e 7:00 ua uma lauga ona sauni lea o le tatou Malo e tali. Tuu mai pea le tofa i le tatou Malo po o fea le mea e i ai le vaaiga e mataitu le tatou taimi ona toe fetuunai lea i se taimi talafeagai e fuafua i ai ia tulitulimatagau le ufi a Sina i le tatou galuega ina ia faaaauau ma fai ia maea.

E faia le tatou malologa ua maea ona saunoa le Afioga ia Seiuli, o se sui usufono fou foi o le tatou Paeaiga, ua maea ona saunoa i lana saunoaga faataupou a o lea e maitau atu o lea o le a lafo atu i lea itu lea o le malu. Ifopo, ia tulai maia oe le Feagaiga a Tumua ma Pule, saunoa ou te iloa o le vaisua tonu lenei e te saunoa ai i le tatou Tala o le Tupe.

Tulai maia le sui usufono mamalu mo Aiga i le Tai.

Susuga IFOPO MATIA FILISI (Aiga i le Tai): Faafetai lava i lau Afioga i le Fofoga Fetalai, faafetai o lea foi ua maua se faasiliga malosi ua faapea ona toe foi mai le tatou usuga fono i lenei itula. E muamua lava ona ou faafetai i lau Afioga i le Taitaifono o le tatou Maota nei, faafetai i lau galuega fai i lou faatoatoa ma faapena ona taitai le Palemene ina ia maua le filemu. Ia, e le uma foi lou fia faatalofa ma faafetaia foi le Afioga i le Palemia ma le Kapeneta, le mamalu foi o sui usufono o le Palemene nei, e faatalofa atu, malo, faafetai lava mo lenei Fonotaga ua mafai ona tatou feiloai i le alofa ma le agalelei o le Alii.

Ia, tulouna ia oe Samoa o le ao mamala, ou te faatalofa atu foi i le tapuaiga a Lana Afioga Mamalu O Le Ao o le Malo ma lana Masiofo, faatalofa atu foi i le Sui o le Fono a Sui Tofia ma lau Masiofo, e faatalofa atu foi i le Faamasino Sili ma le Aiga Faamasinoga. E faafetai atu foi i Ofisa Sili o Pulega ma Pule

Sili o Matagaluega ma Faalapopotoga taitasi, i la outou galuega faifaipea e tautua le tatou Malo i auala eseese aua se lumanai o Samoa. Malo faafetai. O le paia lava lea i le afiio o Aiga o Nofo, Aiga o Tupu, Aiga o Papa ma Aiga na Tafaifa. Le mamalu i le upega lauga ia Pule ma Tumua, tula o Aiga ma Faleupolu tofofi o Samoa.

Ou te faatulou foi i le paia o le Aifaigaluega tofofi faauuina o le Talalelei, le Aiga Sa Levi, e faatalofa atu. I lenei itula lau Afioga i le Fofoga Fetalai ma le mamalu o le Palemene, ua tu mai lagi le lagaali a Tamafaiga. O upu ia o lenei itumalo o Aiga i le Tai. Ou te faamalulu ai ae se i ou liliu ane i si ou itumalo e faatalofa i ai. E i ai le talitonuga o lea ua taatia i le Laulau a Fono le Tala o le Tupe o le tala mulimuli lea o lenei Paeaiga. Lau Afioga i le Fofoga Fetalai se i uma ona ou liliu lea i ai ae se i ou faatalofa i lou itumalo. Talofa Aiga i le Tai si ou itumalo pele. Ou te faatalofa atu i le paia o Faleu, o le malae na lua i ai taeao o le talalelei i Samoa, ae o le uluaipou o Malo na tofofi ai upu o le atunuu, i le Susu o Leiataualesa ma Leiataualetaua. Maliu mai Futi o le moa na vinimua, Sa Mutimuti ma le Matua ia Vaisagote. Le mamalu o Malaetele i le Susu o Leiataualetaua ma le Aiga Sa Leiataualetaua, le falelima o alo o Sapapa ma lau fetalai VAI ma le faletolu. Tulouna Atiga e Susu ai Taupau ma le Aiga Sa Taupau, tulouna Falemai e Susu ai Mulipola ma le Aiga Sa Mulipola. Tulouna lau fetalai Auapaau ma le Falefa o Salua ma Satuilaigi.

E faatalofa atu i le ana o le maile aua Luatutu ma le Aiga Sa Luatutu, tulouna Fogamanono le maota e Susu ai Tuilaepa o le Alo o Malietoa, Susu ai Usoalii, afio le matua ia Finau ma le mamalu ia Pologama.

Ou te faatulou foi i le paia o Lalotoa aua le Susu o Sau ma le Aiga Sa Sau, afio Lilo ma Tumanuvao ma le mamalu ia te oe Sauma. E faatalofa atu. Ou te saga faatalofa atu pea i le tatou nuu i Mulifanua, e ui ina tatou nonofo faatasi i le ao ma le po, a o le taimi lenei ou te lauga atu ai i le Tala o le Tupe i lenei tausaga mulimuli o le Paeaiga.

E faatulou atu i le paia i le Susu o lo outou Aiga i Alo o Malietoa, Susu Moananu o le Faaaloaloga, Susu Taulapapa ma Mauinatu faapea Tauti. Susu foi lo outou Aiga Fuailefau ma le Pouli, Susu lau Susuga Fuailefau Lote Naseri ma lo outou Aiga Fuailefau ma le Pouli. E faatalofa atu i lo tatou Aiga Usoalii, le Susu o Togia Ioapo o le Faaaloaloga, Susu Togiailelei Ifopo, Susu Togiailevai Moana ma outou aiga. Ou te faatalofa atu foi i le alaatai o Faluta ma Amaoso ma lo outou aiga.

Ou te saga faatalofa atu foi i le mamalu i lau tofa i le Tuua Vaatiuola ma Lautolo ma lo outou faleupolu. E manatua foi le sao taua o faletua ma tausi, Tooa ma saoa ma le malosi o le tatou itumalo mo le 21 tausaga. Talofa lava. E le mafai foi ona galo le sao e le mafaitaulia o le Aifaigaluega Paia a le Atua ma outou faletua ma aiga. E le gata i le tatalo faamanuia, a o le fono tele ma le faalototele. Talofa lava.

Lau Afioga i le Fofoga Fetalai, e le tele lava se manatu, e le tele foi se faamatalaga i lenei Tala o le Tupe ua folasia i le tatou Laulau, ae i ai lava itu e fia faamanatu atu. E faatalofa atu foi i le Palemia faapea foi le mamalu o Minisita o le Kapeneta, ma le faafofogaaga a lenei Palemene.

E muamua ona ou faatalofa atu i le Minisita mo Leoleo, malo lava le fai o le faiva malo foi mo ou tiute fai, faafetai i le Matagaluega o Leoleo. E faatalofa atu foi i le Komesina fou o Leoleo, malo lava faafetai. E pau lava lea o se tuualalo a le sui usufono mo Aiga i le Tai, o le tatou pou lea i Faleolo. Lau Afioga i le Minisita, ou te talitonu o lea lava e tuufesili po o lava a tatou

taavale, ona e i ai le matau e faapena ona tele le coverage o Faleolo, ae e le gata i lea e tu ai le malae vaalele e tu ai foi ma le uafu e agai ai i le motu tele i Salafai. E faapena ona faasoa i ai malu o le Malo. E i ai foi faalavelave e tutupu faafuasei mai i nuu i tua. O le tuualalo, lea sa i ai se valaau ae faapena ona le maua se taavale, e faapena ona oo atu ai i le aoga o Aana Nu.2 i se faafitauli sa tulai mai ai, ae sa atoa lava le itula o faatalitali. O le mea lea e tuualalo atu ai i lau Afioga i le Minisita, afai e le o lava a tatou taavale, o le tuualalo a le sui usufono mo Aiga i le Tai, ia faapena ona lava faasoa a tatou taavale, ona o faafitauli o lenei vaitau. Oo mai i le Minisita mo Aoga malo faafetai, e tele foi a tatou Tulafono ua pasia. E saunoa foi i mataupu, malo faafetai i lau Afioga i le tauaveina foi o tiute o le Minisita o Aoga.

O lea ua ou faafetai atu i le Peresetene o le Komiti a Aana Nu.2, se isi foi o sui usufono Tauaana le Afioga ia Taefu, e tusa ai ma le auala sa faapena ona tatalo mai ona o le lauleaga ma se toe faalauleleiga. Malo faafetai i lea auala i si o matou nuu lea o Apolima, i le agai i uta i le faleaoga.

E le mafai ona faagaloina lou tauanau atu pea e tusa o le tatou malae i Mulifanua, le malae lea o le aoga. Sa tuuina mai foi e le Minisita mo Eleele le lisiina o nei fanua ma sa faapena foi ona ae se tofa i le matou nuu ma faaavanoaina ai le fa eka aua lava malae taalo. Ae i ai lava le talitonuga, o lena lava e i ai le faasologa i lau Afioga i le Minisita, toetiiti ona oo atu lea i o i le tatou aoga mo le malae lea mo taaloga a lo tatou itumalo. Na pau lava lea o le nuu o lo o maua ai se lauelele laugatasi ma le tele e mafai ona fai uma i ai taaloga a tatou aoga e amata mai i Falelatai seia oo mai i Mulifanua.

O le tatalo atu lea i lau Afioga i le Minisita o Aoga a le Malo. Faafetai foi i le Ofisa Sili o Pulega o le Ofisa o Aoga faapena i ACEO a vaega taitasi uma ma department a le tatou Aoga, faafetai.

Ona ou oo mai lea i le Minisita mo Eleele, malo faafetai i lau Afioga. Na pau lava lea o si mea ia e alofagia ua utiuti lava eleele o lenei itumalo, o lo o i ai lava foi le gagana faapea e lumafale i le sami ae tua i le Esetete. O lea e tatalo atu ai, o le a se tofa ma se faautautaga i lau Afioga i le Minisita faapea foi i le Kapeneta. Lau Afioga i le Palemia, ia fesoasoani mai i si o matou nuu. O si o matou itumalo o Aiga i le Tai e matou te manaomia foi ni eleele matou te fia faia foi ni sao aua le aufaifaatoaga, o se eleele e fai ai faatoaga e faapena ona matou fesoasoani ai i le tamaoiga o le atunuu i ni faatoaga. O le tatalo atu lea ma le agaga maualalo ma le faaaloalo tele i lau Afioga i le Minisita mo Eleele.

O lo o i ai foi nai fanua o lo o faapena ona lisiina e tusa ma le 40 tausaga talu ai e nuu taitasi o si o matou itumalo. Ia o lo o i ai fuafuaga faapea o le a mafai ona faatau motu pe tuuina mai i nuu taitasi ia, o le tatalo, e le o manaomia lava le aumai fua, ae tau lava ia i ai se tupe a ia laititi se tupe matou te totogia i ia eleele. O le tatalo atu lea ma le agaga faaaloalo i lau Afioga i le Minisita, faapea le mamalu o le Kapeneta. Malo faafetai lava.

I le Minisita mo Faatoaga, faafetai i le Minisita faafetai foi i le Ministry atoa. A tau loa mea nei o faasao i gataifale o le sami, ou te le iloa lava po o i ai se isi itumalo e tutusa ma Aiga i le Tai. Ae ou te faamalo atu i si tamaitai lea o lo o tauaveina le tiute lea a le Fisheries. Faamalo atu i faasao ua faapena ona vaaia le polokalame lea o lo o fai atu nei mo le faaleleia o faasao, e agai atu lava i Mulifanua, Lalovi , Satui, Apolima e oo lava i Manono, malo. Faafetai lava mo lea foi tautua ma lea galuega. Faafetai i lau Afioga i le Minisita mo le faasao.

Na pau le mea ou te fia tauina atu, ona o lo o i ai lava a tatou faatoaga foi ia o sea cucumber po o le faafaileleina lea o le mamao po o sauai, o a uma tauga o mea nei o le sami. O lo o faapena ona galue pea i ai le kamupani i tai i si o matou motu o Apolima, ma o lo o solosolo lelei lava le faagasologa. E i ai le talitonuga po o le masina fou po o le isi foi masina, a mafai ona maimoa i ai ma mafai ona maua le avanoa tatou te tietie ai ma faapea ona faamaonia, e pei ona i ai asiasiga a le Ofisa o Faatoaga o lo o i ai i lea foi farming. Aua o lo o i ai le talitonuga o lo o i ai le tatou sa e le mafai ai ona tatou avea ai ia figota i tai i le sami, ae tatou taumafai e faafofoa ma fai le nursery ma fai se faatoaga, ia ma ona fai se laisene, ma fesoasoani atu ai i le mamalu o le atunuu. O le tatalo atu lea ma le agaga faaaloalo i lau Afioga i le Minisita mo Faatoaga, faafetai tele mo le tautua i si o matou itumalo e ala i nuu taitasi.

Ia, e i ai le talitonuga o le Afioga i le Minisita mo Galuega, o le Minisita lea e taulai uma i ai le tele o manaoga i itumalo taitasi, e le gata o le auala, o le vai, o le uafu ma mea uma faapena., o lea e i ai le talitonuga, faafetai i lau Afioga i le Minisita. O le itumalo lenei, e le tagisa foi. O le itumalo lenei, e mau lava le toovae, e lava a le onosai, e i ai foi le talitonuga e tatalo atu ai i lea foi tulaga, lau Afioga i le Palemia, faafetai o lea ua e tali mai ma o lea ua tuufaatasi uma tatou fuafuaga ia. O le uafu i Faleu faapea foi ma auala, o le vai, o lea ua silafia e le Pule Sili o le Pulega o le Suavai, o i ai se fuafuaga mo se poloketi faigofie, e le o se galuega e taugofie foi, o le galuega e tele lava se tupe e faaalu ai, ae malo, o lea e faalogologo ma le totoa ua tali mai, e tusa ai foi ma le tatou galuega lea. O le a maua pea le onosai o lenei itumalo mo le tatou galuega lea. E pei e aafia atu ai foi ma le Minisita mo le Punaoa Faanatura ma le Siosiomaga i le tuufaatasiga lea mo le tau aumaiga i luga o le seawall e tau i le tatou motu i Manono. E tatalo atu i lau Afioga i le Palemia, lau Afioga i le Minisita o Tupe, o lau lava faamatalaga, ou te faalogologo i sui usufono mamalu o isi itumalo ia, o lo o talatalanoa mai i le Paketi po o talatalanoa mai foi faapea mo le faasafuaina o le keke pe lua foi e faapea o Savaii ma Upolu e faasafua atu ai le keke. A o le taimi lenei, ou te tatalo atu faamolemole, ia manatua foi e outou aua tou te faimea faapito, vaefa le keke, o Upolu ma Savaii, o Manono ma Apolima, o motu. E pei o le agaga lea o lea e tatalo atu ai le sui usufono mo Aiga i le Tai, aua tou te faimea faapito na o outou.

E i ai lou talitonuga lau Afioga i le Fofoga Fetalai, e leai se mea tele faapena... ae pau o le mea ou te faafetai atu i le Afioga i le Palemia ma le mamalu o le Kapeneta faamalo lava mo galuega fai. E talitonu foi o lo o i ai nisi o Minisita e auala eseese mai ai manuia o si o tatou atunuu, e faapena ona tagisa i ai le toatele o sui usufono. A o le agaga lava ia o le Feagaiga, leai, e taputapuava lava ma faatalitali mai, o le a se mea e avatu i le matou motu, ua malie foi i ai le sui usufono mo Aiga i le Tai i lenei Tala o le Tupe.

O le Tala o le Tupe, malo faafetai tele lava, faafetai mo le faasoasoina o le tatou Tala o le Tupe. Faafetai i lau Afioga i le Minisita, faafetai foi i le Matagaluega. Ua uma foi ona faafetai atu i Matagaluega taitasi ona o le tautua o lo o faapena ona maua mo le atinae o le tatou Malo o Samoa e faapena i alo ma fanau.

I le tapuaiga a si ou itumalo, faafetai. Ou te talitonu o le lauga foi lea mo le Paketi o lenei tausaga ma le tausaga mulimuli o le tatou Paeaiga lenei, ae talitonu o lo o i ai foi se isi avanoa e faapena ona tatou toe lauga ai ma faapena ona tatou tatalo atu i tatou itumalo. A o lenei itula, lau Afioga i le

Fofoga Fetalai, faafetai mo lou avanoa. Ua talia ma le faafetai e lenei itumalo le Tala o le Tupe mo lenei tausaga 2015/2016. Ia manuia tele le Fono a le Palemene. Manuia Samoa.

FOFOGA FETALAI: Malo saunoa, faafetai i le saunoaga matagofie a le sui usufono mamalu mo Aiga i le Tai. Ua faafofoga foi le tatou itumalo i le tulaga o tuleiga ma saunoaga. Ia, o lenei e te lua sootulutulu, o Aiga i le Tai ma le Vaa o Fonoti. Ia o ouluga lava o Feagaiga a le atunuu, tulai mai e papaaveloa la ouluga pitolaau ona faasolo ai lea i lea itu o le Malo. Tulai mai le sui usufono mo le Vaa o Fonoti.

Afioga TIALAVEA FEA TIONISIO SEIGAFOLAVA (Vaa o Fonoti): Faafetai i lau Afioga i le Fofoga Fetalai mo le avanoa o lenei itumalo e faaali ai se manatu i le Tala o le Tupe o lenei tausaga.

E muamua ona faatalofa atu i lau Afioga i le Fofoga Fetalai, lau Afioga i le Palemia ma le Sui Palemia aemaise o le afifio o Minisita o le Kapeneta aemaise le afifio o Minisita Lagolago. E faatalofa atu foi i le Taitai o le Itu Agai ma le Sui Taitai ma lenei Itu o le malu.

E faatalofa atu foi i si ou itumalo pele o le Vaa o Fonoti, o ou paia e le autalaina ona e talitonu e puupuu le taimi ae talitonu lava o paia e le mafai ona suia e se tasi.

Lau Afioga i le Fofoga Fetalai, o matou nei e i le Komiti o Tupe, o le tele o manatu ma lagona ua uma ona faaalia i le matou Lipoti pei ona taatia i le Maota Fono, ma e talia e le matou itumalo le Tala Faatatau o Tupe 2015/2016.

Lau Afioga i le Fofoga Fetalai, na o ni manatu laiti lava e faailoa ai le agaga fiafia o lenei itumalo i le Malo e tusa ai ma galuega ua faatinoina i totonu o lou itumalo nei. E momoli se faafetai ma le faamalo i le Afioga i le Minisita mo Galuega, aemaise le Matagaluega e tusa ai ma galuega o lo o faatino nei i Fagaloa, ma le auala lea i Uafato, o se tasi lea o auala e faigata le fauina ona e aea mauga ma ifo i vanu. Faafetai o lea ua oo mai le faasoa i lenei vaitau ua 53 tausaga, faafetai ua oo mai le faasoa, o lenei vaitau ua 53 tausaga, ia faafetai ua oo ae se lagona i lenei vaitau, e talitonu o le lauga lava lea a sui usufono uma sa tauavea le nofoa o le itumalo. Pau le talosaga i lau Afioga i le Minisita, o lenei ua taunuu atu le talosaga mo le galuega lea, pe mafai ona faaauau atu se i oo i lalo i le aai, ona o mafuaaga, e talitonu o le a i ai se taimi a toe sosoo le auala lea ona e fai sina taugata, ona e tau foi i le feaveaiina o masini i le faiga o le auala lea, e toe faaopoopo foi, e lau atu i Fagaloa toe lau mai, a o la ua i ai le kamupani i tua, po o le a se.....e talitonu foi i le tau o lo o fai ai, e le maua lava le tau lona lua sa i ai i le tauofoga mo le fausia o lea auala, ae talitonu o se tau taugofie lenei ia ma le toe faaleagaina ai le auala pe a toe sosoo i se taimi o i luma. E valuvalusia ai aa o le fau i lau Afioga i le Minisita ma le Malo, ia ae papaaveloa le galuega mo le itumalo o Fagaloa, na o le talosaga lea e tuuina atu pea i ina i lau Afioga e tagai i ai i mafuaaga e ala ai ona naunautai ia faataunuu le faamoemoe, ona e taugofie lenei vaitau, o lo o camp foi le kamupani lea i lalo i Uafato i le aai, e faigofie ona latou faaauauina le galuega ma faasaoina ai foi nisi tupe a le Malo i le lumanai.

Ae momoli atu le faafetai i lau Afioga i le Minisita ma le Matagaluega aemaise foi o le Malo e auala atu i le Fofoga Fetalai mo ia galuega ua faataunuuina i Fagaloa.

E talosaga atu foi le matou nuu i Faleapuna, e talosagaina se auala galue, e tasi lava le auala galue, e le i faia lava se auala galue i Faleapuna, e tasi lava le auala galue, e 1.6kilometre le mamao o le auala lea e fesootai ai le isi itu o lo matou nuu, o uta foi i le mea o lo o i ai le auala lea e talosagaina o le a sifi i ai le faleaoga o lenei nuu, ona ua le pasia le mea o lo o i ai ona ua latalata i le sami. E talosaga atu i lau Afioga i le Minisita, o lea e te faalogo atu i sui usufono, e amuia latou, o le a alu le faata faatolu o latou auala galue, e le i tilotilo lava Faleapuna i se mea e tau o se auala galue, leai e tuu atu i ina i le faasoa lelei, e talitonu lava e faigata ae manaomia se fesoasoani. A uma le 1.5kilomita lea, ia ona faaauau atu lea i lo matou pitonuu lea o Matautu, masalo pe na o le 400mita le mamao mai le auala o lo o nofoia e le nuu e i ai foi le falea i le pitonuu lea e faauma ai le matou 2kilomita lea e masani ona faalogo atu i auala galue o lo o fausia nei, e 2kilomita, a le mafai foi ona faata, e talitonu afai e faigofie le teu, e talitonu o le mea lena, pe mafai ona teu pea le auala, ona ua matua lauleaga lava mo femalagaiga i lea itu o lo matou nuu lau Afioga i le Minisita.

Lau Afioga i le Minisita mo Punaoa Faanatura ma le Siosiomaga, ou te talitonu faafetai aemaise foi o le asiasiga ona o lena o le a fai le taligalu le ala lea agai mai i Salimu ma Musumusuu, e talitonu lava e tatau lava ona fai muamua le taligalu, ona faatoa fai mulimuli ai lea o le auala aua e toe leaga uma le auala pe a faapea e fai muamua, ae faafetai o lena ua logo mai o le a faatinoina i lenei tausaga se vaega o lea taligalu, e momoli atu le agaga faamalo e taua atu i le Afioga i le Fofoga Fetalai ma le tatou Malo i lau Afioga i le Minisita mo Punaoa Faanatura ma le Siosiomaga mo lea galuega o le a faatinoina mo lou itumalo.

E talitonu lau Afioga i le Fofoga Fetalai, e tele lava i manatu ma lagona i Matagaluega eseese o le Malo, e talitonu lava e le o galulue uma lava itutino uma o le Malo aua le manuia lautele o le atunuu, o le Ofisa o Faatoaga, pau le Ofisa lenei o Faatoaga e manatu o le poutu lea o le atunuu e tele ai le galuega e pito i tagata tafafao maimoa mai, e mafai ai ona galulue uma tupulaga talavou, o lea sa matou i ai nei i le fono i Fiti, amuia lo tatou atunuu, ou te nofo ma ou faalogologo i talanoaga a sui mai Aferika i le pagatia na i ai le latou atunuu, ae fai mai, amuia au ma le fanau i Samoa e le maua le matelaina lea e maua mai i atunuu ia, ai o le mea lea e tau o le poverty, mativa, le ai, tau le maua se suavai, moe i le aualatele, ae faamalumu i fale atigipusa. Na matou vaai i ai i le taimi na matou malaga ai i le atunuu i se tasi o malaga, o le tele o tagata e nonofo i aualatele, ae amuia tatou o Samoa, o le mativa lava o tatou o le leai o se tupe, a o le mativa o ia atunuu, e leai se tupe, e leai se fale, e leai se ofutino, ta te iloa atu lava, tulou, ia iviasoaso o tagata, o lo o taotoo i magaala, e faatusa la e au le mea lena o le mativa, a o i inei, ia ou te talitonu o le leai o se tupe ona faapea lea o le mativa, ae o lea e maua le tausami. E talitonu le faamoemoe, o galuega foi ia faapea o le a leai ni masei i lo tatou atunuu nei, e tatau foi ona tatou galulue e faatumauina, o le tamaoiga lea o le tatou atunuu e ala i faatoaga, ia maua lava le fofoga taumafa i aso uma. Faafetai i le Afioga i le Minisita e tusa foi o le tatou Food Scheme na tatou maua i le 2013, na maua ai e tatou le pine auro o tatou le atunuu muamua.

Ae i ai le talitonuga lau Afioga i le Minisita mo Faatoaga ma Faigafaiva, i Fiti ma...e selau vaafagota la e i Fiti, e selau, ona o le tele foi o le faleia lea sa matou asiasi ai lea faapea o le a fai mai foi i Apia le isi lala, o le matua

maoae lava o le.....o lea ituaiga fale, o le matua tele o le ia la e filei ai ma lau i fafo, ae leai ma se manogi, ae le mafai foi ona soona alu ai se isi i totonu, ona e i ai form e faatumu pe e te mai, pe e te fiva, po o fea sa e i ai, pe sa e i le faatoaga ananafi, o le matua puipuia lava o totonu o lea ituaiga fale, ae leai se manogi e faalogoina, a o le fale lea faapea, e faapea le fale lea o le a fau i tai i le uafu. Ia tatou talosia ia, ia maua nei faamanuiaga, e talitonu o le Ofisa o Faigafaiva e tatau ona faamama laitiiti le latou.....ina ia faigofie ona maua laisene o vaafagota, aua o lea pe ono vaa lea e i ai i le taimi nei a tatou ia ma tatou lava vaa e mafai ona fagotaina, pei ona ou fai atu o Fiti ua selau vaa la e lesitala ai, o Papua Niu Kini e tele atu, e pau foi ia o atunuu e lua ua uma ona saina latou EPA_ma Europa, o Fiti ma Papua Niu Kini, a o le toatele o le Pasefika o lo o taumafai e fai le EPA ma Europa, ia e matua mumusu lava le Komisi o Europa e talanoa, o lea ua tolo mai i le isi tolu tausaga, e talitonu o le agai i luma o tatou o le tasi lenei atinae, e le gata i le maua o galuega a o le tele o fua o faaeleleaga o le a mafai ona ave e faaaoga e vaa nei, o lona uiga o le matua tele lava le tamaoaiga e maua mai e uiga i le faafaigaluega o o tatou tagata, e pei foi ona saunoa le Minisita ananafi, e tele tagata e mananao e fia faafaigaluega i vaa ia, ae talitonu o le tatou atunuu e fiafia puupuu, e lua lava vaiaso toe fia sau, a o le tamaoaiga e mafai ona tatou mauaina mai e ala i fua o faaeleleaga e alu atu, ia o le diesel o le vaa, e totogi uma nei faamanuiaga, aua le faaauppegaina o vaa nei, ia mafai pe a o e fagogota ma toe foi mai.

E tuu atu i lau Afioga i le Minisita, e mafai ona faamama laitiiti nisi criteria i le award ina o laisene o vaafagota a fafo e galulue i o tatou ogasami, ia tatou join foi tatou ia, a mafai foi ona tatou take away ae tatou saina foi se tatou EPA ma Europa ia faigofie ona avatu a tatou oloa i Europa, ia tatou o, o la e mafai e Fiti, ua amata e Fiti ma Papua, e manaia foi ae tatala mai ia maketi mo le aufaipisinisi mo tatou, ia faigofie ona maua ai nisi tatou faamanuiaga mo atinae.

O le Afioga i le Minisita mo le Soifua Maloloina, faamalo i le Matagaluega le galulue, e le faigofie la outou galuega, o le tele foi o falemai i atunuu mamao aemaise ia falemai o Malo, e umi foi lava le taimi o faatalitali mo le vaaiga o se fomai, ae i ai lava mai o gasegase faapitoa e o atu lava ma vave ona o, emergency, ona vave lea ona.....ae faafetai o la ua i ai le tatou emergency i uta i le tatou falemai fou lea, e faigofie ai ona afea e le gasegase tigaina, e pau lava le fautuaga lau Afioga i le Minisita o le maintenance o fale nei, e manaia ae taua, o le mea aupito sili ona taua, e i ai lava taimi e ta te oo atu i le falemai ua amata ona palapala, ia au lava ia ma lou talitonuga e tatau lava ona fai lelei se maintenance, e tusa lava pe ave i tua, nisi e o atu e faamama ma tausii le falemai, aua e talitonu o le tele o maintenance nei ona amata lea ona fesuisui ai solo ia ea malulu, uaea, e ese foi o le code a Saina ina ia.....i ai, ae tuu atu pea i lau Afioga.

E talitonu lau Afioga i le Fofoga Fetalai, e le tele nisi manaoga, faafetai foi le galulue mo le tatou Malo.

Lau Afioga i le Minisita mo Leoleo ma Falepuipui ma le Matagaluega, malo i lau Afioga le galue, aemaise foi o le faafoeina o le Ofisa o Leoleo i lenei vaiata, faafetai i le Komesina fou ma Faauluuluga o Matagaluega, ua tele le suiga i lenei vaiata, ona o suiga fou o le Ofisa o Leoleo, ia talosia ia tatou taumafai ai pea i lea tulaga ou te talitonu e faigata le amataga ae a oo i le faaiuga e faigofie ai galuega ma le faatinoina o tiute tau Leoleo.

E faapena foi i le Falepuipui, e talitonu e ui lava ona o lo o i ai lava pagota e le i maua ona o le faigata, ae taatia atu pea iina i lau Afioga i le Komesina o Falepuipui mo le sailiina mai o le pagota lea ua tolu masina o leiloa poo fea o i ai ae tatau lava ona maua. E le tatau ona taatia umi faapea se pagota ua tolu masina ae tatau ona fai se isi faiga e mafai ona tuu atu se fautuga po o le faasalalau o se tau'i mo se isi na te iloa. Ua umi tele ona i fafo lea pagota ae leai o le Samoa lava ae faigata po o ua fiu foi alii Leoleo e o atu i mea o lo o tau mai, ou te talitonu a avatu loa se tau'i po o nanei e oo atu taeao ua maua ma sau le tagata e avatu lana tupe a ia maua mai ona ua fai sina umi o i fafo.

Lau Afioga i le Fofoga Fetalai, o manatu na o lo matou nei Itumalo e pei ona fai atu se lagona i le taimi ua sola, o matou manatu ma lagona ua i totonu o le Lipoti a le Komiti o Tupe Maua ma Tupe Totogi o lo o matou auai. Faamalo atu i le Malo, malo foi le galulue i Matagaluega taitasi uma o le Malo aemaise o lena ua amata ona tatou vaai i nisi o Matagaluega. E faafetai atu ai i le Minisita mo Matagaluega Tumaoti a le Malo ua maua mai ni tupe e fesoasoani ai i le tatou paketi (budget). Faamalo le galulue ia te outou uma i Minisita, faapea foi le Minisita mo Fesootaiga ma Faamatalaga Tekonolosi, manaia le tatou marine cable masalo po o le faaiuga o lenei tausaga, aua o le tasi lea vaega aupito sili ona taugata ia tatou o le internet, ae a maua mai le tatou cable lenei i le faaiuga o le tausaga ou te talitonu o le a vave ma taugofie le tatou internet. Ona pau lava le fautuaga ina ia taofi e le Malo le faagaioiga o lea faamanuiaga ina ia mafai ona tauva atu i ai kamupani o lo o latou faagaioia lea ituaiga pisinisi o le internet ina ia faigofie ai ona maua tupe mo le atinaeina o le tatou Malo, a ia control pea e lau Matagaluega le faafoeina o lea foi ituaiga atinae taua a le tatou Malo, ona e le mafai ona alu le atinae ae mamao i tua taumafaiga faa-internet po o le tekonolosi ae tatau ona o faatasi. Faafetai o lea o le a fai i le faaiuga o lenei tausaga e pei ona manumalo ai ma tatou maua ai faamanuiaga mo le atunuu.

Faafetai i lau Afioga i le Fofoga Fetalai mo le avanoa o lenei Itumalo e molimoli atu ai o matou lagona. Faafetai atu foi i lou Itumalo mo le tapuaiga mo nei tausaga e fa ua mavae atu, e talitonu lava le agaga ma le faamoemoe, o le a lava se taumafaiga i nei tausaga ua mavae, leai o le ai mo le Alii, ia tatou faafetaia le alofa o le Alii aua le musumusuina o le Malo mo galuega fai aua lo tatou Itumalo.

O la matou faafetai lea i lau Afioga i le Fofoga Fetalai, malo foi le galue mo le faatinoina o le Fonotaga a le tatou Atunuu, malo galue, faafetai mo le avanoa lau Afioga.

FOFOGA FETALAI: Malo faafetai saunoa i le sui usufono mo le Vaa o Fonoti, manatu ua manino ma malie le saunoaga aua le faafofoga taumomoli o le tatou Itumalo.

Ia o le a lafo mai i lea Itu o le Maota ma ua ou vaai atu i le sui usufono mo Vaiaisagano Nu. 2, o lea ua tatou faasolo ua toe o le Komiti o lo o totoe a o le a lafo atu le avanoa.

Tofa MOTUOPUAA UIFAGASA AISOLI VAAI (Vaisigano Nu. 2): Faafetai lava i lau Afioga i le Fofoga Fetalai.

FOFOGA FETALAI: Malo foi faafetai lava le afio mai i lenei aso.

Tofa MOTUOPUAA UIFAGASA AISOLI VAAI: O le mea foi faapea ai e tu mai lava le sui usufono latou a o lena ua e tofi mai ae leai se e fai loto ao le a usitai lava i le mea ua e saunoa mai ai.

O le paia maualuga o le Maota i le afio o lau Afioga i le Fofoga Fetalai, ae tainane le mamalu tele o le Maota i le afio o lau Afioga i le Palemia faapea le Taitai o le Itu Agai ma le mamalu o le Palemene i lenei aso, aemaise foi o le Matagaluega o le Fono Aoa, Ofisa Sili o Pulega o Matagaluega ua tatou auai i lenei aso, malo le lagi e mama ma le soifua maua.

Ia se i ou oo tasi ane lava i lou Itumalo i le Afio o Aiga ma Sataua, lau Fetalai Lealuga, afio oe le mamalu ia Fagasa, le Matua ia Utuutu ma Faitau, Afio Tagaloa o le alii o le Nuu ma le mamalu tele ua aafia ia te oe Fagasa.

O lenei aso sa i ai le manatu o le a le faia se lauga a Vaisigano Nu. 2, silasila foi lau Afioga i le Tulafono Tau Faaofi o le Faatatauina o Tupe 2015/2016, ao le i fai atua sau tala e muamua ona ave lau faamaisega i lou uso a sui usufono mo Vaisigano Nu. 1, le Afioga Tufuga, ona o le tuumalo o le tina o le aiga, ia faamaise le Atua i lau Afioga ma le nofoa-alo, tainane aiga na lua ma le mamalu o lo ta Itumalo ma lo outou aiga.

O le Tulafono Tau Faaofi o le Faatatauina o Tupe 2015/2016, e pei ona ou fai atu o le a le faia sau lauga ona a silasila foi i le faamatalaga o le Tulafono Tau Faaofi o le Faatatauina o Tupe 2015/2016 po o le Tala Autu po o le Theme o le Tulafono Tau Faaofi o le Faatatauina o Tupe 2015/2016, “Fua le manao i seleni ua maua” or “Live within your needs”. Ona ou nofo lea ma ou mafaufau po o le a la le tatou mea na fai i tausaga ua tea? Live beyond our needs? Ua ou faapea, o lea la faatoa sao, ua fai fai le alu i le atoa ae sue atu ua toe foi mai e amata atu lava i mea tatou maua. O le upu lenei o le “toe foi mai” e pei lava o le tagata sa agasala a ua toe foi mai ia Keriso. O le foi mai, lau Afioga i le Fofoga Fetalai, ta talanoa taua. O le ‘foi mai’ o se upu e aoga tele, foi mai ua e salamo, a e le manumalo i se mea e te toe foi mai e toe amata. E pei lava o le tauvaga a Faafafine na fai i Savaii, fai mai le faafafine Savaii, tatou toe foi mai tatou, ioe, toe amata atu i i.

Faafetai i lau Afioga i le Palemia ona o lea ua aumai le Tulafono Tau Faaofi o le Faatatauina o Tupe 2015/2016 e mafai ai ona tatou ola fuafua. Faafetai mo le Tala o le Tupe, a o lou iloa i le mea lea sa tupu i aso ia ua toatele tele le aufaigaluega a le Malo, ua tele le bureaucracy e pei o lea upu faa-papalagi, ua too manu administrations ae laitiiti le output e pei lava o isi department. E pei foi o le Health Department, oka oka se aufaigaluega e te leiloa po o a galuega a isi tagata la e fai. Ua oo atu ai ma lau faamatalaga i le Matagaluega mo le Soifua Maloloina, lau Afioga i le Minisita e muamua ona faafetai atu i lau Afioga ma le Malo ona o le maota gasegase matagofie ua uma ona fausia aua gasegase e agai atu i lo matou Itumalo faapea le atunuu fegasoloai, faafetai tele. Faafetai mo le maota ae talosaga atu pea i lau Afioga ae manaia pe ana maua se Fomai e nofomau ai i o. Ua manaia le Maota ae lelei ona i ai ma se Fomai ona ua amata ona toatele atu gasegase e vaai i le Falemai i Sataua.

O le tatou maota gasegase i Motootua ua manaia tele. Sa matou talatalanoa ma nisi o Fomai papalagi maualuluga mai fafo i le manaia tele o le Falemai, o le latou matau pe ana faapea e atoatoa lelei ni masini ma nisi o totoga ma i latou e faatinoina e leai lava se Falemai o le Pasefika lenei seia vagana Niu Sila na te mauaina le Falemai lenei, ae paga lea i lau Afioga i le Minisita, atonu o se taimi maua se tupe ona faaotaota ai lea. E le o atoatoa a tatou

masini aemaise i latou o lo o i ai le poto faapitoa. I lau matau ona amata ona ave a tatou Fomai agai i Fiti e fai a latou post graduate, o le a le mea tatou te le faataitai ai i Papua Niu Kini. O Papua Niu Sili e fai a latou exchange ma Ausetalia i Fomai on the register level, a e vaai ia Papua Niu Kini le taimi lenei, o le o o Fomai a Papua Niu Kini e train i Ausetalia ma o atu foi Fomai mai Ausetalia e faataitai ma vaai po o a ituaiga gasegase o lo o maua i Papua Niu Kini, o i ina ua maualuluga ai faailoga i mea tau Fomai a Papua Niu Kini. O le toatele o tagata na matou aoga ua on the Fellowship level ao le mea sa i ai tatou e pei ona e silafia a e le sola lava oe e taumafai ma sue se mea e te galue ai e le maua lea atamai. O le mea lea i lau Afioga i le Minisita, manaia ae fai se arrangement ae aua le toe avea i Fiti, o Fiti e tutusa lava ma tatou. O le Masters level lea e ave nei i ai tamaiti a tatou ae manaia ona ave a tatou fanau lea e fou mai, ave e train mai i Niu Sila po o le fai o le exchange programme e pei ona ou fai atu ai e atili manuia ma atamamai ai a tatou fanau nei e toe foi mai ma tautua i le tatou atunuu. A maua ma ni masini ua le toe avea se mai i fafo e pei ona saunoa le Afioga i le Palemia, o mea uma nei tatou te tilotilo i ai i aso o i luma.

Lau Afioga i le Minisita mo Aoga, Taaloga ma Aganuu, e tatalo atu i lau Afioga ua e silasila foi o lea ua avatu le Maota gasegase e tuu i totonu o le alaalfaga o Sataua o iina e ogatotonu i ai le Itumalo, ma na fai mai lava le falemai i le taimi o.....o tu i totonu o Sataua, sa tu ai foi le falemeli, sa tu ai foi le aoga faaitumalo, ae paga lea ina ua le ogatasi foi le futia ma le umele, ua pei ua fesetetai ia tulaga o falemeli ma le faleaoga faaitumalo, ua tatalo mai lava le tele o nuu o Falelima, Neiafu, Tufutafoe, Falealupo ma Papa, e a pe a se i outou tatala ia le....e toe tuu mai ua mamao tele i o i Asau le aoga faaitumalo, ua tu mai i le siusiu, ia ae lelei i i Sataua e ogatotonu. Ia pei o le tatalo atu lea i lau Afioga, se i tagatagai i ai ni aso o lumanai. Ma lou faaaloalo tele.

Lau Afioga i le Minisita mo Galuega, Felauaiga ma Atinae Eeseese, ia ai foi o le a e toe faalogo mai, masalo po o le sefulu ea lea o tausaga o ou talosagaina ia auala o si o matou nuu, o auala i totonu o nuu na faaleagaina e le afa, ia o lena ua uma ona fausia auala o isi sui usufono, e ui lava ina faatoa omai nei lava, ia a o lenei na talosaga mai lava i le 2006, ou te matea o le a ou le toe talosaga atu ia ia oe, pau lava na ona ou aioi atu ia te oe, a i ai se taimi e te tau ane ai pe e te ala ae i le vaveao pe manatua e tatau ona fai lou auala, ia, ae fai mai le upu o le isi tamaloa, 'ia taatia ia atonu e alofa le Atua ia te oe i se aso, fai lou auala,' ia lau Afioga i le Minisita mo Galuega, se alofa maia, alofa maia o lea o le a uma le....

FOFOGA FETALAI: Ia o lea o le a alofa atu le Afioga i le Minisita, se i tulai mai lau Afioga i le Minisita mo Galuega, Felauaiga ma Atinae Eeseese a le Malo.

Afioga Hon Manualesagalala Mati Tuigamala Enokati Posala: Faafetai i lau Afioga i le Fofoga Fetalai, ua logo foi i tino le saunoaga a le sui usufono mamalu, ou te iloa o le tele lava o galuega o la e faaauau - ma o i i Vaisigano Nu. 2 ma i i Falealupo, tasi lea o afioaga e matua vavamamao tele, e fai o le alu i tai i le aai, o le alu o auala galue i uta, o le tele ia o auala la e i ai o la e faagaioi, o lona uiga, toetiiti tele atu i lo le taulaga o Apia le auala la e i ai i totonu i o, o tulaga na o la e faatino ai, e oo foi i le suavai, ua talosaga mai foi

ia....ia ua tau i tai i le mea la e i ai faleaoga, ia e ui lava ina faalavelave ia le sui usufono mo Falealupo, o la e la te sosoo ae musu e tau atu i ai le vai, o la sa taumafai lava ina ia faasoa le tulaga i le suavai, ae pei o le tasi lena auala o la e le i maua se fealofaniga i totonu i i, o lea e ala ai ona faaletonu isi tulaga pei o le suavai, a o le auala ia o lea ou te talanoa atu leaga a fua i le tagata la e aumau ai ma le mamao o le nofoaga, a o lea lava e faatino le galuega e soosoo atu ai a le Pulega o Felauaiga i Luga o le Laueleele, ina ia mafai ona laugatasia ai mea ia o le oo atu o tatou auala ia mo femalagaiga, ma le agaga faaloalo, ae lafo maia lou finagalo.

FOFOGA FETALAI: Tulai maia le sui usufono mamalu mo Vaisigano Nu. 2.

Tofa MOTUOPUAA UIFAGASA AISOLI VAAI: Faafetai atu i lau Afioga i le Minisita, masalo o le a ta le finau i auala ia, ae pau lava le mea e toe soso atu i lau Afioga, se i e silasila ane lava i le auala lea o Fagasa ua leva ona ou talosagaina le auala e alu i totonu o le nuu e tau sifi laitiiti i luga, na lavea mai lava ia Ofa, a e tilotilo i ai, ae le atoa se 150mita le umi o le mea e nonofo ai tagata i totonu, pe a toe oo atu sau asiasiga i Savaii, ona e afio ane lea se i e silasila i ai, ma lou faaloalo tele ona e talitonu ai lea o le mea lea ua leva ona ou tuitui mai ai.

Lau Afioga i le Fofoga Fetalai e pei lava o lau tala na fai atu, ou te le i sau e...na ou sau ona o lea ua toe foi lava i le mea e tatau ona fai, that's live within our means, ia pau o le mea, ua uma foi se faamatalaga a le sui usufono nei.

Ia tau ina alofa le Atua ia faamanuia lau Afioga faapea le Taitai o le Malo, le Taitai o le Itu Agai faapea le mamalu tele o sui usufono, ia faapea e o aofia i totonu o lenei Maota Fono, faamanuia ia Samoa o lo o faalogologo mai, ola i le alofa o le Atua, faafetai.

FOFOGA FETALAI: Faamalo saunua i le sui usufono mamalu mo Vaisigano Nu. 2, e talitonu foi le faamoemoe ia e le o ni ai i avea le talosaga atu o la e faafofoga mai o tatou itumalo, o le tatou Tala o le Tupe mulimuli lenei ua lalata foi le vaivaa, ia na ona lagona na ua taua, o le taua o le toe foi mai, na uma loa ona fau lou falemai, ia fuafua loa tupe a le Malo, o le mea sili ua uma ona fausia lou falemai tele i Sataua.

Ia lau Afioga i le Tuiatua Faanofonofu, o le a lafo atu i lea itu o le Maota ona tatou faasolosolo ai lea toe o la outou Komiti lea ua faasolo, faafetai, tulai mai le sui usufono mo Aleipata Itupa i Lalo, ia ona sosoo ai lea ma se tasi o sui usufono mo Salega, Afioga Afualo Wood Uti Salele.

Afioga TAFUA MALUELUE TAFUA (Aleipata Itupa i Lalo): Faafetai i lau Afioga i le Fofoga Fetalai, ua maea ona paelago paia ma mamalu o le malu nei, ma o le a ou le toe oo i ai, faafetai foi i le paia ma le mamalu o Samoa ua potopoto o lo o faafofoga mai i le tapuaiga aemaise o si ou itumalo i Aleipata o luga ma lalo. O lea ua uma ona molimoli atu manaoga a si ou atalii le sui usufono mo Aleipata Itupa i Luga, ia o le manatu lava lea e tasi, e leai se isi mea tele e toe siia, sa ou faapea e talu ai o au o le Sui Taitaifono o le Komiti o Tupe, e tatau ona faamulimuli ia maua ma Papalii, ae ui i lea, e talia ma le fiafia le avanoa ua aumai.

O lea ou te tilotilo i le tusi mumu lea o le tatou Paketi, ia e fetai ai lava le muagagana foi lele, aua le faamasinoina le tusi i lona faavaa, ia ae faitau lelei ai i totonu, e aumai ai nai aano lelei na e i ai. E na o le tolu lava nai vaega o lau tatalo lea e fia fai atu, ma le faaaloalo, o le vaega muamua o le matou talosaga i lo matou itumalo, lona lua o le tuualalo i lo tatou Malo, o lona tolu o le Tala Faatatau o le Tupe

O le talosaga lava mo le fesootaiga o lea auala, ou te molimau atu ma le faaaloalo i le paia o le Palemene, o lea lava e savavali nai tamaiti i lalo i le palapala. A sua foi e manaia sei tau faigofie ai mo nai tamaiti aemaise o i latou e malaga i le lotu ma tulaga faapea. E le gata i lea o le talosaga ma le agaga faaaloalo na ou faalogo o tau le vai sa eli i Falealupo faapea ma Neiafu ma gauta o Aleisa ma faasolo atu ai. Sa ma feiloai ma le Ofisa Sili o Pulega o le Suavai i lea vaitaimi ma o lana saunoaga e uma loa Falelauniu ona alu atu loa lea i tua ia matou. Ae mo le silafia ua uma foi ona ou talanoa atu i lau Afioga, o le vai lea sa vili i le vaitaimi o Muagututia Siaosi i le taimi na avea ai ma sui usufono o le Paeaiga ua mavae po o le sefulu ma ona tupu tausaga, na maua le vai i lou fanua ae talu ai ua toe lulu le mafuie lenei ma toe poloka ai le vai ao lo o iloa lava le fanua ma faigofie ona maua. E pei o le talosaga puupuu lea e pei ona saunoa foi lau Afioga ae afai lava e faigofie le sau o le suavai mai le auala fou o Samusu ia viia le Alii, ao le talosaga lena ma le tuualalo atu lena i lau Afioga.

O le talosaga faamolemole o lea ua manaia le auala fou na fai nei ao auala e fesootai ai o lo o i ai patupatu sa fai ai mo le saogalemu, faafetai atu mo lea tulaga. Ona pau lava o lea ua talosaga mai nai tagata e fai a latou taavale laiti ae le o pikiapu ua fai sina loloto tele o patupatu ona e afaina ai lava nai a latou taavale ae pe mafai faamolemole ona toe silasila i ai pe mafai ona faalamolemole lea vaega. E le gata i lea sa saunoa foi le Palemia i le tatalaina o lenei auala a ua fai lava ma tuuga taavale i nisi o taimi. O lea ua faafofoga mai le Minisita mo Leoleo ma Falepuipui, a maua se avanoa o Leoleo o lo o pou i Lalomanu e asiasi mai i lea auala e tutu ai ma talatalanoa ai ma atonu e alualu lemu ai taavale e uia lea ogaala, ma le faaaloalo lava.

O le isi vaega o le Malae Vaalele ua taua e fai i gauta o Satitua ma Malaela, masalo faatoa ma talanoa ma se alii ofisa o i latou e ona le galuega, e talosaga atu ai ma le agaga faaaloalo e manaia lava – o la atunuu afai o se galuega po o se ituaiga atinae faapea e matua fai muamua lava le consultant process o lona uiga e fai fesootaiga ma stakeholders e aafia ai matou nei, aemaise o i matou nei e taimua i Itumalo ma nuu, e tataua ona talanoa lelei po o a aafiaga aua e tele lava aafiaga, a tuu i le pao o le matua pao lava, a pau mai foi le penisini mai luga ma tulaga faapea o mea na e tataua ona soalaupule muamua, ao se ata foi o le Malae Vaalele sei aumai se i matou vaavaai i ai.

Faafetai atu i lau Afioga i le Ofisa Sili o le Fuimu, o lea lava e faatali le tatou loli fuimu po o afea e avatu ai, ae afai lava e te finagalo e avatu i lea tausaga faafetai viia le Alii.

O le uafu, lau Afioga ma le faaaloalo lava, ua fesiligia lava lea tulaga pe faaoga afea lo matou o i Tutuila...

FOFOGA FETALAI: Malie lava le sui usufono sei avatu lava le avanoa i le faauilavea a le sui usufono mo Gagaemauga Nu. 2.

Tofa Levaopolo Talatonu: Lau Afioga i le Fofoga Fetalai, ona o lea ua saunoa mai le sui usufono mamalu i le uafu. O lau fesili atu lava i lau Afioga po o toe aoga lena uafu? Le uafu lena po o i ai se aoga i lou Itumalo ae pe toafia foi ni tagata o lou Itumalo o lo o faigaluega ai?

Afioga TAFUA MALUELUE TAFUA: E tele le aoga o le uafu. O le aoga muamua lau Afioga, e toeaiina loa ma olomatutua vaa foi nei sa faaoga e Samoa i le va o iinei ma Tutuila po o le va o Savaii ma Upolu ona avatu loa lea e penisione atu i tua i lo matou uafu ma taula ai, o le vaega tonu lena.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, afai e le fiafia i ai le sui usufono mo Aleipata Itupa i Lalo ona avatu lea i Lepa le uafu. O ituaiga mea faapea aemaise o mea o lo o taumafai le Malo e atiae, o le mea sao le mea lena, afai loa e pisa soo Aleipata ona aveese mai loa lea o le uafu.

Afioga TAFUA MALUELUE TAFUA: Malie lau Afioga sei mau mai le toovae o lea e le uma atu le tala e uiga i le uafu e tusa ai o le fesili a le sui usufono. O le mea moni lava e aoga le uafu ae ona pau lava lea o le faitioga e avatu ua se taimata foi i tagata o lo matou Itumalo le o atu ma vaai i nei vaa.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Ona pau o le mea, ou te ofo foi i le sui usufono o lo o saunoa nei, ao vaa ia sa felauai ai nei e le o ni vaa penisione, se o le mea lena e iloa ai le le mafaufau.

Afioga TAFUA MALUELUE TAFUA: Faafetai i lau Afioga...

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama i le uafu lea.

FOFOGA FETALAI: Ou te le talia lau faamalamalamaga. E leai se mea o le a e faamalamalamaina ai fua o le la e saunoa le sui usufono. Tulai mai le sui usufono mo Aleipata Itupa i Lalo. Malie le Taitai o le Itu Agai.

Malie se i tuu atu le avanoa i le Minisita mo Galuega, Felauaiga ma Atinae Eseese.

Afioga Hon Manualesagalala Mati Tuigamala Enokati Posala: O le tatou uafu i Satitoa o lo o faaogaina, afai e silasila ane o lo o i ai vaa e tele le galuega a le tatou uafu toso vaa la ua faatino ua le misi vaa la e i ai, o lona uiga afai ua tutu vaa o le la ua faatalitali avanoa ua tataua ona toso ai ma faaleleia. O le vaiaso nei foi na maua ai ua talia le faiga o le repairs and maintenance o le vaa a Police Petrol Boat lea ua i ai e fai mai e Ausetalia, o la ua tapena ai tua e faaavanoa mo le vaa lea. O le tasi lea o vaa a le Matagaluega o Leoleo sa tilotilo i ai le Ofisa a Ausetalia e aumai ai ma vaa o Tonga ma isi vaa mo le latou polokalame lea e i ai e aumai e faaoga e fai i i. O lea ua talia le vaa o le Patrol Boat a le Ofisa o Leoleo, o lona uiga ua i ai foi le fuafuaga e faaogaina ai ma na vaa. E taua tele le tatou uafu i Satitoa ma o lo o faaogaina pea. Ona pau lava le mea lea e tau fetuunai ona o le vaa lea o le Lady Naomi e alu i Tutuila e tele ina alu i fafo, e alu i Cook Island,

alu i Toelau e pisi faapena, ae a sau e taunuu mai le uafu lea i gatai e faigofie ma alu ai ana malaga i Tutuila. O le faaaogaina o le tatou uafu i Satitua ua tele le suiga ua i ai, e le na o le uafu ae ua i ai ma le uafu toso vaa, o le mea sili lea ma taua. O le sau foi o vaa i le tatou transit o i lava lea ua agai mai ai le latou vaai mo a latou vaa o lo o faaaogaina i vaa fagota. O le tele lena ma taua ona ua i ai se mea ua mafai ona tatou tua i ai ma faaaogaina. A o lafoga lava nei na fai mai lava ae leai lava ma se isi mea o agai e tilotilo i ai ae na o le agai mai lava e faitio. A silasila i le tele o le eseese ma taua leaga o le Faalapotopotoga o Vaa a Samoa o lo o mafai ona tilotilo mai ai le Pasefika lena, o lo o tilotilo mai i le faaaogaina o vaa ma ua oo foi i ai le auunaga, o tulaga uma na, o mea sili ia e tataua ona tatou fiafia ai. O Asau o fuafuaga mamao a le Malo, o le la e tutu le uafu ao le a lava le taimi e manaomia ai e mafai lava ona faaaoga. E le na o le tasi se itu e vaavaai i ai le Malo ma mea e faatino, o Sasae, Sisifo, Matu, Saute. Ma le agaga faaaloalo.

Afioga TAFUA MALUELUE TAFUA: Faafetai atu i lau Afioga i le Minisita faapea foi lau Afioga i le Palemia, e faamalulu atu foi pe afai ua le ogatasi le futia ma le umele ia la outou faafoga ona ua vavevave le tali i le fesili a le Itu Agai ae faamalulu atu foi i lea tulaga pe afai ua...

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, ua tele taimi ou te talanoa ai i le uafu lea. O le uafu lea e le i amata mea ai le Malo, na amata mea ai Satitua Aleipata, o le ala foi lea na filifili ai lea vaega eleele mai lava i le taimi o Tupua na amata ai le uafu lena. Ma o le agai i luma po o le isi selau tausaga o lumanai e le mafai ona aveesea le mea lena. O points ia e aupito sili ona vavalalata Samoa i Sisifo ma Samoa i Sasae, o le tupu pea o femalagaiga i le va o Malo nei e lua e le mafai ona taofia. O Malo uma o le Lalolagi e tupu i le tulaga o feafaatauaiga ma femalagaiga, o le mea la lea, o so o se isi lava na te faitioina le uafu lena o lona uiga e gata mai lava i le muaisu le mamao o le vaai. E te vaai mamao agai i luma, o le ala foi lena e ala ai ona tu le uafu o femalagaiga i le va o Salelologa ma Mulifanua, o vaega ia e aupito lalata ma aupito taugofie ai felauaiga. O se mea faavalevalea tele le tu o le uafu i Salelologa ae aumai le vaa e fesootai ai e ave e tu i Lefaga, e mamao, a o mea e aupito sili ona vavalalata, lau Afioga i le Fofoga Fetalai, o le mea lena e aupito sili ona le tele se tupe e alu ai, ao le atinae o oga eleele nei e le mafai ona taomia i lalo leaga o le tulaga lena o le soifuaga lea tatou te i ai, e tupu pea e le mafai ona taofia i lalo. E tupu pea i luga femalagaiga i le va o Malo nei e lua ma le taumafaiga o exports e ave i Pagopago.

Lau Afioga i le Fofoga Fetalai, e faapena le faiga o mea, e amatamata laitiiti ona tuputupu lea ina avea ma mea tele. O lea la e faitio i le taimi lena o lona uiga e leai lava ma se manatu mamao, pau lava le mea la e vaai i ai o le vaai i ai mo le Palota, ao le mea lea e vaai i ai le Malo, e vaai i auga tupulaga e selau ma selau o le lumanai. Lau Afioga i le Fofoga Fetalai, e matua malamalama lelei mafauaiga o lea e fausia ai mea tetele nei mo le atinae o Samoa mo le lumanai.

Afioga Hon Palusalua Faapo II: Lau Afioga i le Fofoga Fetalai o se mea e fia faamalalama. E sao lelei lava le saunoaga a le Afioga i le Palemia, ao

le mea lea ou te tulai atu ai o le taugata i le taimi lenei. E taugata ae leai ni mea o faia ai, o le upu moni lava lenei e leai ni mea o faia ai.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, faatoa uma nei lava ona saunoa le Minisita i galuega o lo o faia ai. Se sao lava e fai taliga ae le faalogo.

FOFOGA FETALAI: Ou te manatu ua manino ma ua saunoa le Minisita i nisi o itu taua ua faatulaga mo le mea toso vaa ma le tatou uafu. O lea ua matau atu le sui usufono mo Aleipata Itupa i Lalo, e manaia le faasolo i luma o le tatou lauga ona faamaea mai ai lea. Tulai mai le sui usufono.

Afioga TAFUA MALUELUE TAFUA: Ua tau mou foi manatu i le mamafa o nei mea ua tuu mai ia te au ae ui o lea faafetai.

Lau Afioga i le Minisita e ana pou moli faamolemole i le tatou vaega lea o le CSO, ou te talosaga atu ma lou agaga faaaloalo i lau Afioga ona o lo o faia se atinae a se taulealea e igoa ia Paul Stevenson o Mea Tau Turisi, o lo o fai lona Faletalimalo i le va o Amaile lalo laitiiti atu o Amaile masalo po o le selau maila. Ou te talosaga atu ma le faaaloalo pe maua sina vaega mai le CSO i ni nai poumoli e faaau atu ai le eletise i lea Faletalimalo, e talosaga atu ai ma le faaaloalo pea talafeagai ai ma lou finagalo.

Afioga Hon Manualesagalala Mati Tuigamala Enokati Posala: Lau Afioga i le Fofoga Fetalai, o le tasi lea mataupu e tatau ona ou faamalamalama aua e tele lava ina nunumi i le faaaogaina o le community service obligations lea e i ai nei. O le tulaga tau eletise e agai lava i le Faalapotopotoga ma talosaga i ai, ona o atu lea o le Faalapotopotoga e fai le latou asiasiga ma fai le latou cost assessment, ona aumai ai lea aua o lo o i ai le Komiti e Taitaifono ai le Afioga i le Palemia o le Minisita o Tupe, ma Au nei, EPC ma le Matagaluega o Tupe, ona aumai lea pe fia ni poumoli e tatau ona fai, ao le a le tau? O mea uma ia e aumai ona pasia lea i totonu, ae le mafai ona aumai i se auala foi lea a tatou mataupu nei. E tatau lava ona auala i ala o mea e i ai tagata faapitoa e o fai le asiasiga ma vaavaai i ai ona fai lea o le latou lipoti e tuuina mai i lalo o le polokalame lenei o le CSO. E faigofie lena i lo le aumai i nei, ae le malamalama ai, leaga e le na o sui usufono o saunoa, ae pei o le vaavaai lena i ai. E oo foi la i moli nei o street lights, e faapena foi ona aumai le talosaga o atu le Faalapotopotoga e o e vaai pe o se talosaga talafeagai pe o se togavao le mea lea e i ai a o lea e talosaga mai. Ona faapena foi lea ona tuuina mai le latou Lipoti i totonu o le Komiti ma talia ai ina ia mautinoa o la e talafeagai ma tulaga e tatau ona ave i ai le fesoasoani. Ma lou faaaloalo.

FOFOGA FETALAI: Malo. Tulai mai lau Afioga i le Sui Taitaifono o le Komiti.

Afioga TAFUA MALUELUE TAFUA: Faafetai i lau Afioga i le Minisita mo le faamalamalama o lea vaega. Ua ala ona ou laga lenei mataupu i le Fonotaga, ona sa ou faapea e aumai muamua se faamalamalama i lau Afioga ae faafetai o lea ua malamalama atu.

O le isi au talosaga ma lou faaaloalo i lau Afioga, o moli auala mo le auala fou lea faatoa uma nei talu ai ona e le i toatele ni aiga ua nofoia le auala lea, ae mo le lumanai, a lava le faasoa i se taimi o i luma, ia silasila ane i ni moli auala mo le tatou auala lea. Ma le faaaloalo lava. E le gata i lea, e faapena foi ma auala o le faleaoga i Satitua ma Saleaamua. Ailoga e atoa se afa mita o le auala o Satitua, ae o Saleaamua e le atoa se 200 mita pe a. Ma le faaaloalo.

Ona ou oo mai lea i le vaega tolu o le tuualalo, o le vaega lea o le tuualalo i le tatou Malo, ia faataatia ane i autafa o le Minisita. O le tuualalo lava foi po o se fautuaga, talu ai o tatou e maua mai le tatou \$370miliona mai le Pulega o Tagata Asiasi Maimoa mai Fafu, ia o lea ou te talosaga atu pea po o leoleo po o ai e faatinoina le tulaga lea E pei o le isi lea mea ou te vaai i ai o le lelei ia o tatou konekarate lea e moaina ma faamama autafa o le auala, ae ese le mataga pe a uma nei ona moa ma teuteu le auala ae o atu oka le mea o le ipu paepae plastic ma paper cups ma fagu plastics la e taatitia i autafa o le auala ma atigiapa foi nei alimini. Ou te masalo a fai se tatou drive foi lea, faapea o le tagata na te lipotia maia le taavale e faaotaota i le aualatele e maua ai le 50% o le instant fine po o se sala foi lea e le gata ina maua ai tupe a le Malo, ae totogi ai ma le tagata lea e lipoti maia le tagata o lo o faaotaota i autafa o le auala. Atonu tasi lea auala e maua ai sina tupe a le Malo ae tau faaititia ai foi le faaotaota o tagata i le auala. Aua e fai lava lau tala o matou i Lemafa, o le toatele ia o tagata ua o togi le otaota, tulou, i autafa o le auala, aemaise nai vaivao na e leai se isi e iloa atu.

E le gata i lea o le tuualalo atu i lau Afioga i le Minisita mo Faatoaga i tatou vailaau foi nei e aumai, po o i ai se fuafuaga mamao a lau Afioga ma le Matagaluega, e tau faaititia le aumai o vailaau nei, e le gata ina aafia ai le tatou water source, ae atonu foi e i ai ni mai e maua mai ai aua e mautinoa e i ai ni faamai e tutupu mai le vaega lea. Ma le faaaloalo lava.

E faafetai atu i le Matagaluega mo le Siosiomaga i le tatou atinae o lo o taumafai i le alavai lea e sau i Vaisigano. Sa lauga foi sui usufono o Vaimauga, e aafia uma lava o matou aiga o lo o nonofo i Matautu, Vaiala ma Moataa, aua a le lelei ona fuafua le mea lea, faafetai o lea ua oo i ai le fuafuaga a le Malo. Sa ou asiasi i faleoloa i lalo mai o Vaisigano e siaki le lisi o le tau o oloa, o la e faafofoga mai le Afioga i le Sui Palemia. Out e alu atu e lua lisi la e i ai, o le lisi paepae o Ianuari i le tausaga nei ma le lisi piniki o le 2015 la e tusi ai. Na ona tuualalo atu ma le faaaloalo, e manuia pe a tasi lava le lisi ia silafia ai e le au faatau po o fea le lisi la e current.

O le isi vaega, o le vaega lava lea o Tagata Asiasi Maimoa Mai Fafu ma le faaaloalo lava, o la e lava e pei e faataligatuli i latou i talosaga e avatu i tafaala e sau mai le auala savali foi lenei i luga o le footpath, e sau mai le Vaisigano agai i le Fisheries, le Ofisa o Faigafaiva, o la e lava e i ai grills masalo po ua aveese e nisi po ua faaleaga e nisi, e fai lava si faaletonu mo le saogalemu o tagata savavali. E le gata i lea, e tasi lava se tagata maumea e sau i se wheel chair mai se meli ae goto a i iina. E tasi lena mea e ono alu ai tupe a le Malo ae le o wheel chair footage foi luma o le Blue Sky atoa ai ma Mulivai ma isi lava auala o le Malo i lau tilotilo, e avatu paipa poloka ai, ae tele lava le faaletonu la e i ai. E le gata i lea sa ou lauga i luma o le Development Bank lea e faafesagai ma le mall fou lea faatoa uma, lea na ou faalogo ai sa lavea ai le tagata i le taavale i ina. Sa ou talosagaina le over bridge, ona sa ma talanoa ma se tasi o Ofisa sili o Pulega, sa faapea mai e le lava le va e faatu ai se over bridge i le va o fale ia, ae atonu lava e maua se

avanoa i nisi ogaala o Apia e fuafua ai lea vaega. E mautinoa lava o le tupe e faaalu ai, ae taua lea mo le soifua o tagata.

O le mea mulimuli lau Afioga ma le agaga faaaloalo, o le isi vaega o faailoilo foi nei o faleaiga sa ou taua foi. O lea lava e faaagaaga mo tatou tagata asiasi maimoa mai fafo. E tatau lava ona i ai asiasiga a le Soifua Maloloina po o ai uma e aafia i le vaega lea i le asiasiga o meataumafa ma fai spot checks ona fai lea categorize ai faleaiga A, B, C, e faigofie foi i tagata ona o atu e vaai, o le faleoloa lava e i ai le A po o le B, o le faleaiga foi lena e tumu i le tele o afaifi. O le a fiafia foi i ai le atunuu ae le gata i lea o tagata mai fafo, i le attract maiga o tatou tagata tafafao maimoa mai fafo.

O le isi vaega ou te tuualalo atu ma le faaaloalo, faafetai lava i lau Afioga i le Minisita mo Aoga, Taaloga ma Aganuu, o le taua ia o le tauvaga lea e faia i le faaiuga o le masina nei, lea e taua o le fagufagu i le aganuu, tauvaga a kolisi. O le matua manaia lava o lea fuafuaga, e momoli atu ai le faamalo ma le faafetai aua ua viia lava lea vaega talu ai e aoga mo le lumanai aoga mo le fanau.

E i ai le falesa lea e i Taufusi toeitiiti lava uma, ou te fesiligia lava pe na faapefea ona fai lenei fale e aunoa ma se home car park, a o le tele ia o le... Silasila i le falesa lea e i Mulivai ma Matafele la e i ai le car park ua uma ona provide mo... Ou te fesiligia la pe faapefea ona faataga laisene e fai ai nei fale tetele faapenei ae leai se car park e tasi o i ai. Afai o tua, e le o lava foi lava. O lea e i ai se tatou benchmark e faailoa a fia nofoa o le falesa e fuafua i ai car park o taavale.

O le isi talosaga ma le faaaloalo o le polokalame lava lea mo le faaleleia o fale o le Malo, e pei ona sa taua e se tasi o sui usufono, o le TATTE, o le Fiamē, o le Development Bank, Court House, Palemene ma isi lava mau fale o le Malo po o le falemai foi pei ona taua e se tasi o sui usufono i le taimi ua tuanai. E tatau lava ona i ai setatou polokalame mo le faaleleia o nei fale, po o se maintenance programme mo le faaleleia o fale nei e toe maintain ai ma toe faaleleia ai. E talosaga atu ai o le tasi lea o vaega taua e tatau ona silasila i ai mo le lumanai.

E faaiu atu ai se tala i le tatou marine cable lea faapea e oso mai Fiti i inei, ia, e momoli atu ai foi le agaga faafetai i le Minisita i le vaega lea. Na pau lava le tuualalo, talosia ia aumai le TV i inei, ia aumai foi ma le latou TV i tua, lea foi na o atu le vaega a le Regulator talosaga ae na ona faataatia atu i se taimi o i luma. Ma le agaga faaaloalo lava.

Ia, le tapuaiga a lo tatou itumalo, o le tatou lauga lena, afai foi e paopapa le faafofogaaga a le Palemene nei po o le paia o Samoa o faafofoga mai, e faamalulu atu, e poto lava le tautai ae sese lana ia, e leai se tagata e atoatoa. Ia e faapena lava le soifuaga lea tatou te i ai.

Le paia e o si ou itumalo i le Alaalamalae faapea foi le Alii o le Itu ma le Tane o le Itu, Pule na Taitai ma le mamalu ia Saleaamua, ia o le agaga lena, talosia ia leai se tatou palota. Ia manuia lenei aso. Soifua.

FOFOGA FETALAI: Malo faafetai saunoa i lau Afioga i le Sui Taitaifono o le Komiti lau Afioga i le Tuiatua Faanofonofu, malo saunoa.

Ua tatou taunuu i le tatou malologa masani, ona ou manatu lea ua tatau foi ona vavae foe, o le a faia se tatou malologa ona tatou faaauau ai lea pe a toe taliu mai. A tatou taliu mai, out e manatu lea Itu o le Maota, o lea ua maea mai lea pito. Ia, Leaupepe ma le Afioga a Faumuina ma Lealailepule ma

Afualo. Masalo na o le pau lea o tootoo e fia faataunuu nei pe a tatou taliu mai i le malologa.

Na faataatiaese Taualumaga a le Fono Aoa mo lana malologa i le itula e 4:48 i le aoauli ma toe faaauau i le itula e 5:21 i le afiafi.

FOFOGA FETALAI: E momoli atu le faafetai ma le faamalo i lenei itula o le afiafi, e manatu o lea ua tatou toe taunuu ma ii le faaauauina o le tatou galuega, ma e maitau foi ma le totoa ua toe o se aga ona tatou taunuu lea i le taunuuga o le faaumaina o saunoaga a sui usufono mamalu, ae ua ou manatu e le tatau ona tatou faagasolo pea i tulaga e tatau ona e manatu e tatau ona faamaea nei saunoaga uma, ona ave lea o le taeao aena e faamaea ai le tatou Malo, ona tatou malolo ai lea. O lau lea talosaga i le tatou Maota i sui usufono e le i saunoa, ia outou alofagia e le o se agaga e faapea e tulituliaupu o outou finagalo ona o le faataua lo tatou taimi. E silafia foi e i ai nisi e nofo a e olo i le faamoemoe o le tapenaga a le tatou Palemene aemaise le tatou Kapeneta ma le paia o lenei Maota Fono.

Ou te tapa lau Afioga i le Palemia mo le lafo a o le i tuuina atu le avanoa mo se isi sui usufono.

LAFO MO LE FAAAUAUINA O ITULA FONO

Susuga Hon TUILAEPA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai, ou te tulai atu e faatu le lafo, *Ina ia faaauau galuega a le tatou Fono seia aulia le itula e 11:00 i le po nei ona tatou malolo ai lea.*

Faaluaina e le Sui Palemia.

Na faamaonia le lafo.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopopo (Nu.2) 2014/2015 & Tulafono Tau Faaofi o le Faatatauina o Tupe 2015/2016.

FOFOGA FETALAI: Ia, tulai maia lau Afioga Leaupepe o oe foi o le Toe Ulutaia o le tatou Palemene nei, o lau Afioga foi i le Taitaifono o le Komiti Eeseese, ua maua le avanoa mo lau saunoaga.

Afioga Hon LEAUPEPE TOLEAFOA APULU FAAFISI (Aana Alofi Nu.1): Malo faafetai, faafetai atu i lau Afioga i le Fofoga Fetalai i lenei avanoa taua ua mafai ona matou maua. E le umi foi se taimi e fai ai se tala, faafetai i le itumalo i le latou tapuaiga, faapea foi ona faafetaia le Malo e tusa ai o le latou alofaiva ma le aao masui i le fia o Tala o Tupe ua tuanai, i lenei foi Paeiga ua tatou taunuu i ai i le Tala o le Tupe mulimuli o le tatou Paeiga. O se taimi ona oo mai lea o se leo e tusa ai o le Tala o le Tupe, ae faafeiloai atu ma le faaaloalo i le faafofoga mai a le itumalo, e le vaea le

tulaga o le tatou mafutaga i Aiga e Tolu faapea foi le Faletolu ma Fuaifale, faapea foi le Tamaaitu ma le Maugafa ma Alo o Tamaalelagi aua Faleasiu. O se taimi o lo o muamua i lena tausaga fou ona faapena foi lea ona see atu, o faiva alofilima ua vaelua ai le tatou itumalo, ia o le mea lava e tasi. E tofi Faleasiu, e tofi foi Fasitoota. O itu maualuga ia e le tau faia ai se faamatalaga, e lagona ai le agaga faafetai ma le faamalo i tuua ua faailagi le latou folauga ma le latou foi sailimalo ua mafai ai ona taunuu le tatou itumalo i se tulaga maualuga faapea pei ona i ai lenie vaitaimi.

E ui i lea, e momoli atu le faamalo, Satuala ia Aiono ma Leaupepe, Sua ma Toleafoa ma le Tauso, le mamalu o le Falefitu ma le Igoamatua ia Tauauvea, o paia lava ia e le aveesea e tumau. E lagona le mafanafana o le agaga ona o la outou tapuaiga ua mafai ona lagamalu ai se manatu a o feagai ai ma upufai o Malo e ala i le Nofoa o le tatou itumalo. Ia tapuai maia ma le manuia ae se i taumafai atu se sao o le tatou itumalo.

E avea le leo e manatua ai i lenei taimi Fasitoo-uta e le tau selu atu ina nei te i ua le oo i ai se tala i pau ia te au. Ua mitamita lava le mafaufau ina ua foi atu le galuega ananafi ua uma ona tau fu'a uma lo tatou nuu. O mea ia e le tau fautuaina ae ona o le tofa ae e pei o le tala a le tamaloa Solosolo, e iloga lava le afioaga e teuteuina ma faamatagofie ma manaia i le vaavaai e le gata o teuga, tu ma amioga, e faapena ona tali lumafale, o afioaga na o lo o mapo le tofa ma le faautautaga, e le o tuua ia tama. O le mea lea e le tau laeia pe selu ao le lagona e ao ona momoli atu le agaga faafetai, malo Fasitoo, amata mai i le pule seia oo i le itupa paia i saoa, faletua ma tausi o pule na lua seia oo lava i alo ma fanau, ia aveaveai ai lo outou tautua Malo, o sia tatou tamai sao lena e fesoasoani ai i le Malo e tau mai ai lo tatou tautua Malo. O sao taua ia e faailoa mai ai le lagolago a nuu ma Itumalo i le alofaiva o le Malo i ana fuafuaga alualu mamao ina ia faapena ona manuia ai Samoa. E momoli atu ai le faamalo ma le agaga faafetai, ia aveaveai ai lau masani e le tau fautuaina.

E fai ma sui o le Itumalo e momoli atu ai le faafetai ma le faamalo i le paia o le Kapeneta i lau Afioga i le Palemia ma lou auvaa i lo outou aao masui ma le aao mafola i le atiaeina o Samoa e ala i lo outou faiva alofilima i lea matata ma lea matata e le faigofie le galuega. Sa faapena foi ona matou i ai foi matou i futia ua sola e leai e le maua foi se malologa lelei ona o le manatu ina ia lelei fuafua tapenaga ina ia lelei le faatinoga o tiute ma faiva ua faapena ona aumai ai le faatuatuaga o le atunuu, e le na o le Palemia e aumaia le faatuatuaga ia outou Afioga ao le atunuu lautele ina ia lelei ma mapo ma aanoa mea uma e faapena ona outou alofaiva i ai. E tatau la ona matou faafetai atu ai aua o matou nei ua na o le tagi lava e faasoa atu manao ma lagona i mea o loo moomia ai le fesoasoani e le Itumalo ma nai nuu ae tainane nai aiga taitoatasi o loo faapena lava ona sulu atu ia te outou aua o lo outou faiva alofilima i la outou faasoaso ma le lufilufi ina ia aua nei faapitoa manu ia tasi a ia lelei lautele le atunuu e tusa ai o le finagalo o le Atua. Ou te manatu e le umi se tautalaga aua o mea lava sa saunoa ai nisi o sui usufono o lenei Palemene e faapena foi ona tiu ma afifi i o matou foi lagona, ae ina nei o matou le tulai e faaleo le agaga faafetai i lau Afioga i le Palemia ma le paia o le Kapneta ona molia lea i le malu o le tai taeao ma outou faapea ane a mea o i ai se mea ua mafua ai ona matou le tutulai atu, ao le agaga faamalo ma le agaga faafetai ia faapena ona faamanuia le Atua i o outou faiva alofilima.

Ona pau lava o lea ao faafofoga mai lou Itumalo, masalo e le tau avatua aua o le faamuamua lava e ave i le mea e tatau ona ave i ai le faamuamua, ma e

fua foi e tusa o le feau taua ua tatou maua i lenei aso. O le feau taua ina ia fua le manao i seleni e maua, ae toe lava o le vai lea e vili atu i Faleasiu ma toso atu ai loa i Fasitoo e taumamafa ai Lepale, na ona faamanatu atu ae ou te manatu ua galueaina ae leaga e le maua ia tatou i Samoa nei ni paipa ma ni mea faapena e fetai ai le suavai, atonu o se taimi taunuu mai ona silasila foi lea ma vaavaai ai le Itumalo o Faleasiu ma Fasitoo , e toso atu ma faatino le tulaga o le suavai taumafa, ona o se mea e lelei i le taulaga e faapena foi ona lelei ia tatou o lo o mamao i tua. Ona pau ia o nai mea e faamanatu atu e fua lava i le taimi ma nai seleni e mafai ona maua aua e fai foi o le manao ae ave le faamuamua i le mea e aupito sili ma tatau ona faamuamua.

Na o sina upu laitiiti lava e tusa ai o le maa faafuagalu lea na faataoto e le Taitai o le Malo e tusa ai o le feau lea na faaauuala mai i le Tulafono Tau Faaofi o le Faatatauina o Tupe 2015/2016, “Ia fuafua le manao i seleni e mafai ona maua”. Ua ou manatu foi lele aua e le o se faifeau ma ou te le faafulu foi i le toeaina po o le Afioga i le Palemia, leaga e i ai le upu e fai i Fasitoo, ‘e le faamimitaina e le isi Fasitoo le isi Fasitoo, o upu na o le matou nuu. E ala ona ou fiafia e fai sina au tala i lea upu ona e taua, e le na o le Tala o le Tupe e aoga i ai lea upu “fua le manao i seleni ua maua” e fua foi i le tausiga o aiga i soo se mea lava. E fua foi i Ekalesia, e fua i le tagata faigaluega, e fua foi ia ta ita ma lau ava ma lau fanau tulou le faafofoga a Samoa. O mea na, o le la e tumutumu le toese ona o le le lelei o le faaaogaina o le faaupuga lea. O le faaupuga lea ou te taua e au o le ‘maa faafuagalu. O se maa faafuagalu e anoa ma tupu ma ai mea lelei pe a lelei ona tatou faaaogaina ma le tatau lenei faaupuga ia fua le manao i seleni ua maua. O le mea lena ua tele ina falepuipui ai alo ma fanau a le atunuu, e tiga ona iloa na o le \$300 i le vaiaso ae manao lava e faaaoga le \$500 i le vaiaso. O le faaiuga o na mea ma le iuga o ona fuafuaga uma, o le alu i uta i le toese, e le mafua mai la o fanau ae mafua ona o matua. E oo foi i lenei mea e vevesi ai ma faapea ua faigata ona sue se fofo o tamaiti e le o i aoga, o le lumanai lea o le atunuu o alo ma fanau, e mafua mai i, o le ala lena ou te taua e au o se feau taua ona o lea ua aumai faatasi ma le Tulafono Tau Faaofi o le Faatatauina o Tupe 2015/2016, o se maa faafuagalu e tutupu ai mea lelei pea faaaoga tatau e le atunuu, aua a faasaga lelei atinae a le Malo ua taoto lelei ana atinae, aua e tatau ona atinae le atunuu i taimi e maua ai le avanoa e atinae ai, ae a taoto lelei ma ua faasaga lelei atinae mai lea taimi i lea taimi ona tatou o loa lea i le tulaga lea, o le fua o le manao i seleni ua mafai ona maua. Ae le taofia ai le faamuamua i le mea aupito sili ona manaomia ai le faamuamua, o le matou lea talitonuga.

Ou te avea foi lenei avanoa e momoli atu ai le faafetai tele i lau Afioga i le Fofoga Fetalai, malo toa, malo le tofa, ou te le tau selu atu leaga o lou tuua o le Toeaina o Toeaina iinei le Palemene, pau se toa toe tu se toa, sosoo le fau ma le fau, pau lava lena o le tofi Fofoga Fetalai e le i oo i ai lou tuua, ao tofi uma lava o le Malo ua oo i ai. O lea ua e tulai mai o le tofa faamanuia lena a le Atua i lau Afioga, o la matou foi lea tatalo, Laaulialemalietoa ia maua le tofa mai le Atua. E faapena foi i le paia o le tatou Palemene, le Failautusi, Sui Failautusi aemaise o Ofisa Sili o Pulega ma Faalapotopotoga a le Malo, e a matou nei ao outou taeao, o le ala i le pule o le tautua. Ia faamanuia le Atua i lenei Palemene, manuia le tatou Fonotaga, manuia foi le tamaloa Fasitoo. Faafetai.

FOFOGA FETALAI: Malo faafetai saunoa i le sui usufono mo Aana Alofi Nu. 1, e lagona foi ma le loto maualalo i tuleiga ma saunoaga o lenei aso. O oe foi o se tasi o toe ulutaia o le tatou Maota, faamalo fetalai, malo malele i lenei vaega o le aso, foi ia i le Atua lona viiga, o le a se auaunaga ua tau lelei i le faafofoga a le atunuu aemaise foi o se matau a lau Afioga sa e seei foi i le Nofoa, ia aua lava nei ia te i tatou a ia viia le Alii ma faaaogaina pea o tatou tagata ma le loto maualalo ma fai ai i tatou ma meafaigaluega a le atunuu a ia maua ai se viiga sili o le Atua.

Ia se tasi o sui usufono mo Salega, Afioga Afualo Wood Utu Salele, tulai mai o lea ua faasolo mai le tatou Komiti ona faasolo atu ai lea i le sui usufono mo Vaimauga Sisifo ma le sui usufono mo Paluli le Falefa. Tula i mai le sui mamalu o se tasi o sui o Salega o lo oulua sa seelua ma le tapuaiga i le Susuga i le faafeagaiga ia Tapuai, o lea o le a saunoa le sui usufono.

Afioga AFUALO WOOD UTU SALELE (Salega): Faafetai atu i lau Afioga i le Fofoga Fetalai mo le avanoa taua, o se taimi ona oo lea o se faafetai i le tapuaiga mamalu a le atunuu. Ae fai mai a toso le fala o faleupolu e tuutuulima le vai o Liavaa ae taialalo foi le ia a Sa Saumani. O le upu i le matamatagi, a togi le pa e au lava ina tau i le maaveave. O le aso ma le filiga o le aso foi ma le mataigatia, ao lea foi ua lupepe le taumanu ula, ao le tautai lava matapalapala e muamua lava ona atu e, e faailo le atu mua, o le atu lea e momoli ai le loto faafetai ma le viiga. O le mea lea i lau Afioga i le Fofoga Fetalai, i le tapuaiga mamalu a Lana Afioga Mamalu O Le Ao o le Malo ma le Masiofo aemaise o le Sui o le Fono a Sui Tofia ma le Masiofo.

Lau Afioga i le Palemia ma le Kapeneta ma lena Itu, lau Afioga i le Taitai ma le Sui Taitai aemaise o lenei itu o le Maota aemaise lava o le faafofoga tapuai o le Afioga i le Faamasino ma le Aiga Faamasinoga. O se taimi ona oo lea o sau tala i lou Itumalo o lo o taputapuai mai, Samoa o ou paia mai le matasaua seia oo i ona tuluiga, e le toe oo i ai sau faamatalaga ua taoto foi a o se ala oo. E ao pea ona ou faafetaia le tapuaiga a lou Itumalo pele o Salega ae muliai sau faafetai i le aufaigaluega paia a le Atua o lo o latou asuina le ipuvai o le ola aemaise o le galuega ua vaalua ai Tumua ma Pule ona o le Afioga Paia a le Atua.

O paia lava ia o Salega ona o lea ua ite nei le fanua-a-lalo ia ua sina foi le galu, o lea ua taoto le amoa ua to le finagalo o le tatou Malo, ia faafetai foi, o lea ua vaelua lo tatou itumalo, ia o se fuafuaga foi e lelei mo le lumanai i le agai i luma, aemaise foi mo e o lo o tausinio mai mo le Palemene nei.

Ae lau Afioga i le Fofoga Fetalai, ona e ao ai pea ona ou faapai isi ou itumalo i le paia o Tapapa ma Matailiili, o le afio lava lea i Alo o Lilomaiava, Seve ma Faga, ia ma tama faamau, ia susu foi ia Tuimauga ma le aiga Sa Tuimauga, alaalatai Sa Soa ma le mamalu i le aiga Sa Soa. O le malae o Tapapa ma Matailiili ia e agai ifo lava, o le malaefono e afio ai le afioga o le Sao ia Toomata ma le Toafa o ou Alo, ae tainane le alaalatai o le mamalu ia Sa Leutogipoe na limamatua i ai Tofiga. Alaalatai foi le toatolu o alii, aemaise Sa Leutogi o latou nei o lo o papaaao i malae e fia, ae tainane le afio o Afualo ma le Toafa o ona Alo, alaalatai Faimanu o le Fofoga o Leusoalii ma le mamalu o le Alataua o lo o pola puipui latou i le Malaeolema, ae tainane le afio o Fualau ma le aigaalii, lau afioga Fepuleai, afio mai Tilafono, Faavaoga ma Tama, alaalatai lau fetalai Tuisalega, na aliitai oe e pule foi oe i lou itu.

E tatau foi ona ou faapai atu i le Malaefono o Siimalae ma Vaipua, i le afio o aiga Samoeleoi susu le Alaalamaota, alaalatai sa Utuvai ma upu ia te oe le Alataua. O upu i le Malaefono o Fogasavaii o le maota o Tumua, lea e afio ai Alaalagafa o Matau ma le toafa o ou Alo, susu le Matua o Mooui afio le Maopu, ae alaalatai le Fuaiala o.....aemaise lau fetalaiga mau le Taupoloalii.

Ona muliai laia o sau faamatalaga ia Sagone, aemaise le paia o ou malae o Fetoloai ma Vaimoliai, o lo o afio ai le aiga o Samoeleoi, Tapuai ma Luagalau, afio le Alo o Lilomaiava, afio mai le Maopu, susu mai le Matua, alaalatai le Falesefulu o Leatitogia ma le mamalu o le Alataua. Ia o ou paia ia Salega, o ou paia ia ta te faamemelo ai, ona e faigata le pule ua e to mo au ma si ou uso ia Tapuai ia e taumafai se sao mo lo tatou itumalo, e le gata mo le manuia o le itumalo, a ia faapea foi ona maua se fesoasoani e tuutuu atu i tafatafa o le Palemia ma le Kapeneta, e avagalima ai Samoa i lona sa a o folau i lenei vaitau i le tele o le mau i le lutia i ona faaosoosoga i lenei vaitau.

O le Tala Faatatau o le Tupe o le a mulimuli i ai sau faamatalaga ona o le matou Komiti, o le tele foi lava o lagona ma manatu ua uma ona faaalua o lo o i totonu o le Lipoti, se i vagana ai nisi o lagona e ono faapoopo, ae ao foi ona oo sau faamatalaga e tusa ai foi o le tapuai mai a lou itumalo i galuega ia ua tele ina maea ona faatino i le fa lea o le a uma nei i lenei lima tausaga.

Lau Afioga i le Minisita mo Leoleo ma Falepuipui, ou te masalo ai ua se tai taliga i lau Afioga ona sa oleole atu lava i le pou, a o lea lava o le a uma lenei Paeaiiga ou te masalo ia atonu ia se i faatu ia pe a oo i le isi Paeaiiga, a o lea lava e lava le taimi, o la foi ua uma e i ai fanua o le itumalo e mafai ona faamatu e fesoasoani, ona e fai lava sina mamao, o le pou lata mai la e i ai o lea e i Palauli, o le isi pou o la e i Asau, o lea foi na aumai le aveai a le Ofisa o Faiga Palota, o lea o le a toe faagasolo atu le faagaioiga o isi vaega ia e totoe mo e e faauma ona lesitala, ia na o pou la o leoleo e faaoga, e lua la itumalo tetele lea e i ai i, o Salega ma Palauli Sisifo, ae o le mamao ia o le vaega lea e tau tuli i ai, ae semeamanu ana i ai se pou, ia e faigofie, aemaise o le sagai atu a le tatou atunuu e tusa ai foi o ana faiga filifiliga.

Faafetai mo le galuega i lenei tausaga aemaise foi uaafetai mo le galuega i lenei tausaga aemaise foi ua maea le lima tausaga lea ua tau faauma atu, e tele suiga lelei o le Matagaluega. Na o sina tatalo lava i lau Afioga, e moni o lea ua taoto o lea ua i ai fuafuaga ia le aoga lea e tapena ai ia, se i avane lava lou gutu ma le afi, ia i latou o tamalii ma failauga, ia po o alo foi o le atunuu e fia aveia ma malu o le Malo e faatino ai lo latou auaunaga ona ia vave ona tino mai, o le Police Academy, e moni o lea ua i ai ae na ona toe soso atu lava ina ia mautinoa ua vave faatino, atonu foi o le isi lea laasaga e mafai ona tali atu i le tele o faafitauli lea e feagai nei ma le Matagaluega. Ia talosia ia aua a oo ina tapena maea, ou te masalo lava o vaega uma o totogi ma mea uma, e mafai lava ona fesiitai aua o lea foi o le a lava tapena ma aaoaina lelei ia lo tatou atunuu. O le isi foi vaega e avatu ai le tuualalo, a faapea o le a tapena ia le aoga lea, ia silasila i ai faamolemole, e a pe a avatu uma i ai ma i latou lea e faafaigaluega i isi security guards foi ia, aua o le upu moni lava, e moni o lea e maua ai galuega a le toatele, ae nofo nofo lava le isi vaai atu ua.....ae tatau lava ona tapena lelei lo latou lotoifale, ina ia mautinoa ua lava tapena foi mo le tali atu aua o latou uma nei o lea e nafa lava ma le saogalemu ma le manuia o le toatele o le atunuu, ae aveia ia le avanoa lena i le aoga lea le Academy lea, e ono fesoasoani ai foi e faasafua atu ia le tomai faapitoa lea i

le toatele o le atunuu aemaise foi o le a maua ai ni galuega lelei ma siitia ai le auunaga mo le atunuu.

Lau Afioga i le Minisita mo Galuega, Felauaiga ma Atinae Eeseese, o la e faafofoga mai ia lou nuu o Sagone, faafetai tele lava, atonu foi masalo po o le Aso Tofi lea o le a tatou o atu ai e...e na o sina lagona fiafia lava mo le itumalo aemaise lava Sagone, aua ua leva lava ona tauanau, atonu o lea ua tino mai ma aliali mai ma tupu i le taimi o le ma Paeaiga ma si ou uso a sui usufono, Afioga Tapuai Toese Ah Sam, ae ua leva lava ona taoto mai talosaga a isi foi o maua uso a sui usufono na muamua atu, ae faafetai ua tafa lou finagalo, ia o lea ua maea le auala, ae pau lava lea ia faaauau pea ona ave le vai o Sagone e sue se isi vaega lelei e vili ai, e pei lava ona ou musumusu atu i lau Afioga, o le mai ia o le vai, ae semamanu ona o le magalo o punavai lea e i isi nuu o Salega, pei o i lea ua tau feoloolo ai ona lelei le sua o le vai, ae le o tatau ona oo i se tulaga aemaise lava o i lea e faaoga mai e le maota gasegase.

Lau Afioga i le Minisita mo Aoga, Taaloga ma Aganuu, e faamalo atu lava, o le tele ia o galuega lelei ua...e le tau selu atu, ou te masani lelei foi ia te oe ta te galulue faatasi, faamalo. Ae o le upu moni lava ia pei lava o le tuualalo, se i toe silasila ifo lava i aoga ia i lalo o aoga faavae, e moni o lea ua e amatamea, o lea ua taumafai e aputiputi uma mai ina ia mautinoa, ua malupuipua le aoaoina, aua o le upu moni lava, a lelei ona tapena mai alo ma fanau lea i lalo, ona fesootai mai ai lea ma aoga tulagalua, fesootai ma aoga kolisi, o le fesootaiga lava lena e oo i aoga maualuluga, ona tali mai lea i le tulaga e tatau ona i ai, aua o le taofi lava ia ma le mau fai mai, 'a fana'e le tai o aoaoga, e ao ona siitia ma folau uma sa o alo ma fanau o le atunuu i le ola aoaoina, o lona uiga, o i foi o le a mafai ona tali atu ai lau Matagaluega e tapena alo ma fanau mo le atunuu, ina ia mautinoa ua maua ni a latou galuega anoa, pe faaoga foi le upu faaperetania o le quality employment, e moni lava o lea sa faasea nisi o le tatou Maota i galuega ia tai pei o le fagota i le sami, e moni e tigaina e le faigofie e oo lava i le au tau apu, ae a maea ma tapena lelei, o le toatele foi o alo ma fanau, o le a mafai ona maua le faamanuiaga lea, e le faapea o fanau uma, ae ia toatele alo ma fanau e latou te maua faamanuiaga lea o galuega e anoa, ina ia mautinoa ua laugatasia uma ia le toatele o le atunuu i le manuia lea e tausinio lea e afifi i totonu o le Tala o le Tupe, ina ia maua e Samoa ma ana fanau le manuia lena. Ae faamalo, malo mo le taiala, ae se i silasila ane, pei o le vaega la e taugologolo mai foi, ia pay uma totogi o nai faiaoga o lea e i aoga amata, ae o lena e i ina le uta a le faimea, le uta a le faimea ia mautinoa ua fesootai foi ma i latou i ai i nei lava o totogi ona pei lava o la e totogi i le tele lava o nuu ona pei o la ua silia ma le selau ia aoga nei amata, ia o se fuainumera tele tele, a o lea e le i taitai aua o le toatele o le mamalu o le atunuu, ia e tele foi se sao i le tapenaina o alo ma fanau a lo tatou atunuu.

Lau Afioga i le Minisita mo Faatoaga ma Faigafaiva faafetai, o lea ou te manatua lau lauga i le amataga lava, na ou faatusa ai oe o oe o Mose, ou te le iloa po o e manatua, ae ua moni lava a? e moni lelei le...ona o le lagona sa tupu i le taimi na avatu ai se manatu, a o lea ua tulai mai ua e tali mai, faafetai ua loa lava foi lou soifua o e auuana i le atunuu e ala i le Palemene, ua tele lou sao, ae faamanuia le Atua i fuafuaga uma mo le lumanai.

Ae na o sina vaega lea ona o lea sa ou fesilisili lava, e moni o lea ua siitia, o lena foi vaitau sa i ai le manulauti e tatau ona oo mai ua toe foi i le 20% ia le

sao o le Matagaluega le 20% i le 25% mo le tamaoaiga o le atunuu, ou te talitonu o la ua agai mai i luga, ae ona o lea e le o maua mai se fuainumera, pe na o vaega ia e fesoasoani atu ai, ae faafetai foi. Se i silasila ane lau Afioga ona o lea e feeseeseai po o le a le mea ua feeseeseai ai faapea ia le aufaifaatoaga? E moni e le o i lalo o lau Afioga ia le Farmers Association lea foi ua.....ae o le toatele o le mamalu o le atunuu o tamalii ma failauga, o latou nei o lea e tua i ai lau Afioga aemaise foi o le Palemia ma le Kapeneta ma le mamalu o le Palemene ma le atunuu, ina ia mautinoa ua lava tapena ia le fofoga taumafa lea, ia po o a foi ni toatuga, e tatau ona soalaupule ina ia mautinoa ua agai i luma ma ia maua foi se fealofaniga ma tasi mo le tali mai aemaise o le faamoemoe i tatou oloa ia e auina atu i fafo.

Lau Afioga Tolofuaivalelei ua ou tapa lou suafa, faafetai tele lava i le Tulafono lea atonu o lea e le i oo mai aemaise lava o le faataua o pulega a alii ma faipule, e tele tele le aoga o le Tulafono, a o lau tilotilo i ai, ina ia toe silasila lau Afioga aemaise o le faaogaina o alii ma tamaitai loia a tatou, ona e moni lava ua i ai le fuainumera e tali atu ai, aua o lea e i ai le faamoemoe e tapena ma tusia ia Tulafono a alii ma faipule pei lava o mea masani foi lea i fonu, ia ona aumai laia lea i lau Matagaluega o i lea o le a aumai e faamaonia ai ia ma fuafua ona aumai lea i le Faamasinoga, a o le tuualalo ina ia fesoasoani pe avanoa ia alii ma tamaitai loia lea, aua e ese lava le talanoaina o Tulafono ia a Alii ma Faipule, ese le gagana faa-Loia faa-Tulafono e tusi ai, ina ne i te i la ua tusia mai tua, e tusi mai lava po o ai le failautusi lea e i ai o tamalii ma failauga, ae ia mautinoa ua sagatonu ma taoto ia le agaga o le Tulafono e faigofie ai foi, aua a fai ni a latou faaiuga, a o molimau ia, o faaiuga ia, e le tatau foi la ona sala ese ai ni a latou faaiuga lea e masani ona upuia ai le tele o alii ma faipule, a o lea ua taoto tonu i i ina ia mafai ona fesoasoani i ai le galuega faa-loia ia taoto tonu le tulafono.

Ma le vaega i lau Afioga, faamalo o lea faatoa amata, o lea e faatoa e tulai mai a o lea ua aumai le tupe mama a le Samoa Land. Faamalo. Ou te talitonu lava o lou uunaia lea ua tali mai ai. A o lau fautuaga ina ia mautinoa tonu e isi Matagaluega tumaoti a le Malo, faafetai tele lava, aua o lea ua maua i isi taimi, o le Tala Faatatau o le Tupe lava ia, e fua le manao i mea ua maua aemaise foi o le tupe lea ua mafai ona maua, o lea ua aga tonu lava, ae afai e tusa ai ma le fuafuaga a le Afioga i le Palemia ma lau Afioga, ou te lagona e gafatia lava e isi manao ia ua le mafai ona fai, ona o le tulaga lea, ae faafetai o la e ua i ai le vaega e agai i ai. A leai sau fautuaga i le Minisita, o lona uiga o la e lava e atoatoa ma lelei ma vaavaai i ai.

Lau afioga i le Minisita o Tupe Maua, sa ou tilotilo lava ma le totoa po o a nisi vaega e ono maua ai ni au tupe, ua e gasea foi, aua e oo foi i le Matagaluega ma le aufaigaluega, e le faigofie, e le faigofie. Aua o tatou, na o le fai lava, ae tatou te tua i le mamalu o le atunuu aemaise foi o le galulue faatasi ma i latou o lo o faalototele ma silasila i ai. Ia, sa ou faitau, o lea e i luma ia te au le pepa o lo o tusi i mea ia o lafoga o fanua, masalo o faafofoga mai le Minisita o Tupe, o le land tax. Atonu e le logo malie i isi. Ae ua ou tilotilo atoa i ai i se isi vaega e ono fesoasoani i ai, aua e le faapea... mo le lumanai, e faatupu manatu foi, e aoga foi ina ia mautinoa ua siitia le tele o tupe maua nei ina ia fesoasoani i le tapenaina o le Tala Faatatau o le Tupe.

Ma le vaega mulimuli, lau Afioga i le Minisita mo le soifua maloloina, faafetai tele lava o la e ua fai le falemai faapitoa o fatugao i Savaii. O le tala na matou feiloai ai foi ma le mamalu o le atunuu, o se tala fiafia, aua o le mea

lea sa i ai, sa tele ina autovaa mai, o le tele lava o la e i le lisi faatalitali, ua uma lava le latou soifua i i ae ua le toe foi i Savaii, ae faafetai. O la e ua i ai i Savaii, faapea e toatolu gasegase lae i ai pe a fua i le toatele o gasegase i inei, ae faapea o la e malolosi lava Savaii. Ae faafetai o lea ua e tali atu i lea vaega taua ona o le atunuu.

Ia, ma le vaega mulimuli, lau Afioga Magele, e avatu lava le talosaga, ia se i tautuana se isi vaega o lea o le a uma le Campus lea e i ... a o se nofoaga mo le tatou Iunivesite aemaise lava o i Salelologa la e i ai fanua nei, o le tele ia o fanau a le atunuu lea e omai mai Savaii, o lea e tau sue ni mea e nonofo ai. O le toatele lava o latou ia ua le manuia suega, ona o le faafitauli lea e tupu ae o lena e te silafia atonu foi e te silasila i ai i le lumanai ina ia mautinoa e te tali atu i lea manaoga.

O le faauma atu lena o lau talanoa atu aemaise foi o manaoga o lou itumalo ma le fuafuaga foi mo le faamoemoe.

O le Tala Faatatau o le Tupe, ia, e moni lava e fua le manao i mea ua tatou maua, e moni lelei, live within our needs. A o le fesili lava ia sa ou nofonofo lava ma ou fesili i ai, faafetai lava i lau Afioga i le Palemia le talia i lou loto e fai le faaiuga aua e le faigofie. Pe faapefea ona moni ma faamaoni le Tala faatatau o le Tupe e fua le manao i mea ua maua a o le talitonuga e le o amiotonu? O le fesili lena ou te fesili ai lava ia te au ia, ae ou te faafetaia le tulaga lea ua i ai. Afai foi e fua le peleue ina ia tauleleia, ou te le fia tauamiotonuina. O lou manatu lena o lea sa tuu i lalo. Pe faa-Peretania foi e faigofie ai, how can we live within our needs if it feels rights when it feels wrong? And if living within our means is to seek glorification I don't want to be justified. Faafetai o lea ua taoto o lea ua sao lava le Afioga i le Palemia i le moni a? O le moni lea aua o lea sa saunoa le isi sui usufono, e sao lelei, ua matua mafatia lava i le mea lea e tupu nei, ua le mafai ona totogi aitalafu e \$500pilion. Amuia tatou faafetai o lea ua fai le fofo, faafetai lava i le... E moni lava o le naunau o tatou ina ia fai atinae ma tali atu, aua o le tele lava o saunoaga lea fai mai e matuai fai, ou te matua lagona lava lou faanoanoa foi lea. Aua e le faapea o le a tatou nonofo ai pea i le olaga lenei, tatou te o foi tatou o, ae faafetai o lea ua faataoto le alafua e le Afioga i le Palemia e limataitaiina ai le lumanai ina ia mautinoa lelei, pe fai lava nei nogatupe, ae agai tonu lava i le vaega e tataua ona faamuamua mo le atunuu.

Ia, o lau toe soso atu lea, a o le upu moni lava ia, ina ia mautinoa lelei, o le Tala Faatatau o le Tupe e fua le manao i le mea ua maua, e le gata ina afua ai le le lava o le faasoa mo le taimi lenei o lea ua lava o lea ua fua, ae fai mai, oi o le a tofatumoanaina ai le iuvale o le mativa ma le le tagolima ina ia maua le ola faaeaina, o le ola aoaoina ma le ola faatamaoigaina.

Lau Afioga i le Fofoga Fetalai, o le sao lea o Salega ina ia fesoasoani atu ai i le Tala Faatatau o le Tupe, ina ia mautinoa o le galuega tausoa faatasi a tatou mo le lumanai, ina ia manuia a tatou fanau, manuia le Ekalesia ae maua se viiga o le Atua. Faafetai.

FOFOGA FETALAI: Malo. Faafetai saunoa i lau Afioga Afualo. E manatu e le toe tau faamapueina pe tau selu atu i le tuleiga ma le saunoaga, o lau Afioga foi o se tasi na filifilia aloaia e le tatou Palemene e te auai i le Komiti o Tupe ona o le meaalofa a le Atua i ou aao. O lea ua e talatala faasoa ma talatala faamalamalama i lenei aso i le faafofoga a le Komiti, malo timai, faafetai foi tautua e ala i le tatou savaliga. O le agaga lava lea ma le

faamoemoe, o a tatou nei a o isi taeao. O nei e fau ai manuia mo tupulaga fai mai o le tatou atunuu. E faamalo atu faafetai foi i le sao taua a o alo le tatou Komiti.

Ia, lau Afioga Faumuina Liuga, o se tasi o sui usufono o le Komiti, tulai maia le sui usufono mamalu.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai, faafetai foi i le tapuaiga a lenei Maota mamalu. Faafetai i lau Afioga i le Fofoga Fetalai mo lou lavapapale i le taitaiga o le Fono Aoao a lo tatou atunuu. I le aotelega o ni manatu, o le usugafono a Palauli le Falefa, ou te matua lagolagoina le Tala o le Tupe. O lea faatoa uma nei lava ona saunoa se tasi o sui usufono o le Komiti, o lea foi e tilotilo lava ma vaavaai i vailaina o le saunoaga a le Minisita o Tupe po o le Afioga i le Palemia, ona ou faauigaina lea o le mea lea, fua le manao i le tupe e avatu. E leai leai se mea o ou vaai i ai i i e gata ai le pusaola lea po o le pusaola lea tatou te nonoina mai ai tupe. Lau Afioga i le Fofoga Fetalai, afai lava e te silasila i le saunoaga a le Palemia po o le Minisita o Tupe, e tatau ona toe tepa i tua i tausaga e fa ua maea ona atoatoa lea o le folasaga i le Tala o le Tupe i le tausaga mulimuli o le tatou Paeaiga. o le mea lava e taulai i ai le manatu o lenei usugafono, fai mai le... o le a siitia le tuufaatasiga o le tamaoiga i le 1.9%. Ona toe faapea mai lea, a faaliliu i se isi uiga, o le tausaga faaletupe lea e amata ia Iulai o le tausaga nei, e atoa i ai le \$2pilionia o le tuufaatasiga o le tamaoiga. A fua la i le fuafuaga i le taimi na amata ai ona ou oo mai au i le Palemene, faatoa sili laitiiti lava i le \$1pilionia le tuuaofaiga o le tamaoiga i le 2001. Oo mai i le 2011, ua \$1,500,000,000. O le a le mea lea ua aliali mai i i i i le Tala o le Tupe lea, e \$100miliona le faatupulaia o le tamaoiga i le lima tausaga ua tuanai atu. A fua la i le 15 tausaga lea ua faagasolo nei, ua \$1+pilionia le tupe lea ua faaopoopo i le tamaoiga. O lona uiga o i ina e fua i ai, e fua i tupe e faagaioi ai ma faataavili ai le tamaoiga ina ia mafai e tagata la e i tua i le mea sa ou ola mai ai au, e palapala lima mai le taeao seia oo i le po. E alu e faatau mea i le maketi, sue ai le pili, sue ai le totogi e pasese i le pasi, o isi taimi e savali i le mamao. O i ina e te faalogoina ai le taua o mea ia. E le taua le malie o tatou upu, leai. Lau Afioga i le Fofoga Fetalai, e le teuteua i upu mea ia o mea e fai ai atinae. O le luitau foi lea na ou faalogo o saunoa i ai le Afioga i le Palemia e pei lava o le Fonotaga ananafi, "Vaai le au Savaii e o i Savaii, manaia tele le nuu." A o lea la o le a avatu ai ma manaoga o Salafai. O manaoga o Salafai, lau Afioga i le Fofoga Fetalai, faamaea le uafu o Salelologa i totonu o le lima tausaga o lumanai nei. A le maea le uafu lea, lau Afioga i le Fofoga Fetalai, e talosaga atu i le Palemia, e le mafai ona tumu le taulaga i Salelologa, leaga e faalagolago iai kamupani nei. O le lelei o le uafu i Salelologa, pe a fua i le tau o oloa e faaulufale mai Apia, e 25% e taugofie ai lo oloa e ave i Savaii. Aisea? E laitiiti aseta e calculate ai le tau o oloa. O i, ua tau le omai i ai ni vaa ua taugata. O le mea lena o lea ou te talosaga atu ai, o le matou manao muamua lava lena, faauma le uafu i Salelologa. Ia faamaea auala i totonu o le 200 eka i totonu o le taulaga i Salelologa ina ia mafai ona o atu i ai le aufaipisinisi. Ia faaloloto le uafu ma le ava i Asau, o matou manaoga ia, o lea ua sui e moni sa faigata i le 30 tausaga talu ai, ua tatau ona i ai ni masini e mafai ai ona faalautele ma faaloloto le uafu i Asau.

Ia fuafua le faatuina o se fale ia tuuapa i Asau, ina ia mafai e o matou tagata ona aua ne i toe omai i totonu o le taulaga ae nonofo pea i Savaii. O le mea lea ou te matua fiafia ai i le luitau ua aumai mo i matou i Salafai. Aua o le toatele pea o tagata e omai i totonu o le taulaga, ua amata ona tau leai ni vai, ua amata ona tau leai ni eleele, ua oso lava i tua le tulaga ua afaina mea e nonofo ai aua foi o lea ua omai i ai tagata? E manaia pe a fai i tua. O le mea foi lena ou te fiafia ai ma ou lagolagoina le atinae i le atu Aleipata, o le mamao o le faatofalaina, e mamao le silasila, e le tupu nei, e le tupu taeao, o le 20 tausaga i le 100 tausaga ua aliali mai le aoga o mea ia. O le mea foi lena e avea ai au ma sui o Salafai tatou te atinae ai lo tatou motu, ona tatou o lea o tatou e fai lo tatou Malo tutoatasi ae nonofo pea latou iinei ma fai ai foi a latou mea. Ona lua lea o Palemia, Palemia Savaii, Palemia foi Upolu. Ia toe faalelei le uafu i Asau...

Tofa Lealailepule Rimoni Aiafi: Lau Afioga e manaia le saunoaga a le sui usufono. O le a le mea e le amata ai loa i le Palota lea o le a fai sei o atu ai latou ae faagaogao tatou. Ma le faaaloalo lava.

FOFOGA FETALAI: Ua pei oe e le o se Savaii ma le...tulai mai le sui usufono e faaauau le saunoaga o lena e manaia lou sao.

Afioga Hon FAUMUINA TIATIA FAAOLATANE LIUGA: Ia toe faaleleia le uafu i Asau, faatele le Malae Vaalele i Asau ma faaumi i le 800mita ina ia mafai e le 747-800 ona land i ai. O la e pito Savaii i Ausetalia ma Niu Sila e faigofie ona ave ai vaalele....

FOFOGA FETALAI: Malie lava le sui usufono o lo o saunoa se i tuu atu lava le avanoa i le mea e fia malamalama ai le Taitai o le Itu Agai.

Afioga Hon Palusalua Faapo II: Lau Afioga i le Fofoga Fetalai o le mea e fia malamalama ai. Ona o le sui usufono sa Minisita o Tupe, o lea na saunoa nei e matua lagolago le manatu autu “fua le manao ia tatou seleni ua maua”. A silasila la i le saunoaga e matua feteenai lava ao lana saunoaga i le amataga e lagolago i le Tulafono Tau Faaofi o le Faatatauina o Tupe 2015/2016 ao mea ia ua lau mai nei oka se mau manatu ae leiloa poo fea e aumai ai e le Palemia ni tupe e fai ai? Ae sa Minisita o Tupe.

FOFOGA FETALAI: O lea ua maua, ou te taofi o lo o e faafogafoga...o la e maioio lelei le saunoaga a le sui usufono ma agai i le faatauaina o taofi o mea e mafai ona tatou faia. O le lui lea e agai i ai le sui usufono, sei tulai mai le sui usufono e faaauau le saunoaga.

Afioga Hon FAUMUINA TIATIA FAAOLATANE LIUGA: Faafetai i lau Afioga, ou te ofo i le Taitai o le Itu Agai, e matua leai lava ma se mission o i ai, empty, o ai le atunuu e...e lelei aua e nofo lava ia i Upolu ae matou o matou i Savaii, o lea e fai atu o mea o le 10 i le 20 tausaga o lumanai. Savaii, o le a atinae lo tatou motu. Ia faatele le malae i Asau i le 800 mita i le 700 o lo o i ai nei ina ia mafai ona land ai le 737-800, e amata ai International travels e le gata e sau Faleolo i i ae alu ane foi le isi vaega i Asau.

Lau Afioga i le Fofoga Fetalai, ia tai atu le vai, o le tasi lea mea o lo o moomia mo Asau ma le la itu o le vai. Ia tai atu a le o le Mataolealelo a ia tai atu i Maliolio a ia mafai ona lava le vai mo le maketi po o le faleia o le a tuuapa ai ma maua galuega. Ou te iloa o le mea lea o le a tuu i le agenda a le Minisita mo Faatoaga ma Faigafaiva ina ia mafai ona faaauau lenei miti i le tulaga e lelei ai. E lua mea ia e afaina ai le atiaaina o Asau, o le papau o le ava ma le le lava o le vai, na fautua mai Inisinia ia te au ina ia tai mai le vai i le vai o Falealupo, ona ou fai atu lea e alu alu matutu le vai o le toeaina lena ona le fiafia foi lea. Ae sili lava ona tatou o e aumai pea i le vai le la aua o le vai lea e le iloa e tatou poo le a le tele o le vai lea i i, ua atili ai aua o le la e tata e le toeaina laau ma nofo ai luga o le vanu.

Ou te tatalo atu ai i lau Afioga i le Fofoga Fetalai, o le aotelega lena o moomooga mo le motu tele o Salafai. Tuilaepa o lea ua e faafofoga mai ua matou fia o, leaga o lea ua saunoa mai matou te o matou i Savaii, o e atinae Savaii i le tulaga e tataua ona fai.

FOFOGA FETALAI: Malie le sui usufono sei avatu le avanoa i le isi Salafai lea, sei tulai mai le Minisita mo Fesootaiga ma Faamatalaga Tekonolosi.

Afioga Hon Tuisugaletaua Sofara Aveau (Minisita mo Fesootaiga ma Faamatalaga Tekonolosi): Lau Afioga i le Fofoga Fetalai, ua ou tulai atu ae se i fai sina malologa a le toeaina i ana miti ia e aumai. O le mea lea e atugalu ai le sui usufono ua tau popole pei a tele atu le ie lea e aumai e fai ai mea nei i Salafai ae pe le o faapena le tele o se tatou ie o i ai. O le mea lena ua ou tau popole ai i le sao faa-Salafai lea aua o au foi o le Salafai ao le mea sili ua maua se malologa a lou uso.

FOFOGA FETALAI: Malie le sui usufono sei avatu le avanoa i le Minisita mo Galuega, Felauaiga ma Atinae Eseele ona sosoo ai lea ma le Minisita mo Leoleo ma Falepuipui.

Afioga Hon Manualesagalala Mati Tuigamala Enokati Posala: Faafetai ae ona o lea sa saunoa le sui usufono i le uafu ma le suavai e pei o vaega ia i lalo o lau vaaiga, ae pei ona sa faamanino atu o lo o i ai nai faaletonu i le uafu i Salelologa. E ese le faigata o le tulaga i fanua ma mea faapena i Savaii, ou te manatu o se auala muamua lena e tataua ona agai i ai sui usufono o Salafai o lo o i totonu o lenei Maota e tataua ona fai se galuega e galulue faatasi ai ma polokalame nei e tau fuafua. E oo foi la i le suavai ona sa i ai a matou feiloaiga na fai e faigata lava ona foia nei faafitauli ao le tulaga ua i ai Salafai ua amata ona sualua le vai o lo o vili mai lalo o le eleele. O le popolega ina nei alu alu ua le gafatia ona ua toatele e manaomia le suavai ua sau le suasami e faatumu ai lea vaega a ua vave tele ona mitia lea vai. O le popolega i alu alu le mafai ona gafatia e tatou pore -holes nei e sau mai Savaii ona afaina lea o le soifua mo le agai i luma. O le vaega lea ou te talosaga atu a ii Salafai, e tataua ona tatou lagolagosua ina ia faigofie ona matuu le suavai i Savaii, ua leva foi ona fia faatino le galuega i le uafu i Salelologa ao le faafitauli lena e tulai mai, ae vaai i Upolu na o le fai lava ma alu i le atoa aua o lo o galulue faatasi. O lau lea fesoasoani ina nei tei ua lafo tele mai ao le galuega e fau tele.

Afioga Hon Sala Fata Lisati Pinati (Minisita mo Leoleo ma Falepuipui): Faafetai lava mo le avanoa. Faumuina, malo le toa, o le mea nei o au foi o le isi Savaii, sa ou faapea e te le toa faapea, a mea o auga na o faiga mea lea ua e saunoa i ai, avatu ai ma Samaleulu i alatele, e mafai lava ona avatu ai le 747, e fai ai se malae vaalele, malae tapolo. O a lava ni mea ete finagalo e avatu i Savaii lea o le a taatia atu ia oe aua le taumafaiga o le tatou motu o Savaii.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o le po lava lenei o miti totoo. E leai se mea e leaga ai miti totoo aua e mulimuli ane pe mulimuli ifo faatu se mea ae amata muamua lava i le miti. E faapena le olaga lea tatou te i ai, o le mea moni lava o le tasi lena mea e faafefefe ai planers a le Malo, o le sau, sau o le suavai e sau i lalo i lalo o ana o vai ona uma lea o le a le isi mea e fai? O le tasi lena mea o lea e fai ma oo i ai mafaufau ua le o toe mamao ona oo lea o tatou i le taimi e mimiti mai ai le sami tele ona aveese lea o le masima ae maua mai ai le suavai mo le taumafa, la ua fai e le tele o Malo aemaise o le taimi lenei o le utiuti o le suavai ona o le mea lava lenei e fai uma e atunuu o le lalolagi o le ta le mafaufau o laau aemaise o le sosolo pea o le faitau aofai. E manatua foi o le tele o tagata e tutupu o le tele foi lena o laau e tata i lalo ma alu ae ai i luga fale ma alu atu ai lava ma laau ma tuu itiitia ai laau e mimitiina ai le kasa vevela lea e taamilo i le lalolagi. Masalo o lea tatou te pisa nei i fesuaiga o le tau, o lea foi ona ou talanoa i – ua iloa uma lava le fofu o le taofiga o fesuaiga o le tau ao le mea lea e fefe i ai Taitai o le Lalolagi, o aafiaga e aafia ai le soifua o tagata, o le toatele o tagata e aafia ai e leai ni galuega ua tataua ona tapuni ia fale faigaluega, e tataua ona tapuni ia atinae. O le mea lea ua agai i ai le tele o isi atunuu o le lalolagi ua amata ona agai e faaoga masini e pamu mai ai le sami ona aveese lea o le masima ona aumai lea o le suavai magalo e taumamafa ai.

Na ou faalogo e i ai le isi masini lea ua i ai iinei, ao lo o i ai tekonolosi faapena e faatino ai fuafuaga nei. O Nauru ua i ai masini faapenei e gaosi ai le suavai ou te lagona o le mea lena e ono agai ai le toatele o atunuu ua tuu itiitia le suavai ona o tatou gaoioiga faaletagata ua matua afaina ai gaoioiga matagofie a le Atua.

FOFOGA FETALAI: Malo faafetai, lea sa tau tulai mai le Minisita mo Tina ma Tamaitai, Atinae o Nuu ma Afioaga ma Agafesootai.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioaga ma Agafesootai): Faafetai i lau Afioga ae manaia lenei taimi sei lava se malologa a le sui usufono. O le tasi lea vaega taua o le oa faalenatura o le suavai. O lo matou nuu e i ai se toeaina ua tuumalo e taumafa ava, ae a oo ina taumafa ava vaeatu le faafofogaaga a Samoa, ona faali mai lea o finagalo o nisi o lo o latou taumafa ava, e alu alu lava ona faapea lea o le toeaina, vaai e le sese lava lau tala lea o le a fai atu, o le mea lena tou te fai mai ai, e sao ai le upu o le nanu a le isi papalagi, easy to say but hard to do”. Ioe, o le mea tonu lava lena ua ou faalogologo atu ai i le sui usufono mai Salafai, easy to say, hard to do. O Sili le afioaga lea e i totonu o fuafuaga a le Matagaluega o Tina ma Tamaitai, Atinae o Nuu ma Afioaga ma Agafesootai i le polokalame o Vai Tumaoti, ua nofo lava le

toeaina ma le tofi sa i ai ua fiu e tauanau Sili e avane le vai i le Malo, ao lea o le a pule fua i vai o isi afioaga o Savaii ae le faapea mai o le a avatu le vai o Sili e ola atoa ai Savaii. Ou te alofa tele i le Minisita mo Galuega, Felauaiga ma Atinae Eseese, ua alu lenei tausaga o tau faamalie i le viliina o latou mita ao le tulaga foi lena, ua fai fai le vai o Palauli ua manatu le Malo e tuu i le Faasaleleaga talu ai le toeaina lea e ona – e sao ai le toeaina lena o le matou nuu, easy to say, hard to do. O lau faaaliga lea ma le agaga faaaloalo.

Afioga Hon Palusalue Faapo II: E faamalulue atu i le saunoaga matagofie a le sui usufono mamalu, sao lelei, aemaise lava tatou mai Savaii, o le mea e lelei i Apia e lelei mo tatou i Salafai, ao le a le mea lea e tupu? A lea ua outou fia faafogafoga i ai i le tele o mea e fia faaleleia i Savaii. O sao lea upu, o le mea e lelei i Apia e lelei foi i Salafai? Ae silasila i ai – faaauau lau saunoaga o lena e manaia.

FOFOGA FETALAI: Saunoa le sui usufono o lena e lelei, sau a oe i le pauuga lena.

Afioga Hon FAUMUINA TIATIA FAAOLATANE LIUGA: Faafetai i lau Afioga o lea ou te amata atu i mea lautetele ona ou oo ai lea i mea i lou Itumalo leaga ou te alofa i le motu i Salafai pei a faatuatuanai. Lau Afioga i le Fofoga Fetalai, a na faapea e latalata Asau i le mea e i ai lo matou nuu o Sili, e tai atu i Sili le vai e fai ai le Fale Ia, ou te le o faapea atu a mea aumai le vai i le manava o le eleele, o le option lena, ou te iloa e le i faafogafoga lelei mai le Minisita mo Galuega, Felauaiga ma Atinae Eseese, o lau tala lea na fai atu muamua, o le option muamua o le Mata o le Alelo i Safune, o le option lona lua o le aumai i le mata o Maliolio, o le vai lena o lo o tafe i lalo o le sami, se i vagana ua agi atu le lai, ona alu lea o le vai oso mai luga, ona faatoa tafe ai lea, e le tafe i timuga le vai le la, o le mea lena e iloa ai le loloto o le vai lea e i i le Maliolio, e alu ai Asau, e alu ai Auala, e alu ai Vaisala, e alu ai Sataua, e alu ai Papa ma le isi itu, e supplement ai le vai lea o le sui usufono mo Falealupo, e le toe popole le sui usufono mo Falealupo, e uma lava ona tanu lona tino i le eleele, e manatua pea e Falealupo, leaga e toa ia le toeaina lea. Ou te faafetai ai, Sala, faafetai mo lau offer, ou te le i faapea atu a mea o vaieli ia o le a eli mai, e leai, o lea ou te iloa lava, ou te malamalama leaga o la e alu i luga ia le suasami, o le suasami foi lena o lea o le a oona ai vai ia e i le manava o le eleele. A o le vai lea ou te fai atu ai o le Maliolio, ia o le vai o la e i lou itumalo Sala.

FOFOGA FETALAI: Ia malie lava lau Afioga i le sui usufono mamalu, se i avatu le avanoa i le Afioga i le Minisita mo Faatoaga ma Faigafaiva.

Afioga Hon Le Mamea Lemalu Su'a Leatuavao Tuiletufuga Ropati Mualia (Minisita mo Faatoaga ma le Faleoloa o Faatoaga): Lau Afioga i le Fofoga Fetalai, e faamalulu atu lava i le uso lea e tulei saunoa, ae e le i leva atu ona saunoa ia Dr. Wood ia po o le Afioga foi ia Afualo, fai mai o au o Mose, ia o Mose o le isi lena Toeaina tautaua o le Tusi Paia sa faalagolago i vavega foi ia na fai e le Alii ona ave lea o lona nuu mai o i le mea foi lea sa i ai i Aikupito ae ave i o i Kanana i le mea o lo o tafe ai le susu ma le meli. O

lea la ou te tau faanoi atu i o ia Afualo, ua e faaigoa au ia Mose, e a pe a malie, ave Mose ma le Afioga ia Faumui, ioe, ia o lau talosaga lena.

FOFOGA FETALAI: Ua talia aloaia lau saunoaga Le Mamea, malie lava leaga o lea sa e taua le vai manino....Tulai mai le sui usufono mo Gagaifomauga Nu. 2.

Tofa Sooalo Mene (Gagaifomauga Nu.2): Ia faafetai i lau Afioga i le Fofoga Fetalai mo le avanoa, ia e pau lava sina mea ua tulai atu ai ona o lea sa afea le vai o Safune le Mata o le Alelo, ae ou te ioe o lea na saunoa atu le Afioga ia Sala, ou te ioe i le tele o atinae ua faapea ona fuafuaina mo le lumanai, ae pau lava lea o sina mea leaga o lea sa ou faalogologo, i le vai lea sa e saunoa i ai o le vai o le sui usufono mo Falealupo, i te i ua faaaoga mai le vai o le sui usufono mo Falealupo ona matutu lea, a o le popolega foi lena o lea e ia te au i le Mata o le Alelo, te i ua faaaoga ona matutu foi lea ona faaletonu lea o matou i Safune lau Afioga ma le faaaloalo lava.

FOFOGA FETALAI: Malie lava le.....

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Lau Afioga i le Fofoga Fetalai, se ou te fia fesili atu lava, o au ou te le i vaai i le....O ai le Alelo lea e ona le Mata?

FOFOGA FETALAI: Ia tulai mai Mose e faaauau le saunoaga.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai, leai ou te talosaga atu, tuu pea Mose ia Le Mamea leaga e leai sau ava, leaga o Mose e fai lana soesa, e talafeagai lava la ia Le Mamea le suafa o Mose.

O le vai o le Afioga i le sui usufono mo Falealupo e le tatau ona tagofia, o la e fai mai inisia e lava, a o le mea lava lea e maitau, aua ne i tatou o e draw mai se punaoa, e le o mautinoa po o le a le tele la e i ai, a o i i vai ia e lua, ia e manaia lava. Ou te le iloa la lau Afioga i le Palemia, ou te le iloa la po o ai le Alelo lea e i ai i i, ae ona pau lava o le igoa o le vai.

Lau Afioga i le Fofoga Fetalai, o isi atinae ia o le matou motu e fia fai aua o lea ua uma ona pasia le auala laupapa i le Maliolio, a o le auala laupapa i le va o Safua ma Sapapalii, e tatau ona fai le auala laupapa lena e faalelei ai ia le fesootaiga lea ma le falemai ia ma le uafu, o le auala laupapa i le va o Sasina ma Letui, o lena e i ai le tamai alia lena a tafe e le sao vai, ma le auala laupapa lea i lo matou nuu o Sili, ou te iloa lau Afioga i le Palemia e faalua ona tuu le auala laupapa lea o Sili i a tatou anavatau i tua atu o le tausaga lenei, ma e i ai lou taofi lau Afioga, ia o lea ua faalau atu isi vaega o a tatou anavatau i tua atu o le 2016 i le 2021, ae aua tatou te faatuatua itiiti. O le mea lea e tatau ona tatou vaavaai i ai, ia atinae ia Samoa. O le isi mea lea na ou tuuina i lalo, o le vaega lea o tagata tafafao maimoa mai, o i i Manase, ua tatau ona tatau ai se pole tele e alu atu se vaa foi lea o tagata tafafao maimoa mai o le cruise ship e taula ai i ina ma omai tamai vaa i uta e aumai i le oneone paepae ia tagata tafafao maimoa mai, e aoga foi i lena itu o le motu, aua afai o le a amata ona taugata le uafu i tai, ia avatu i Savaii e lelei e taugofie, ou te iloa pe \$5 lava i le vaa e tasi, ia a tele ni tupe e tatou te maua

ai i le omai o tagata tafafao maimoa mai i uta ia ma faatimu ai, ia ma tafefea ai i le au o le sami, ia ma toe foi ai foi i o latou atunuu.

Lau Afioga i le Fofoga Fetalai, ona ou oo mai lea i manaoga o lou itumalo, o Palauli le Falefa. Lau Afioga i le Minisita mo Tina ma Tamaitai, Atinae o Nuu ma Afioga ma Agafesootai, o lea e i totonu o le Paketi lea tatou te talanoaina le tupe e fai ai le vai o si o matou nuu o Sili le vai tumaoti, ia ou te faafetai atu foi i lau Afioga i le Minisita ona o le tulaga ua e amanaia ai se talosaga foi a si o matou nuu. O le vai lea i Sili o le matua mama e certify e le Matagaluega o le Soifua Maloloina e mama atoatoa, ma e le tau siakia e le SROS ia po o le Matagaluega o le Soifua Maloloina.

Ona ou oo mai ai lea i ina i le vai vili, o lea foi ua ou maua i totonu o le Paketi, o lo o i ai ia le tupe mo le viliina o le vai o lou nuu o Gataivai, ma e faafetai atu ai foi i le provisions o le vaega lea a le SWA, o matou e nonofo i luga o vai ae le inu, o le mea lea e pei ona silafia e papa le matou itumalo.

O le auala lea e i le va o Vaiala i Gautavai ma le nuu tuai lea i Sili, o le auala lena na sefulu ma ona tupu tausaga na fai ai, ae oo mai i le taimi lenei e le i toe teua lava, o le auala lea e taua tele mo faalavelave tutupu faafuasei, o lo o faaoga foi e pasi e lau ai tamaiti aoga mai i le isi itu i le isi itu, ona o le vai lenei e tetele loa timuga tafe, ia ona le mafai loa lea e nuu tuai ona sopo mai i le itu e faatali ai ia pasi, ia ae oso le pasi i le itu le la e aumai ai nai tagata i le tulaga lea o le...

O isi foi mea, e lua nai au auala galue sa tuuina atu i lau Afioga, ia ae se i faaoga foi i ai sina au \$500,000 i lau \$4,100,000 lena e i lau Paketi i auala na mo le vaega lea e i ai, a le iloa lava e le sui usufono ia le mea lena e i ai tupe, aua e te faalogo fua i ai, ae o lea ou te tilotilo atu i lau Paketi, o lena e feoloolo nai au seleni lena e i ai e fai ai a ta auala na, o le auala galue la o Sili ma le auala galue o Papa, o le a lava le auala e te faia, ia o le auala lena e tataua ona tufa foi ia lau faasoa ina ia aua ne i tele i se pito e tasi, ae ia faapena ona lautogia.

Faafetai foi i le Minisita mo Faatoaga ma Faigafaiva, e ese lou lelei i lo matou itumalo, a o le lagolago la lenei a le itumalo Le Mamea, o le tele o matou tagata faifaatoaga o lo o matua galulue malolosi, o le mea foi lea ou te tatalo ai i le Minisita mo Galuega, Felauaiga ma Atinae Esee i le matou auala galue lea e i Sili, aua o le matou nuu o Sili, e sa ona faaoga ai le vailaau e organic o a uma ia ana atinae. O le mea foi lea e faafetai i lau Afioga i le lagolagoina o le aufaifaatoaga, ma ua faaosofia ai foi lo latou naunau e galue ma galue. A faapea la e uma le auala galue lea o le a fai nei, ou te iloa e tumu mai ai lava i ina le container e tasi i masina taitasi ia po o le lua foi i le masina, ae e aoga e fesoasoani ai i le tatou vaega o fefaatauaiga, ia o le tetele o talo lea o le numera lua – ma e taua tele ia le auala lea ia ma e faafetai atu ai i a oulua Afioga i lo oulua faafogafoga mai i nai mea ia o lou itumalo.

Lau Afioga i le Minisita mo Leoleo ma Falepuipui, o le tatou galuega faa-Leoleo, o lea foi e talosaga atu nisi o sui usufono, o lea o le a amata ona e silasila i le faaleleia o le Ofisa o Leoleo, ia ou te iloa foi o le a siitia ai le tomai o afioga i alii leoleo ia galulue faatasi ai foi ma le Minisita mo Aoga, Taaloga ma Aganuu pe a faapea e faatu le Academy, o le a faaauau pea ona ou fesoasoani atu i lau Afioga ia mo le faatuina o lena Academy. O le lelei o le mea lea lau Afioga i le Minisita, o le ono tele ai ni a tatou leoleo e ave i fafo, a mafai ona oo leoleo a tatou e ave i fafo i le selau ia po o le sili atu, o le

foreign exchange e maua mai i i, o le matua tele lava, ae le gata i lena, e mafai ai e o tatou leoleo ona talosaga foi i totonu o Missions nei i galuega a Malo Auaatasi, o lena ua amata ona galulue ai isi, a o lea o le a oo atu i le level i luga atu, ia o le atili ai lena ona maua o latou avanoa e tauva ai i galuega a Malo Auaatasi.

O le isi foi vaega ou te matuai lagolagoina ma ou fautuaina ai le Minisita mo Aoga, o le Aoga lea a le Maritime lau Afioga i le Minisita, e ese foi le tele aua o le mea lea e tele ai foi seila ma officers a Kiribati ma Tuvalu, ona ua maua luga le aoaoina o latou seila, ua oo i luga i le officers level ma ua ova i le tai afe ma ona tupu tagata i luga o vaa ma ua tele foi ia faamanuiaga e maua mai ai.

O le tulaga i le...pei ona ou fai atu i le tulaga o fautuaga e pei ona i ai, aua o la ua i a matou lipoti le tele o mea sa matou i ai i le iloiloina o le Tala o le Tupe, ma e faafetai ai i le Afioga i le Palemia mo le sauniga o lena Tala o le Tupe – ma e matua lagolagoina e lou nei sui usufono le Tala o le Tupe.

E i ai nai auala ia ou te manatu e fesoasoani i le agai atu i le lumanai, ma e ou te iloa o lau fautuaga muamua o le a agai i le Afioga i le Minisita o le PSC. O le tulaga lea e i ai a tatou itula faigaluega, pei lava o la e 7 ma le afa itula po o le 8 itula i le aso, e tatou te le manaomia uma nei mau itula, o le matua umi lava, e tataua ona faapuupu i le afa itula po o le itula atoa i le aso, e mafai ona fai galuega i work smarter not harder, te matua manaomia le effectiveness ma le efficiency, e tutusa lava o tatou soifua ma taavale, e uma loa le penisini ona amata loa ona alu ae i luga le mea o le palapala, ona amata lea ona pei a puni ai le kapalaita, o le mea la o lau fautuaga lau Afioga i le Minisita mo Galuega tau Alamanuia ma Atinae a le Malo, ia o oe foi o le Savaii, toe ta neighbour, ia vaai i ai i le tele o mea ta te fesootai ai, faapuupu itula faigaluega o le afaigaluega. O le a ou tau atua mea e sefe ai, e lua line items o le paketi e faalaitiiti ai, o tupe e faatino ai galuega, operating expenses. O isi tupe e faalaitiiti ai, o mea o overheads. O lona uiga, a tipi itula faigaluega ua tape air conditions alu i le fale, tape moli alu i le fale, tape le computer alu i le fale, ma le toe faaogaina ai internet ma isi mea, i isi lava necessities o le olaga, leaga o tatou o human beings, we are human beings. O le fautuaga lea, afa i la e afa itula e faaitiiti ai, o lona uiga, e lua ma le afa itula i le vaiaso, 130 itula i le tausaga pe a afa itula. O lona uiga, a e tago la e faatupe le mea lena, e le faapea o le a faaitiiti ai le totogi o tagata faigaluega. E leai e le o lau tala lena o lea e fai atu...

FOFOGA FETALAI: Malie le sui usufono o lo o saunoa se i avatu le avanoa i le faauilavea a le sui usufono mo Aleipata Itupa i Lalo.

Afioga Tafua Maluelue Tafua: Lau Afioga i le Fofoga Fetalai, malie lau Afioga e le faalavelavea lava le saunoaga manaia a le sui usufono mamalu. Ona o lea ua e oo i luga i le PSC, o lea e maitau atu o lo o i ai le functional review a le PSC o lo o faia nei. O le tulaga foi la i le saunoa mai a lau Afioga, o le tatou paketi lea e i ai nei ma le paketi e fa lea ua uma atu, o le tupe tele lava lea e i ai nei ese mai atinae, o totogi o tagata faigaluega. A o operating expenses lea e i ai nei, so o se Matagaluega lava po o Faalapotopotoga Tumaoti a le Malo, e laitiiti lava le tupe lea e alu ai. Ma lou faaaloalo. Faafetai.

FOFOGA FETALAI: Malo. Tulai mai le sui usufono e faaauau le saunoaga.

Afioga Hon FAUMUINA TIATIA FAAOLATANE LIUGA: Faafetai. E faafetai atu foi i le faauilavea a le sui usufono mamalu. O si au tuualalo lena i le tulaga lea, e le afaina lava le totogi o tagata, ae a reduce le working hours, but half an hour by one hour e uma lava ona fai lau galuega e le i taitai. O lea ou te talanoa atu au ia i le mea ou te faia ai au galuega. Po o le a le faulalai o lau kesi, e mafai ona ou faia le galuega lena i totonu o le fa i le lima itula ona ou alu loa lea ou tafao, lona uiga ou te tapolo lava e le i taitai le aso. Aua foi a e nofo i le Ofisa ua e faamaumau le air condition, faamaumau le moli, faamaumau le tele o isi mea, alu ma stationeries. Ae a e sefea le cost lena, a 10% e sefe, oka se tupe e faasao.

O le isi vaega o le mea lea o le faamitaina o auala ia e i le taulaga. Ia se i saunoa mai si ou uso...

FOFOGA FETALAI: Malie le sui usufono mamalu se i tuu atu le avanoa i le faauilavea a le Afioga i le Minisita mo Fesootaiga ma Faamatalaga Tekonolosi.

Afioga Hon Tuisugaletaua Sofara Aveau: Lau Afioga i le Fofoga Fetalai, faafetai. Manaia foi le saunoaga a le sui usufono mamalu. O le mea lea out e fia tulituliloaina atu, ina ia faamalamalama mai, e faapefea ona tipi le itula pe tipi le afa itula ae lefaaitiitia ai le totogi o tagata? Se i faamalamalama mai lau amio lea. Afai ua tipi le itula, tipi le afa itula pe tipi foi le totogi o tagata.

FOFOGA FETALAI: Mo le faasaoina o le taimi, se i tulai mai le sui usufono mamalu Lealailepule.

Tofa Lealailepule Rimoni Aiafi: Lau Afioga i le Fofoga Fetalai, ou te fia fesoasoani atu, o le masina na tea nein a pasia ai e Iapani le Tulafono e tatau i tagata faigaluega uma a le Malo ona ave o latou aso malolo. O tagata uma lea e i luga i le Executive level, e sa sa ona toe ovataimi se isi. Ua reduce by one hour, seven hours a day, lona uiga, actually, na o le fa ou aso faigaluega. Tusa o le uiga o lau faamatalaga, ou te lagolagoina le finagalo o le sui usufono o lo o saunoa nei, leaga o le mea e fua i le global. O mea na o lea ua agai i ai developed countries, leaga o le mea lea tatou e ola ai, na tatou ola mai lava tatou, e ai le taeao, aoauli, afiafi. Aua o Samoa e tasi lava le taimi e ai ai na o le taeao ma le aoauli. A o lea ua tatou omai, e tatau ona valu itula faigaluega i le aso. Aisea? Ia tailo? Faafetai lava.

FOFOGA FETALAI: Ia, e avatu pea le avanoa e sasaa mai pea le tofa.

Tofa Hon Tolofuaivalelei Falemoe Leiataua: Faafetai. Lau Afioga i le Fofoga Fetalai ma le mamalu o le Maota, e lelei lava le fefaasoai i luma, ona o lea ua faalogologo atu, o tatou lea e taumafai ina ia uunai tagata faigaluega ia maua le agaga o le faamaoni. O le mea lea ua aumai e le Afioga ia Faumuina, na o le galulue piopio o tagata faigaluega. Ia o fea se mea ua loka le Ofisa ae alu e tapolo? E fetau lena mea a o la e faafofoga mai le afaigaluega? E le taitai fetau, o aoaoga leaga, o tagata e faitau le Tusi Paia a

o mea e savali ai, o le matua gaoi ma le faomea vaeatu le paia o le Maota. Ma le faaaloalo.

FOFOGA FETALA: Ia, ina ne i meaane ua mau eseese Tutuila ma Ape...

Afioga Hon FAUMUINA TIATIA FAAOLATANE LIUGA: O le faalavelave lea o le talanoa o tagata faaolaina ma tagata e le faaolaina.

FOFOGA FETALAI: Faamagalo, maua lou agaga faamagalo.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e i ai le matai o le matou nuu e igoa ia Fiaai, ua leva ona tea le taimi.

FOFOGA FETALAI: Ia, malie lava lau Afioga i le sui usufono mamalu, se i tuu atu pea le avanoa. Palu, faapuupu mai.

Afioga Hon Palusalua Faapo II: Ia, o le a faapuupu. Faafetai lava Faumuina i lau saunoaga, leaga o mea ia e tatau ona tilotilo i ai i reforms ina ia faaoga tatau le taimi. Pe puupu lava ae ofi uma ai galuega, lea e saunoa i ai Faumuina.

O le isi mea lau Afioga i le Fofoga Fetalai, Leala, pei ua iloa e Faumuina le tatou manifest. O mea foi ia e saunoa i ai Faumuina mo Savaii, o lona uiga ua silafia uma e Faumuina. Ma lou faaaloalo.

FOFOGA FETALAI: Malie lava Faumuina se i avatu pea le avanoa. Tulai mai le Afioga i le Minisita mo Fesootaiga ma Faamatalaga Tekonolosi.

Afioga Hon Tuisugaletaua Sofara Aveau: Faafetai tele lava i lau Afioga mo le avanoa. O le mea sili o lea ua tatou faalogologo i le manifest a le Itu Agai. O le manifest la lea e faapea mai, e leai se tupe a le tagata faigaluega e tipia. A le tipi o lea e fai mai e tuu i lalo i le itula po o le afa itula? O lona uiga e tipi le totogi, a o faafofoga uma mai le afaigaluega, e tipi le tou totogi.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea lea ou te tulai atu ai, o le a tauau ina aliali uma manifesto a le la Vaega?

FOFOGA FETALAI: Ou te faasilasila atu o le a faataatiaese Taulumaga a le Fono Aoa mo lana malologa masani o le afiafi.

Na faataatiaese Taulumaga a le Fono Aoa i le itula e 6:49 i le afiafi ma toe faaauu i le itula e 7:31 i le po.

FOFOGA FETALAI: E talitonu le manatu o lea ua maea le tautega ma ua to foi i moana le taligasua i lenei aso. E manatu foi ua maua lo outou faasiliga malosi, le paia ma le mamalu o le Palemene, faamalo atu le onosai, faamalo

foi le faamalolosi e ala i le tatou lafo faatu. E manatu e le o toe mamao se aga masalo pe toe toalu pe toatolu sui usufono o le Maota o lo o faagasolo.

E faia le tatou malologa ua faaiu mai le saunoaga a le sui usufono mamalu mo Palauli le Falefa., Ia tulai mai le sui usufono e faaauau mai ma faaiu mai le saunoaga.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai. Talu ai o lea sa laga ma taua ai e se tasi o Minisita le upu e faapea o lea tipi le totogi, o le gaioi ma le faomea. O au, tasi ia o galuega sa ou faia, o le faatulagaga o totogi, ma le classification o galuega. E le fuaina totogi i tagata o lo o umia galuega, e fai le totogi aua the product. O le galuega e te faatinoa, o le mea lena e fau ai le totogi po o le taua o le galuega. E le taua la le laititi o itula, ae taua le uma o le galuega.

O le mea lea ou te fai atu ai lau Afioga i le Fofoga Fetalai, a tatou tilotilo i le mea o le tagata ua exhausted, po ua low le efficiency, when the efficiency level is low, you adding costs, not value. O le mea lena o lea ou te fai atu ai, that's the point lea out e fai atu ai nei. E mafai ona e faia le galuega i totonu o le ono itula, fitu itula, and you go home, feiloai ma mafuta ma lou aiga, alu e vaai ni au fai se lua e toto, pe toto ni au talo se lima, e aoga lou afiafi. A o le mea lea o le nofo i le ofisa, e lua lava mea e te faia, o lou faamaumau o le eletise, faamaumau ma stationeries, e tele, o le tele o mea la e te faaogaina. A e knock out early, you enjoy going home early.

FOFOGA FETALAI: Malie lau Afioga i le Minisita, se i tuu atu muamua le avanoa i le Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o le government policies lea e i ai, e lua lava faavae o le faatinoga o galuega, o le faavae faakonekarate, o lona uiga o le konekarate, e le o le taimi e taua, a o le galuega ia maea. O lona uiga e pei lava o le konekarate o le fausia o le fale. E le taua la le itula galue, ae taua le uma o le taimi na faatapulaaina. Ma letulaga la lea i le tagata e faavae i luga o le taimi e totogi ai. E pei la o le eseese ga lea o mea ia e lua, lea e tulai mai ai le confusion, o galuega faakonekarate ma le galuega e pay i luga o le taimi.

FOFOGA FETALAI: Ia, se i tuu atu pea le avanoa i le Minisita mo Tina ma Tamaitai, Atinae o Nuu ma Afioaga ma Agafesootai, lau Tofa Tolofua.

Tofa Hon Tolofuaivalelei Falemoe Leiataua: Lau Afioga i le Fofoga Fetalai, out e tulai atu e fia faasao leaga o lea ua mix up le Afioga i le sui usufono mamalu i faaupuga ia faapea o le tipi o le itula faigaluega e le atoa ai le totogi, o le gaioi ma le faomea. E leai e ese lava le saunoaga a le Afioga i le Minisita i le vala lea o le le atoa o itula faigaluega ua tipi le totogi. O lona uiga ua le atoa le totogi o le tagata, ua faaitiitia ona o la e ua less le afa itula po o le itula atoa. A o le mea lea e fai atu ai au, o le mea o le disloyalty. E ese le taua o le mea lena, leaga o au nei, ua ova i le 10 tausaga o ou faigaluega i le Inspector o le Matagaluega o Leipa, e lava le iloa i le galuega. Sa ou sui Peresetene foi i le Faalatopotoga tele lava a Tagata Faigaluega a le Malo e tau o le PSA. Ou te malamalama i galuega leaga o lou olaga atoa o le tautua i

totonu o galuega a le Malo, mai le 1970 seia oo i le 1995, ou alu ese loa ina ua ou manumalo i le palota i le 1996. Ua e silasila la i ai? O le lelei o se mea, o le vaai, o le galue, e lava lou silafia, e matua polofesa lava o mea tau galuega lea ou te iloa, ioe. E ese lava la le mea lea e te sau ma oe mai Amerika ma Malo Afaatasi, ese le mea lea e fai i Samoa. O le mea la lea lau Afioga i le sui usufono mamalu, e taua lou i a ii lou falefaigaluega. A faapea e i ai vaega o le aso e te alu ese ma lou falefaigaluega ona o le tauaveina o ou tiute, tasi lena taua. Ua e vaai foi i le mea lea e igoa o le APS ea po o le a le tau o le mea lea e faaoga e taavale, e ese le taua o le mea lena. O le GPS. A e tagai la i a ii le faaogaina o le mea lena i le taimi lenei e Corporations lea e i ai nei, ua maua ai le au tafafao. Fai mai o la e if ea ae sue atu le taavale i le faafanua la e i luga, o la e fai mai o Aleipata e tataua ona alu e asiasi ai, ae sue atu o la e i Falelatai. O a na mea? Vaai i ai i le mea na fai e papalagi ia saga faamautuina ai le faamaoni? Ioe. A o le mea lea e te saunoa i ai, o le taitaiga o tagata faigaluega a le Malo i le pepelo, o le gaioi taimi, e tusa lava la ma le gaioi tupe. O le upu sao lava lau upu lea e fai atu. O le mea la lea Faumuina, tuutuu mai lou agaga i le mea lea ou te fai atu ai, aua le taitaiina oe i manifeso a le Tautua e avatu na o le faavevela fala lava, ma lou faaloalo lava, malie foi le tatou Vaega Faaupufai.

Tofa Lealailepule Rimoni Aiafi: Lau Afioga i le Fofoga Fetalai, sao lelei le Minisita, ua leva, o le Afioga i le Minisita sa ou vaai e fealuai ma lona suti lanumumu ma lona fusiua i aso ia e silafia lelei e le Afioga i le Palemia. O lea e saunoa i lona role faa-Regulator o le vaavaaiga o galuega. O le mea lea e saunoa atu ai le sui usufono o lea e talanoa atu i mea tau operation, e eseese la mea ia e lua, a e galue faa-operator e pule lava oe i le feasibility o le time. O lea ua saunoa le Afioga i le Palemia e output performance, ae a talanoa faa-regulator o le regulator role e saunoa mai ai le sui usufono mamalu ao le operation role lea e saunoa mai ai le Minisita.

FOFOGA FETALAI: Ua matua lava lelei le faasoaina o lenei mataupu ma ua saunoa malamalama le Afioga i le Palemia ma faamanino atili le mataupu. O lo o i ai vaega tetele e lua, e ese le totogi faa-konekarate, ese le totogi i aso ma taimi. Tulai mai le Minisita mo Tina ma Tamaitai, Atinae o Nuu ma Afioaga ma Agafesootai.

Tofa Hon Tolofuaivalelei Falemoe Leiataua: Malie foi le Maota, o mea lava e tutupu, o le saunoga a lou uso a sui usufono mo Faleata Sisifo, ou te manatua ai lava le add lea e sau i le televise a si tama talavou foi lea e naunau i le amiotonu, e fai atu ai le toeaina e sau e avatu le mea lea ae fai mai si tama lea, ona pau lava le mea lea e maua na o le confusion lava.

Afioga Hon FAUMUINA TIATIA FAAOLATANE LIUGA: Lau Afioga i le Fofoga Fetalai, o lea ua nofo le Minisita ma toe contradict na ia. O le mea lea na ou fai atu ai o le efficiency lea ua faaoga le upu GBS, o le mea lena e faaoga ai le GBS ia efficient le faaogaina o aseta o le mea lena ou te fai atu ai ae le o malamalama i ana mea la e fai. E le o iloa e le alii le la o International Organisation na ou i ai na ou faia classifications o lau galuega totino lea. O le isi mea ua saunoa le Palemia i tagata konekarate, o so o se galuega lava i falefaigaluega po o so o se organisation e lua ituaiga tagata,

professional and support staff. O le support staff e lagolago i le professional i lau konekarate, a nofo umi le professional i totonu e umi foi ona nofo le tagata lea ao le tofogi lea e fai atu ai ia reduced working hours to make sure e efficient mea ia. O le mafuaaga tonu lava lea na tele ai mea sese o le budget ua vaivai tagata faigaluega, o le mea tonu lena.

FOFOGA FETALAI: Ou te manatu ua manino ao le a avatu pea le avanoa i le Minisita mo Fesootaiga ma Faamatalaga Tekonolosi.

Afioga Hon Tuisugaletaua Sofara Aveau: Faafetai, leai o le manatu e tau fesoasoani atu ai o support staffs are professionals, o accountants are professionals o i latou na o support staffs ina nei tei ua tuu mamaina ai le latou tautua ao professionals foi latou.

Afioga Hon Palusalua Faapo II: Lau Afioga i le Fofoga Fetalai, ua ou alofa lava i le saunoaga matagofie a le sui usufono talofa e, e le malamalama o i le mea lea e te saunoa atu ai, o le mea moni lena, fai fai malie, toe lauga ai foi i se isi taimi sei tau faamalamalama Afioga i Minisita ma le la itu.

FOFOGA FETALAI: Ou te manatu le sui usufono ua malamalama ma manino lau folasaga.

Afioga Hon FAUMUINA TIATIA FAAOLATANE LIUGA: E leai o lea ou te fia pai leaga o lea ua tau le accounting po o accountants they are professionals, e le o ni supporting staffs tagata na, o secretariat staffs those are the support staffs, ao accountants they are professionals.

Lau Afioga i le Fofoga Fetalai ua lava ia lea, ou te faafetai atu foi i lou Taitai le Afioga i le Palemia o le Afioga foi lea o le Minisita o Tupe, le Sui Palemia ma Minisita o le Kapeneta, a i ai lava se isi e lei oo atu i ai sau faafetai o lou agaga e faafetai atu. O ou moomooga ia foai e le Atua lo outou soifua, ia faamaloloina o outou gasegase...

FOFOGA FETALAI: Ia le sui usufono mo Siumu o se professional lea e te tulai mai ai?

Tofa Hon Tuuu Anasii Leota (Siumu): Lau Afioga i le Fofoga Fetalai, ou te le fia talanoa i ia mea, e leai foi se agaga e fia faalavelave i le saunoaga matagofie a le sui usufono mamalu. Ua ou tulai atu ona ua alu lenei aso o ou faalogologo ma lou loto ua fatuatia ona o le tele o le tele o saunoa i le Palemene o le faafetai lava i o latou auala ua fai, faafetai i auala ao lenei lava ta te nofonofo atu e leai sou auala ua faia. Ou te faafetai i le sui usufono mamalu o loo saunoa ona o lea ua na taua e i ai le vaegatupe e fai ai auala. O lea ou te talosaga atu ai i le sui usufono ao i ai se vaegatupe sei alofa mai e aumai se isi mea sei fai ai lou auala lea e fia fai. Ma lou faaaloalo lava.

Afioga Hon FAUMUINA TIATIA FAAOLATANE LIUGA: O lea ua tatalo mai ia te au ae tataua ona tatalo ia manifesto. O loo i ai lava toe Sagone i le Minisita o Galuega, Felauaiga ma Atinae Eeseese, o le personalty le isi mea e fesoasoani aua a le lelei le personalty o le mea lena e tupu.

Tofa Hon Tuuu Anasii Leota: Sa ou taumafai mai lava i le amataga i le Minisita o lona e silafia lelei lava o le 2011 seia oo mai nei, sa ou faamolemole, ua ta faaoleole, ua oleole, a ua saunoa le Palemia a le lelei ua tuli mamao i o ua leiloa poo fea e maua mai ai, lea o le a fai lau tatalo leleoa. Ia malie le Afioga i le Minisita pe alu alu lona finagalo ae toe alofa mai i lou Itumalo, faafetai.

FOFOGA FETALAI: Tuu i le Atua lou auala le sui usufono mo Siumu. Tulai mai le Minisita mo Galuega, Felauaiga ma Atinae Eseeese.

Afioga Hon Manualesagalala Enokati Posala: Lau Afioga i le Fofoga Fetalai, e i ai upu foi nei a le atunuu ua le maa i maa a ua maa i aau, e ese le mataupu lea ao lea e – o mataupu faapea tatou te lioilo i ai ao le saga toso o le – e te fiu lava e toso le solofanua i le vai ae a le fia inu lava e le mafai ona faatino. O le tupe lea e aumai i o e le atoa se \$5milionae ae a fuafua i le maintenance o auala e tele polokalame o lo o faagasolo e lei taitai. O le mea lea ou te faafetai ai i le sui usufono mo Sagaga le Falefa fai le loan. Ona pau lava lea o le auala e manatu e mafai ona faatino ai a tatou auala, ia tatou o e loan mai e fai ai o tatou auala ona iloa lea ona tino ma lelei, ao le saunoa mai o le itu lea, ou te le iloa pe faapefea ona faatino pe a leai ni a tatou tupe e faagaioi ai.

FOFOGA FETALAI: Malie le sui usufono mo Siumu o lea ua manino le mataupu, lea o le a tatou toe o solomuli, ae lafo ia e manatu ua faafofoga le Minisita i lau oleole ma lau agiagi ia tatou tuu i le Atua le faamoemoe masalo e le o toe mamao ae fausia lou auala.

Afioga Hon Palusalua Faapo II: Lau Afioga i le Fofoga Fetalai, leaga e matuia le tuuaiga o lenei Itu. Ia faafofoga lelei lava ma faitau i le upu autu o lo o aumai i le Tala o le Tupe, “fua le manao i seleni ua maua” E leai ni loans, o lona uiga ua outou le taliaina le tofa ma le faautautaga a le Palemia. O lona uiga ua outou tetee i le Tala Autu o le Tupe? O le mea lona e tupu ai lo tatou fevaevaeai ona e tataua ona lagolago e le Minisita le saunoaga a le Palemia e tusa ai o le Tulafono Tau Faaofi o le Faatatauina o Tupe 2015/2016. E le o tetee le Itu lenei i le loan, ae fuafua lelei e pei o le Tala o le Tupe o i ai nei.

FOFOGA FETALAI: Malo, talu lava ona e Komiti o Tupe ua e lelei i mea tau tupe.

Afioga Hon Manualesagalala Mati Tuigamala Enokati Posala: Lau Afioga i le Fofoga Fetalai, e vala lava i Sini le mea lea – o le uiga o le mea lea sa taumafai ia tatou o e faatino le vaega lea e mafai ona faaleleia ai a tatou atinae, ao le mea lea e aumai o le mea lava lona ua alu ai. O le taumafai mai lava ina ia faapaleni, faapaleni, faapaleni o lea lava ua tatou agai lava e faapaleni.

Tofa Hon Tuuu Anasii Leota: Lau Afioga i le Fofoga Fetalai ou te lagolago pe afai e fai se loan fai loa ma fai ai ma lou auala. Faafetai lava.

FOFOGA FETALAI: Faaiu mai le saunoaga le sui usufono mo Palauli le Falefa.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai, ao le a ou pai i lou Itumalo pele i le loto o Palauli le Falefa. Susu lau Susuga i le Toeaina o le Pulega Susuga Leaso Tupai faapea le aao tusinga o le Pulega Susuga Niulala Kupa, faapea foi le aao tusinga o le Sinoti o Savaii Sasae faapea foi le nofo a Faafeagaiga e fia i lo tatou Itumalo malo le tapuai.

Susu le Lau, afifio Aiga Salevalasi, lau Afioga Moe Tiatia o oe o le Ituala mavae, alaalatai oulua Togiai ma Falaa, le Falevalu ma Upu ia te oe Salemuliaga, afifio Aiga Sa Amituanai, Susu le Tagaloa faapea foi le Gafa i lau faautautaga Safune ma Taulauniu. Susu lau Susuga i le Faasua i Ao, afio lau Afioga i le Aloalii Fepuleai, o oulua Suafa ma Tagoai, lau Fetalaiga Laumau ma le paia ia Satala, Susu Aiolupoao, Afifio oulua Suafa Lefau ma Faumuina. Afio foi le Tamaitai, lau Fetalaiga Mauisiisii ma le paia ia Saulutoga, Afifio Taufaaaisina ma alaala matuatala, o oulua Igoa Matua Ulu ma Lemaota, le paia o le Toiloto ma lo tatou nuu o Tafua. Faamalo le tapuai, faamalo le tatalo ua manuia ai faiva o la outou auauna. Ia manuia tele le tapuaiga. Faafetai i lau Afioga i le Fofoga Fetalai, manuia le Fono.

FOFOGA FETALAI: Faafetai i le sui usufono mo Palauli le Falefa, malo malele, faafetai foi timai, ou te manatu e leai se Salafai na te le talisapaia lau faalelegafulu i lenei afiafi, pau o lea aua nei aumaia le malae vaalele i Samalaeulu o loo lava Aopo ma Asau e fau ma faatele ai le tatou malae vaalele.

Ia le sui usufono mo Faleta Sisifo o le sui usufono mulimuli o le Komiti o Tupe Maua ma Tupe Totogi, ona sosoo mai ai lea ma le Taitai o le Itu Agai ma le Sui Taitai ao lei tali le Taitaifono o le Komiti.

Tofa LEALAILEPULE RIMONI AIAFI: E momoli le faafetai i lau Afioga i le Fofoga Fetalai mo le avanoa taua o lenei Itumalo, o le taimi tonu lava lenei na ou fia lauga ai. O le taimi ua i ai i maota ma laoa Samoa, ua uma ona sii le faafetai i le Atua i lenei aso matagofie sa galulue ai i feau ma galuega, o le taimi lenei e pei ona masani ai Samoa i le faaiuga o poula ma a latou tala. Ua fetau foi ma le faafofoga mai i lenei afiafi ma ua talafeagai ma le taimi e lauga ai le sui usufono mo Faleata Sisifo.

Lau Afioga i le Palemia ma lena Itu o aso faapenei, o upu a le atunuu o le aso ma le filiga o le aso foi ma le mataigatila. Ua lamalama faaiu la tatou Paeaiga ma o avanoa faapenei sei tuu avanoa i nai sui usufono sei tuu saunoa ia latou lauga. Na fai mai se tasi o tama matua o le Palemene, a e lauga e le taua matou nei e i i, a ia e manatua o lo o faafofoga Samoa ma le atunuu atoa. O le mau o le tusi faitauaso o lenei vaiaso ua talafeagai lelei ma le galuega a le Palemene, o nafa o le Malo, duties of the Government, o le amiotonu a le Atua i Malo, God's rightness in Governments oka le matagofie, o se feau ina a talafeagai ma le tatou galuega i lenei aso, aisea? Aua foi o le Samoa a ala ane i le taeao e muamua lava ona faafetai i le Atua i le aso fou ma le malosi faafouina. A o lei malolo i le po e ao foi ona toe faafoi le faafetai i le Atua i Lana tausiga ma lana leoloega ao feagai ai i feau ma galuega o le aso. O le faavae papa lea o Samoa o totonu o aiga, totonu o nuu ma le Palemene lenei,

lea e mafai ai ona mauaa, mautu ma lelei le Faigamalo. Aua foi a tatou Fono o la e tapuai e oo mai lava i le taimi lenei aisea? E leaga o le manuia o Samoa e afua atu iinei i le Malae faautugatagi a Samoa, o le fetu taiala i taimi ma le lamepa e ao ona susulu i aso uma aua Samoa, tatou te manuia ai...

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Lau Afioga i le Fofoga Fetalai, o le po foi ua ligoligoa ae pe mafai lava ona toe tuutuu ane i luga lou leo e tau le lagona atu i le Itu lenei.

Tofa LEALAILEPULE RIMONI AIAFI: E manatua foi na ou fai atu o le taimi tonu lava lenei na ou fia lauga ai, ua uma foi le tau tulemoe ua uma ona tausasami, tusa o lea e amata lemu lou leo ae lei oo ina heat lou leo, ae faafetai i le Afioga i le Palemia, ona ou faatulou lea i lau Afioga i le Fofoga Fetalai, lau Afioga i le Palemia ma le aiga Kapeneta ma sui usufono mamalu o lona Itu. Ou te faatalofa atu foi i le Taitai ma le Sui Taitai, le paia ma le mamalu o sui usufono o lenei Vaega Faaupufai.

Ou te faatalofa atu foi ma ou faatulou i Lana Afioga Mamalu O Le Ao o le Malo ma le masiofo ma le paia o Samoa i ona tulaga faalupe ae a le Aufai Tatalo, faapea foi le Itumalo mo Faleata Sisifo o lo o taputapu mai, faamalo le tapuai i lenei tausaga. O le talitonuga lautele, o lenei olaga ua outou soifua ma tatou ola ai o se faigamalaga is a journey, amuia tatou lea ua aofia i o tatou tala faasolopito i totonu o faigamalaga lea sa avea ai i tatou ma Taitai o Samoa. O lenei vaitaimi ua latalata ina maea le Paeaiga, ua ese foi le vaai, ese foi le fauina o le lauga. O le taimi lenei ma le talitonuga o lou nei sui usufono pea a ou tu ma toe vaavaai i tua mai tausaga e 4 ua tuanai, po o le a se sao ma se aoga na ala ai ona omai i le Palemene o Samoa. Aua foi e le na o i tatou o tilotilo i tua, e tilotilo i tatou i tua ae tilotilo ai foi ma le Itumalo ma Samoa, pe aoga ona toe aumai tatou pe leai aua o lea tatou te Fono iinei ao la e felauai lava tagata palota a isi sui usufono o lo o taumafai mai i le palota, o le latou lona aia tatau, ao le sui usufono e tumau lona faatuatua e filifili i tatou e le Tama o i le lagi e leai se mea e popole ai, e moe taagulu i po uma e fialia ma lototele ma toe sauni sona suti fou e toe faatauto ai i le tausaga fou. Amene.

E muamua ona ou faamalo leaga e tatau le faamalo ma le faafetai i le Malo i galuega tetele sa feagai ma outou i lona foi tausaga faale-tupe seia oo mai i lenei taimi, o galuega uma lava, e oso atu i fafo savali i le auala, ki atu le paipa lae ola, ki le moli la e mumu, alu i le aoga e ave lau fanau, alu i le falemai o mea masani. O galuega uma nei aua tatou, ou te faafetai foi i lea itu i lau Afioga i le Taitai ma lenei itu, faamlo le galulue, tatou galulue faatasi ma le Malo aua galuega. O le talitonuga e sii le malosi o le Malo e fuafua i le malosi o le Itu Agai. O totonu o le Paeaiga lenei mai le 2011-2015, e 133 Tulafono Tau Faaofi e le gata o Tulafono Tau Faaofi ua pasia ao Tulafono ua faataatia, e le o se galuega faatauva, e ave ai le faamalo ma le faafetai sa outou gapatia ma galulue ai.

Faafetai i lau Afioga i le Failautusi o le Fono Aoa ma le Matagaluega, e ui ina le lava le Tala o le Tupe ae ou te talitonu o le a fesoasoani malosi aemaise o Komiti Faapalemene e fesoasoani i galuega a le tatou Maota. Faafetai i galuega mo lenei Itumalo, o auala tetele, eletise, suavai, faafetai mo le vai ua faataunuu mo Falelauniu ma Vaitele fou, lea ua uma le phase 1 ao lea ua oo i le phase 2. Faafetai foi i le mea lea ua fai i le vai ua eli itu e lua o le isi lea

vaega e taua tele ona ua le toe kolosi ma tipi ai le auala, o vaega taua tele ia e avatu ai le faamalo i le tele o nei galuega tetele. Faafetai i pisinisi, faleoloa, fale gaosimea, Faletupe ma atinae uma o i totonu o lenei Itumalo, e avatu le faamalo. O le auauanga a le Malo e ala i le Matagaluega o Leoleo, Fuimu, Malae Taalo, Malae Fono ma soo se Matagaluega ua i totonu o lenei Itumalo, e avatu ai le faafetai. Faafetai ona o fuafuaga a le Malo o le a sii le Falepuipui, o le tasi lea vaega taua ma ua faa-avanoa foi lenei eleele aua nisi atinae ma le tele o nuu o loo fia maua ni fanua ae faafetai mo lea fuafuaga a le Malo aemaise o le fanua tanu o lo o i ai.

O le agai i luma ua i ai le fuafuaga a le Malo mo le uafu tele i Vaiusu atonu o se taimi lata mai ua faataunuaina lea atinae a le Malo. E le gata i lea o le four lane lea e faaauau atu seia paia Vaitele i le pito i o ma faasolo atu ai i na nuu, o le tasi lea galuega tele e faigofie ai femalagaiga ma atili aulelei ai lenei Itumalo. E le gata i lea ua lagolagoina foi e le Matagaluega o Aoga, Taaloga ma Aganuu la tatou talosaga mo se Aoga ona ua faatupulaia le faitau aofai i totonu o aoga. Ua maua le fuanumera ma o se taimi lata mai ma alaga tataua ona faatuina lea o se isi Aoga fou i totonu o le tatou Itumalo. E le gata o se Primary School ao se Secondary School. E le gata i lea o auala i Falelauniu, o le tulaga ua i ai ua maea ona talanoa ma le Ofisa Sili o Pulega a le LTA, o le faatinoina o nei auala mai le amataga e ao ona toe faia faalelei ona tuuina atu lea i lalo o le vaaiga a le LTA. O le mea lea e talosaga atu ai i lau Afioga i le Minisita mo Galuega, Felauaiga ma Atinae Eseeese, faafetai o lena ua lelei nofoaga, maua le vai, maua le eletise a ua tele le faaletonu o auala, sei tagai ane i ai ona ua faatupulaia tagata o loo afifio ai i lea vaega aemaise o auala o Toamua, lau Afioga i le Minisita o le auala lenei sa i totonu lava o le lisi mai le amataga o lenei Paeaiga, afai e le i aveesea ae taatia ane lava iina atonu e fai fai lava faatino. O nisi nei o galuega ma atinae e momoli atu ai le faafetai tele a lenei sui usufono aua le amanaia o lenei Itumalo, faafetai galulue.

Ona ou oo mai ai lea i le Tulafono Tau Faaofi o le Faatatauina o Tupe 2015/2016, muamua ona ou faafetai i le Taitai o lenei Vaega i le filifiliina o Au i totonu o lenei Komiti o Tupe Maua ma Tupe Totogi, o le tasi lenei Komiti taua o le Palemene ua matua lava le malamalama i le fausiaina o le Tala o Tupe i so o se vaega. I lou lava tagata ou te matua faafetai ona ua tele lava le lesonea ma ua ta malamalama ai i vaega uma, e mafai ai foi ona fai la ta ita lava iloiloga, review ma assess performance o galuega a Matagaluega taitasi a le Malo, ta te iloa lelei ai lava le Matagaluega o lo o alu i luma, alu i tua, tutu ma mea uma faapena, ou te faafetai ai i lea vaega. O le Tulafono Tau Faaofi o le Faatatauina o Tupe 2015/2016 ua uma ona tagai i ai lenei Komiti, e le toe oo foi i ai se faamatalaga aua e pei o mea lava o lenei olaga aemaise o se masini po o se taavale e fealuai o so o se mea lava e fealuai ai o le kia, a oo ina lelei le auala ua alu le high kia (gear) ae a oo foi ina leaga le auala ua alu le low gear, e fetuunai lava le alu o le taavale i le taimi o le lelei ma le leaga, o le taimi o le sousou ma tulaga faapena, e fua le tala o le tupe i le tulaga o i ai le tamaoaiga o le atunuu. O luitau masani lava, na ou sau lava i lenei Palemene o luitau masani lava, galuega, tau o le soifuaga, eletise, auala, suavai, ou te talitonu e omai foi isi Paeaiga fou o luitau masani lava e le o ni mea fou o faafesagai ma tatou. O lona uiga o lenei mea o le aitalafau e le mafai ona alofia, ao lena ua avatu le fautuaga a lenei Itu ia fai fuafua, fuafua i le gafatia ona totogi, fuafua i le tamaoaiga ma le agai i luma. Ua saunoa nisi o sui usufono ia matua fai ni aitalafu. E faamalie ma faamalulu atu e le aoga

saunoaga faapea, very irresponsible i lou lava talitonuga. E leai lava se isi o tatou e le o manao e fai ni galuega i o tatou Itumalo, ae fai fuafua ma fai i le gafatia. O lau aotelega i le Tala o le Tupe a Matagaluega a le Malo, na o se fautuaga ma se tuualalo, o lau vaai i Matagaluega e gasolo mai o le tele o Matagaluega ua matele i le process e process driven le faiga o galuega, ia o le mea lea na sau ai, e faapea o le mea lea e faapea ona fai, manatua foi o le tatou Tala o le Tupe ua leva ona output performance. O lau fautuaga afai e iloa se mea lelei ua tatau ona fai ma sui, sui loa. O le tulafono na o taiala ae a silasila atu o le mea ua tatau ona sui ma o le galuega lea a tatou e fautua le Malo e fetuunai ma sui le Tulafono ona ua le fetai leaga ua suisui aso. Ia sui mea i le faafaigofie, aua le fefe, ave le fautuaga e faaoga le tofa loloto na tuu atu ai oe e taitai se Matagaluega o le mea lena. E faanoanoa lou mafaufau o le tele e alo i le Tulafono, se o Tulafono e le o tusia i ni papa maa, e fia Tulafono e mafai ona suia. Na o se fautuaga lautele i Matagaluega a le Malo mo le agai i luma, o lau lea tilotilo ao ou galue ai i le Tala o le Tupe.

Lau Afioga e pei ona ou taua, o lau lauga e le o ni mea fou ae na ona faamanatu atu i le Malo i mea sa ou tuitui ai pea mai le 4 tausaga ua tuana'i atu, o nisi vaega ua faatino ma ua tali mai e momoli atu ai le faafetai. Ae o nisi nei o vaega atonu e i ai se taimi o talafeagai o totoe o lenei Paeaiga mo le agai i luma a mafai ona faatino e momoli atu le faafetai.

Lau Afioga i le Sui Palemia, manatua sa ou laga i lau lauga i le amataga le Tulafono lenei o le Wholesaler ma le Retailer poo fea ua oo i ai lea vaega. Afai ua faatino ma faataatia faafetai ae na o se faamanatu.

Tofa Hon Fonotoe Nuafesili Pierre Lauofo (Sui Palemia): E momoli atu le faafetai i le sui usufono mamalu mo le toe aumaia o lenei Tulafono, o le Tulafono lena ua i le tatou Ofisa masalo o la ua faagasolo le faaliliuina i le gagana Samoa atonu po o le isi tauaofiaga o le a tuuina ma ai i luma o le Maota mo le lauliuina ae taua tele lenei Tulafono atonu ua talafeagai foi le laga mai e le sui usufono ona o le tele o taimi sa ou tautala ai, ua fai sina umi o tau tapena le Tulafono ona e tele lava nai lavelave sa feagai ai ma le galuega a ua maea.

Tofa LEALAILEPULE RIMONI AIAFI: Faafetai, vaai i le manaia o le fesili, malo galue, faafetai ua manaia lea vaega. O le vaega lea e lata mai na outou faafofoga i ai ma sa tatou talanoa ai i le Child Labour po o tamaiti ia e faatau oloa i le auala. O lea ua fai mai le Matagaluega o Aoga, Taaloga ma Aganuu o le latou Tulafono e gata i le taimi o Aoga, ua saunoa mai le Matagaluega a lau Afioga i le Sui Palemia, o outou o le formal sector e le oo i le ituaiga mea lea e i ai le vaega lea. E faapea foi le Tulafono lea o le CRC, o lea o le a ou fesoasoani atu, afai e lelei ona toe tagai i le Tulafono e toe teuteu ai lenei vaega ona o le tele o mea lelei tatou te faia, ae a tu lau taavale e faatau sau meaai i se vaega o le taulaga ae laga ane tamaiti ma nei oloa faatau e tele lava le afaina ai o – ae tatau ona i ai se Tulafono e kava ai ia vaega. Ae manatua foi sa avatu lava le fautuaga malosi i le taimi na aumai ai le Compulsory Education Law ina ia tuutuu i luga po o le 16, 17, 18 tausaga, ua laitiiti tele le 14 tausaga i le taimi nei ua na o se fautuaga e tuuina atu.

O le isi vaega lau Afioga o mea lava nei mai le amataga o le Cost of Foreign , cost of setting up of pisinisi iinei i Samoa e a le tagai ai i lea vaega. Ona talu ai e le i maua sou avanoa i le taimi o CECES Bingo, ona pau lea o le mea sa

ou fia faamamafa i lau tautalaga, afai o tagata nei e fia omai e tele tupe o le a le mea e le amata ai le mea lea i se funding, o lena e sau ai i totonu o le lisi o galuega, a le aumaia a latou tupe i totonu o le Development Bank, fai se funding e aumai ai latou tupe just for development purposes mo galuega atinae. E aumai a latou tupe e tuu ai totonu ona fai lea o galuega a le Malo ma prioritise e le Malo le mea e tatau ona ave i ai a latou tupe ma faafaigaluega ai ia maua sina latou interest laitiiti ao la e maua le latou investment.

O le isi vaega lau Afioga e tatau lava ona faaleo, ia te au ma lou itumalo i le vaai pea i le faatupulaia o pisinisi ia a Asia ma Saina i le faasolo atu lea i le itumalo, se i tagai lelei i ai lau Afioga i lea vaega, ou te le popole i tagata e omai, omai tupe fou, new money, new business, pisinisi fou, ae a omai e tauva ma toe compete ma o tatou tagata, ia o lena e te silafia o oe foi o le faipisinisi, e faigata tele ona tatou tauva, se i tagai lelei ma se i review ma monitor le mea lea e tupu, aua o le mea lea e i ai, a omai fai le faleoloa e tasi, e le umi, lua, tolu, fa, a o le tagata lava e tasi, ia ou te le tau fai atu o lea tou te soifua ma o tatou ola uma lava i Samoa, o lea tou te tagai ma ou vaavaai i le tulaga lea ua i ai. Se i silasila ane i ia vaega i le agai i luma.

Lau Afioga i le Palemia po o le Minisita o Tupe, faafetai mo le vaegatupe lea ua ave i le insurance foi lea o le Regional Insurance Scheme, e taua tele le mea lenei, ona o lea e le o po se lilo i le afaina soo o tatou ma Atunuu o le Pasefika i nei mea o faalavelave faalenatura. Pe le mafai ona vaai ae toe tuutuu i luga, ona pau le kava lea e i ai e \$40miliona i le tausaga, manaia si na tupe e amata ai, a o le mea lea tatou te vaavaai i ai i le tele o faalavelave e tulai mai, e le i lalo o se \$200miliona. Se...pe le mafai ona toe tagai lelei iai, aua o le tupe lea ou te talitonu o lea e faatupe ma fesoasoani mai ai le Malo o Iapani, pe mafai ona tatou toe talanoa e tuutuu laitiiti i luga.

Lau Afioga i le Minisita mo Faatoaga ma Faigafaiva, ia e leai, e le tau vivii lau galuega, se o galuega e fai fua, o lea ua matou vaai, e avatu le faamalo, leaga o le political stability e omai faatasi ma le mea e tau o le economic stability ioe, a lelei le tamaoaiga, e faapena foi ona lelei le tatou galuega o lo o fai. O lea ua tatou vaai i ai, a tuai ona faatino le secondary industry, e tatou te foi lava tatou i le primary industry lea e i ai faatoaga. E le mafai foi ona malosi secondary industry pe a le lelei ma mautu ia faatoaga. A tatou manao foi e export, e le mafai ona tatou export pe a le faamalieina tatou maketi. O lea e momoli atu ai le faafetai i lau Afioga, aua o le luitau lea o lea e feagai nei ma oe mo le agai i luma o le subsidize-ina o le import, e \$400miliona le tupe Samoa lea e faaalu i oloa mai fafo e aofia ai ma meaai, tele meaai i tausaga uma. A mafai ona tuu nisi \$100miliona pe \$150miliona e atiae ai a tatou pisinisi ma mea nei ma tatou faatoaga e taumafai e le vaega lea, e momoli atu le faafetai. Faafetai mo faleia ma galuega uma ua fai, ia o na galuega, malo faafetai.

Lau Afioga i le Minisita mo le Soifua Maloloina, ia malo galue, faafetai. E tele luitau o lau galuega, e le faigofie, o lea tatou te vaavaai i ai i aso uma ma taimi uma, a o lou talitonuga, o le ki o lau galuega faa-Fomai, o le sao lea ma lelei le pogai o le mai, le diagnose-ina o le mai, ia sao. O le fesili lau Afioga, po o tai oo mai le tatou CT-Scan lea e tatou te fono ai pea ma faamanatu, e le gata i lea, a o masini foi ia i totonu o le Lab, e tele o tagata fai mai o la e ave i Niu Sila ave i Niu Sila, a o le tele o isi mea ua leva ona tatau ona test iinei i Samoa. O lou lea talitonuga lau Afioga, o le ki lea, o le ki lea o nei mea uma, o le mea lea e tupu ai ina faaletonu le tele o gasegase, e le o sao le diagnose-

ina, e le sao ona togafiti ona o le sese o le mafuaaga. Ia taatia atu i lau Afioga, faafetai lava i le mea lea ua vaai ai i le nusipepa i isi mea ia o peanut butter ma isi mea ia ua maua mai nei ua taofia e le Matagaluega, o le mea e aupito sili ona faanoanoa ai, o le upu lea fai mai, unfit for consumption e le mafai ona taumafa ia ituaiga meaai, e tatau ona avatu se malosiaga faapitoa e test uma ai meaai uma nei e import mai fafo, tele le faaletonu.

Ona ou oo mai lea lau Afioga i le Primary Health Care, o lea ua maua tala e le o toe o i tua fomaini foi ia private ia i tua i falemai i tua. O lou talitonuga lau Afioga, e tatau ona faaauau lea auaunaga, afai o lea na lelei ma faatino mai i tausaga ua tuana'i, aisea ua taofia ai? ae concentrate tuu atoa lo outou malosi i le falemai i Motootua, o i e merge ai la outou performance, ae taatia tua e faaauau le faiga lea na fai ai, o fomaini i tua o la e tele le...taumafai tatou falemai i tua e vaai tua.

Ona ou oo mai lea lau Afioga i le mea lea o le Diabetes Clinic. Ia atonu foi o lea na laga i se isi taimi, e toe tagai i ai lau Afioga i lea vaega taua tele. O le mea lea e fesili ai lou mafaufau lau Afioga, o lea ua tatou malilie nei e tax ia sikareti ma le ava malosi, pei o le mea lava lea e tatou te o muamua i ai, a o lau fesili, e fia pasene o tagata nei e gasegase e mafua mai i mea nei pe a fuafua i meaai? Aua i lou talitonuga, o le tele o le mai ma le faamai, o meaai, se i tagai i vaega ia aemaise meaai ia mai fafo.

Lau Afioga i le Minisita mo Fesootaiga ma Faamatalaga Tekonolosi, ia malo, malo foi le malaga manuia ua matou vaavaai atu ua e afio i o aua nisi a tatou galuega e tele o lo o taumafai i ai, ia e le tau faaali i lau Afioga le tau o le internet lava lea mai i le amataga e ta te finau soo ai, ae faafetai o lea ua maua ia o le a tatou onosai i le Marine Cable lea ua foufou mai, atonu o le a fesoasoani lea mo tatou. Ia a o lau fesili i lau Afioga, o le taou Broadband lea uale investment foi lea a le tatou Malo lea e \$40milion ma ona tupu, o se matua investment taua tele, po o le a tonu se ituaiga faaogaaga o i ai i lenei taimi? O le matuai tele o le capacity o le mea lea, ae ou te talitonu e le o mafai ona fully utilize ona faaoga uma, aemaise o le va ia o Matagaluega a le Malo, ia e le o mafai foi ona faaoga le internet ailoga o i ai se puipuiga i lenei taimi, ae ou te lagona a tatala ma le mea lea le internet, ua matua faigofie ma tuutuu i lalo le tau. A o nai vaega na e toe faamanatu i lau Afioga leaga e taua lau matafaioi, o oe e faamoemoe i ai le agai i luma o le aoga, falemai o mea uma i le faafaigofieina o le faatinoina o galuega.

Ona ou oo mai lea lau Afioga i le Minisita mo Galuega, Felauaiga ma Atinae Esee a le Malo, faamalo galue, faafetai i galuega faatino. O le tausaga na tea nei pe a manatua e lau Afioga, na mamafa lava lau tautalaga i mea ia o totogi aemaise lava i salary scale ia i le eseese, na aumai le Tala o le Tupe i le tausaga na tea nei, na aumai ai e ese le scale lea i le Principal Level lea e i ai ia le PSC, sa ou matuai ou fesiligia lava le amiotonu o lea mea, ona i lou talitonuga, e le tatau ona ese mai latou i isi Matagaluega a le Malo. O lea na saunoa manino lava lau Afioga e le i leva atu nei na saunoa lau Afioga, one rule for all, e tutusa tagata uma, e tasi le tulafono e faafoe ai galuega a le Malo ma tagata faigaluega. O lea la ua aumai nei le Tala o le Tupe lea ua aumai nei, ua le gata ina tumau pea le mea sese lea i lou talitonuga, ae ua toe tuu atu ai i totonu ma le Treasury, ona pei lea e foliga mai ia te au, pei se backdoor deal foi lele, pei se mea foi lele, ua lava tatou, a fai e outou ona aua lea le toe pisa, a fai e matou ona talia faatasi lea o tatou. Ae a faapefea le lautele o Matagaluega a le Malo? E amiotonu lea mea? Lau Afioga e tatau

ona toe tagai i lea vaega, e matua le amiotonu ma talafeagai i lou talitonuga le ese o le grade e amata ai le Principal Level a le PSC ma le Treasury mai isi Principal Level uma a le Malo, e le tatau ona eseese.

Ia lau Afioga atonu foi ua e faafofoga ma fai sou finagalo foi o le tuualalo i lou lea talitonuga, i appointments CEO ma ACEO. O le CEO i lou talitonuga, ua uma ona pasia le Tulafono, ua uma foi lena taimi na pisa ai Samoa i ia mea, o le CEO, o le CEO o le matafaioi a le Kapeneta atoa a Minisita, e le o se mea tau interview ai fua i lou talitonuga, fai le lisi avatu toe fonu ai le capacity, mo le silafia lelei, e filifili e outou, leaga o le tagata e tatau ona outou galulue, e leai se isi e toe pisa po o a nisi faitioga leaga o le CEO o le CEO a le Minisita, ma e leai foi se isi e alu atu e interview se tagata, e tasi lava le tagata e tatau ona tilotilo i ai, o le tagata o la sa galue ai ma review le performance a lea tagata i le tolu tausaga, o lou lava lea talitonuga maumaututu. E tatau foi i lou talitonuga na o au lava ia, o avanoa nei i luga o CEO o taitai o le Malo, e tatau ona tutusa ma tatou nei o sui usufono, omai iinei e nofo ai pe tolu tausaga pe a, se i vaavaai i le system ma iloa a latou mea ia e fai. E le o se faailoga tagata po o se faailoga lanu, e fai foi i isi atunuu, o lena foi e fai i tatou Labour Law, ioe, a omai tagata mai fafo iinei e run ai, aumai lava na o Chairman Manager, o le Technical Advisor ma le Financial Controller, a o isi galuega uma, sue i Samoa o lea e i ai tagata Samoa e faia. E faapena lou lagona na o au, ioe, o tagata ua lava o tatou tagata, ua faulalai o tatou tagata ua atamamai, o galuega foi a outou o le capacity duty e faia a tatou galuega.

O le ACEO lau Afioga, ia leai e sao lau Afioga o lo o i ai le process, a o lou talitonuga e tatau ona ave i ai se right of appeal, tagata nei pei o isi tagata faigaluega, e tatau ona ave ina ia vave le process, aua o le mea lea ua tupu, ia o nai tagata ua faamuta faafuasei, ae leai se mafuaaga. O le mea lea e ofo ai lou loto e fai mo review, annual review, fai return review, a fai la reviews ia ae tagai atu le PSC ma le Faauluuluga o le Matagaluega e le o perform, tau i ai, sue sau galuega o lea e vaai atu e le o mafai ona measure lau performance, a lea ua uma ona fai performance indicators, ia o se tuualalo lea i lau Afioga.

Na saunoa nisi o sui usufono, is a major restructuring le mea lea ua i ai nei le PSC ma Chairman. O le fesili lau Afioga, o fea tonu le mea lea ua i ai, a o le tonu foi le function lea ua i ai? E fia maua i ai se malamalamaaga. O le isi mea o le Salary Tribunal, ia oka se tupe lea e alu ai i tausaga uma tausaga uma, aua o function ia sa fai uma e le PSC i taimi foi o...aua e le faapea o ni mea e fesuiaia – ma e o le salary, pe fesui ai e outou, o le tali o le Kapeneta e i ai le faaiuga leaga e faigata e maaleale mea nei, ia tailo i ai i lau Afioga.

Ona oo mai ai lea i le Palota e pei ona alo atu i ai a outou Afioga ma tatou uma i le tausaga fou. Muamua, faamalo i le tulaga ua i ai le talosaga foi a lenei itumalo i lau Afioga i le Palemia ma le Taitaifono o le Komiti ma sui usufono mamalu uma. O le finauga lava ia o le mea e tatau ona fai, e le o se finau malo o se isi, faafetai mo lea tulaga. A o le mea lea e fia maua i ai se malamalamaaga, i le matou lava itumalo e pei ona taua foi e le sui usufono mo Vaimauga, ua tele le le mautonu o tagata, ua confuse, pei foi la o le mea lea e tupu i lou itumalo, mo lo outou silafia, o lea lava e oo mai lava i le taimi nei pe afai e fia o i le Urban, e le i tatalaina lava le faiga o le lesitala, o lea faatoa tatala nei mo Vaimauga i le itu lea, faatoa tatala matou i Faleata ia Iulai, o lona uiga a tatala ia Iulai, Iulai, Aokuso, Setema, Oketopa, e na o le fa masina e fai ai le galuega, aua o Novema i le aso 4, o Novema ia e le mafai ona fai

aua e fua i le taimi o le Faiga Palota, afai ua tatou taua o le Transition, o lona uiga o le mea lene e tatau ona tagai i ai, ona e tele le suiga lea e i ai nei i le Lola Palota ma mea uma, aua o le mea lea e tupu, afai e le mafai ona aveese tagata ia e taua o le Urban, a o atu la matou i le taimi nei e faapea e lesitala a latou fanau, po o latou uso ma tulaga faapena, ua le mafai, ua illegal, o lona uiga la o le a faapalota illegal lava la tagata ia i totonu i le taimi nei pe afai o le tulaga lene o le a i ai? O le isi mea lea o le kinship, o le tala lea e faamalamalama mai, afai o au e matai, e mafai e lou atalii ona palota mai, ae le mafai e le atalii o lou atalii, lona uiga e le mafai e lou grandson, grandchild ona palota mai ia te au. E faapefea ona fai lea mea? E faapefea ona fai o lea ua tatou momotua le kinship faapea, e le o se aiga na o ia ma sou atalii, o le aiga e alu i lalo. O le isi mea, a o atu nisi sui usufono ma latou tagata o lo o nonofo i o latou tautua, manatua foi o le main requirements ia tatou e agavaa ai le sui e alu i le palota, o le tautua, a e le tautua ua le aoga lou matai, o lea la ua e alu atu e avatu, o tagata ia o lea e tautua ia te au, ae fai mai, e leai ni tautua i i, e na o tagata e kinship. O fea la le mea e faaoga a o fea le mea e le faaoga?

O le isi vaega o outou faletua ma o tatou taitoalua, o lea na ave le fautuaga, a matai, e mafai ona palota mai ia tatou e tusa lava pe a matai, ia ae fai mai e le mafai, O se Tulafono matua faavalevalea tele, e le mafai ona palota mai lou toalua ia te oe ae a faapefea ona fai? O nai vaega ia e tatau ona toe tagai i ai ia lau Afioga ma le tatou...mo le agai i luma, aemaise lenei taimi, e leai ma ni sui usufono toatele nei e le o fetaii ma faigata nei. O le Tulafono foi la e i ai i tai i o, o le tulafono lea o le a fia? tolu, fa au palota, o le Tulafono lava le la. Ia o le mea lea pei ona talanoa atu ai e fesoasoani, o le tala mai le Matagaluega, Leala, e le o matou ao outou e faia le faaiuga, afai ua outou tagai ai i le tulaga lene e sui foi e ouou ina ia talafeagai ma faafaigofie. Aua o lau tala lenei, o le Itumalo lenei o Faleata Sisifo mai le 2011 seia oo ia Aperila o le 2015 o tagata na resitala na o le 140,000. E faapefea ona fai i lenei 5 tausaga, o le mafuaaga na ou fai atu i ai e le taitai ona o tagata e resitala o tatou ua masani lava i le taimi mulimuli. O le toatele o tagata Samoa faatoa e fia palota pea alu lou aiga ma le tagata e te fiafia i ai, aua na o le resitala ae le palota aua e le o faamalosi. A le o atu tatou e fai tatou te o atu nei e fai ua tumu ao le tatou o atu e avatu o le fesoasoani lene i le latou galuega la e fai.

Lau Afioga i le Minisita o Leoleo ma Falepuipui, leai e pei ona taua pea le,,,

Afioga Hon Palusalua Faapo II: Lau Afioga i le Fofoga Fetalai, sei fai sina malologa a le sui usufono mo Faleata Sisifo, o le taua ia o mea nei e te lauga ai aemaise lava o le Faiga Palota, ao lea ou te vaavaai atu e le o ii le Minisita. Ae faamolemole lau Afioga i le Palemia sei faataua mea nei e saunoa ai le sui usufono mo Faleata Sisifo i Faiga Palota ona o tatou uma lava nei e afaina ai.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e leai se mea e te popole ai, tusa lava pe le o i ai i le Minisita ao lea lava matou te faalogologo atu. Ia manatua foi, a lauga lava le tagata ia o la e lauga i ana ia self of interest. O lea matou te iloa lelei o la e lauga le sui usufono mo Faleata Sisifo i mea e

manuia ai ia ao le Tulafono mo le lautele o le atunuu, ao lea ua e silasila mai lale ua matua moe gase lava.

Tofa LEALAILEPULE RIMONI AIAFI: Lau Afioga i le Taitai o le Itu Agai faafetai ua maua sina malologa, ua e vaai la i ai na e fai mai o la e tofa le Palemia ao la e matua i ala lava ma faalogologo mai i le taua o le mea lea ou te lauga atu ai. Faafetai, lau Afioga i le Taitai o le Itu Agai aua e te toe faalavelave mai out e le o toe taua le tatou Menifeso.

Lau Afioga i le Minisita o Leoleo ma Falepuipui, e avatu lava lau faafetai i fuafuaga ua i ai nei, o le po o le Aso Toanai na tea nei faatoa ou vaai lava lea i nim ea faapea i le taulaga, ua maligi ou loimata ma ou alu i le fale, e ese lenei ituaiga misa na ou vaai ai ae faafetai i le Fuimu, Leoleo ua ta fui solo le taulaga e tamaiti le mafaufau ma le...

Afioga Hon Faumuina Tiatia Faolatane Liuga: Lau Afioga i le Fofoga Fetalai, o lea e fai mai le aualii lea o le latou menifeso lea ua tau mai e le sui usufono mo Faleata Sisifo ia te au. E leai se latou menifeso, o la na tetee muamua ai lava le Taitai o le Itu Agai, o le matou lava menifeso ua leva ona tusitusi. Ma lou faaloalo lava.

FOFOGA FETALAI: E le o se menifeso o le mageso. Tulai mai le sui usufono e faaiu mai le saunoaga.

Tofa LEALAILEPULE RIMONI AIAFI: Faafetai i lau Afioga i le Minisita i au Matagaluega nei e lua i le Aso Toanai, e taua tele, ua ese le mea ua i ai tupulaga i lenei vaitaimi ae maimau pe ana i ai nisi mea malolosi sei matua aoai ai. E avatu le faafetai ona ua faigofie ona fofu le faafitauli i le galulue faatasi o le Fuimu ma Leoleo i lea po. O le mea lea e pisa soo a ii pagota sosola, o faamatalaga a le Falepuipui o le mea lea sa patino i le Matagaluega o Leoleo o le profile ina o tagata aua e muamua pue ata, ao le mea ua tupu e sue mai ata o le tele e leai ni ata, o lea ua talosaga mai e fai se latou IT e tapue ata o nai tagata nei e taugofie ma faaoga le proband lea na fai e le Malo e tuu i lalo e access le immigration ma mea uma ia faigofie ona iloa ai aemaise la e le gata i le faasalalau ma ii taimi ua sosola ai ae tatau foi ona toe faasalalau ma ii le atunuu ua toe maua ma faafetai mai, aua e tele lava ina faasalalau mai ua leiloloa ae le toe tau maia ua toe maua faamolemole lau Afioga i le Minisita.

FOFOGA FETALAI: Ua toe 5 minute o le sui usufono.

Tofa LEALAILEPULE RIMONI AIAFI: Lau Afioga i le Fofoga Fetalai, ua tele lenei 5 minute, ua lava lau lauga e sao ai nisi o sui usufono ua mavae e le toe malo ai nisi ia tatou mea e fai i le taimi lenei ioe, ae le taua foi ia te au lea mea. E taua ia te au pe na fai sou sao ao ou nofo ai i le Nofoa o le Itumalo.

Lou Itumalo faafetai lava mo le tapuaiga, e lei iloa lava le tonu o le tatou Palota o le mea moony lea, po o le Tradition po o le urban ao le mea taua ua maua uma e tatou le avanoa tutusa e filifili ai le sui e fia tauva pe afio e tauva i le Faleata Sisifo pe alu i uta i le urban, aua foi tout e faavaavaai mai poo fea out e alu ai, leiloa pe out e alu i Itumalo uma e lua, ae tatou tatalo i le Alii po

o le a lava le faasinomaga ma le musumusuga mo i tatou o le mea lena o le a tatou alu ai.

Lau Afioga i le Fofoga o le Fetalai, faafetai le tautai poto, a malu le Palemene e malu ia Oe, leaga o oe i lau faatofalaiga ma lau taitaiga ua manuia ai le Palemene o Samoa. E momoli atu lau faafetai, a na i ai ni au palota se afe e avatu uma ma oe.

FOFOGA FETALAI: Ua uma au tagata na e lau le sui usufono mo Faleata Sisifo. Ia faaii maia le saunoaga.

Tofa LEALAILEPULE RIMONI AIAFI: O le televise lea e pue mai ai lou ata e fia nai masina o totoe, faaalu i tua i nai toelaiina e vaai mai ai ma le manaia o tatou ata, e leiloa poo fea e ave ai nei ata na o le matamata atu ma matamata mai ae le tilotilo ai le Itumalo, ave a ii nai toelaiina o le mea lena e faaoga ai lou paoa.

Lau Afioga i le Palemia ma le Kapeneta, faamalo le onosai, oa foi ni a matou tuualalo ma ni fautuaga, o timaiga ma faitioga o mea uma lava e aofia i lo tatou i ai iinei i le Palemene o Samoa ao lo o lelei mea uma e leai se mea o faaletonu ia tatou galulue pea.

Faafetai foi i lau Afioga i le Taitai o le Itu Agai ma le Sui Taitai faamalo le galulue, o lea ua amata ona faafofoga Samoa i le tatou menifeso ae lei oo mai le aso e tuufaatasia ai. O le aufaigaluega ma e o galulue aua le manuia o Samoa ia faamanuia le Atua.

Faafetai mo lou avanoa ma ia soifua.

FOFOGA FETALAI: Malo saunoa i le sui usufono mo Faleata Sisifo. E pei lava o a tatou upu masani, tatou te sua lava le aulapa uta ma le aulapa tai, ia aua nei agiga le mea lena i le tatou Faiga Palota o lo o lumanai nei, ia tatalo pea i le Atua ina ia manino ma ia aoga i ai le itu e agai i ai, mo le silafia o ata uma nei tout e silasila i a ii le tatou Maota, o lea ua i luga uma i le tatou Website, silasila foi o le laina atoa le la o lo o nafa e uma loa ona upload taualumaga uma ata o le tatou Fono, o outou ata e le o vale tuulima o lo o maua pea clips e tai 15 minute a le tagata o lo o faapena ona tuuina atu i le lalolagi atoa e faasalalau ai Tualumaga o le tatou Fono. O lona uiga e le faapea o nim ea na ona faaali iinei ae le faatinoina. Ia mo le silafia e sui usufono mamalu o le www.parliament.gov.ws, ona outou silasila lea i taulaumaga ua agai i ai le tatou website mo le faalauiloaina o le tatou Samoa Strengthening Programme.

Ua tatou taunuu ma ii le masaga ma o le toe paga foi lea o lenei afiafi ona agai atu ai lea i le Taitaifono ma tali atu ai loa le Malo. Tulai mai se tasi o toe ulutaia o le Palemene o le foi sa avea ma Fofoga Fetalai e le toe tau faailoina, tulai mai lau Afioga i le Sui Taitai o le Itu Agai po o le sui usufono mo Falealupo.

Afioga Hon AEAU PENIAMINA LEAVASEETA (Falealupo): Lau Afioga i le Fofoga fetalai, i le ava e tatau ai ma lefaaloalo tele, ou te tulaia ai le pau o le fonousu a le atunuu, le Palemene a le Malo Tutoatasi o Samoa. A fio le Afioga i le Palemia ma lana Kapeneta ma sui usufono uma. E lagona lava le ee lau Afioga i le Fofoga Fetalai i lenei foi ituaso ona e maitauina le leva ona fonoa o le Maotaga nei, ua le o tulaga masani foi o a tatou

Fonotaga, i le tainane lea, o le faatofalaiga a le Afioga i le palemai ma le Kapeneta i le tele o tiute o feagai ai. Ona faapea lea, tau lava ina tau ane ai so matou leo e tulaia ai le Fonotaga nei i le agaga faafetai. Ia manatua foi lenei lau Afioga, o le Fonotaga lenei o le toe Tala Faatatau o Tupe lenei a lenei Paeaiga. O lona uiga e taua tele, e taua le avanoa leaga e seasea maua e faailoa ai lagona o sui usufono aemaise lava le saafi i aga ma faiga ma tulaga sa tatou uia i lenei Paeaiga. E tomanatu o le taimi lenei o le tatou toe saafi e manatua ai pe faapei lenei savaliga na tatou omai ai, o le faaiuga o le lima tausaga o le tatou Paeaiga lenei. Ona i ai lea o le manatu leaga ua ese foi le taimi, o le a faapuupu mai le itula le fitu minute sa matou taumafaiga, e ava tele leaga ua leva ona faaaogagase le Maotaga nei.

E faatulou atu i le Maotaga, se i matou talii ane i le tapuaiga a le itumalo nei aua o le tatou tiute muamua lava lea. I le nofo tapuai mai la a le itumalo o Falealupo i le afio o le Tupu na Faanonofono ia Auvaa, le mamalu i le Usoalii ae tainane le tapuaiga i le Toafa ma Silialaei. Faamalo tapuai, o se taimi tatou toe feiloai, e le galo outou.

Liliu mai i le tatou galuega, e le galo outou Afioga i Minsita o lo o fitoitonu. E momoli atu le faafetai a lenei itumalo ona o lo o maitauina pea le faatinoga o a outou galuega, e oo mai i lenei lima tausaga, talimano i mea matou te talosaga atu ai. O le a faauma la matou talosaga i nai mea o lena foi e silafia e lau Afioga i le Minisita mo Galuega o lo o fitoitonu ma galuega, e masani lava ona faataumatau atu le fanoga o lenei itumalo, faafetai. Faafetai tele mo auala, ae pei ona silafia foi si o matou aualata lea e i tai, e ui atu uma lava i ai le tele o tagata asiasi maimoa mai fafo, ia e le o atoatoa, ae o lena e silafia, pe na o le tasi lava le maila, e leai se ta o i ai. Ou te le iloa po o lelei le ta sa faaoga e le kamupani se i outou sueina ifo, ona toe sui loa lea o se isi a tatou kamupani. Aua a outou silasila i ai, ua le toe i ai se ta i le tatou auala faamolemole.

O le tatou auala galue ia pei ona outou silafia vaeane le pau o le Palemene nei, mo le silafia, o Falealupotai, e ono lamatia e le fesuaiga o le tau, o lea la na fai ai o matou auala, faafetai, auala alo, ia ona pau lea. A i ai loa se faalavelave i i, ou te iloa ua matou le alo. Faafetai lava. Na pau o le faalavelave faamolemole lau Afioga i le Minisita, se i toe faalelei ina ia faafaigofie i le aai a matou ona faaaogaina, ioe. E le tagisa tele Falealupo, ioe. Na o le pau lava lena o mea. Se i vaai i ai? A o le agaga faafetai i lo outou tausaga o le itumalo, e tasi lava la si o matou fanoga lea faamolemole. E ala ona fai atu le fanoga lenei ona o mea ua tutupu ma o lo o vaaia. Ia manatua foi o le fanua o Falealupotai e lona uiga e lamatia. Ua oo mai la a matou suesuega, fai se tou fuafuaga tou te saogalemu ai. o le fuafuaga lenei na aumai e latou o lo o vaaia, e manaomia la ni taligalu, e lamatia outou. Faamolemole i le ava e tatau ai, o matou nei i tai, o lo o i ai mea foi ia e anagata, mea o faailoga o mea ua tuanai, e i ai le Vae o Moso, e i ai le Inailau a Tamaitai, o mea na e pele lava ia i matou aua ne i le iloa. O le matou talosaga la pei ona oo mai, e fia maua ni a matou taligalu, leaga ua amata ona aia o matou lafanua. Na ona lafo atu, ae ua matou matamata i a outou galuega i isi afioaga, oka le manaia. E faapena foi Falealupo. Ia ona pau lea o se matou faatalauala atu i a outou Afioga i Minisita i galuega e fia faaleleia, aua o mea uma lava, o vai, o faleaoga, o moli, faamalo. Faamalo i a outou galuega lelei.

Ona oo mai loa lea o sa matou faamatalaga leaga ua leva le afiafi lau Afioga i le Fofoga Fetalai ma le pau o le Maotaga, o le agaga faafetai o lenei itumalo, e le tuua, e tatau ona avatu i lau Afioga i le Palemia, i lenei lima tausaga. E le tutu... e leai se mea o Falealupo, e tele naua a outou mea lelei na fai lau Afioga i le Palemia. O le a avatu le mea lenei e tasi e tumau pea leaga e lagona e mimita ai, o le SIDS. E le galo, o le matua mafatia lava o le atunuu. Ae te iloa lenei mafatia, Im proud of it, leaga na iloa ai e le lalolagi, e ese le iloa e Samoa talimalo, ae le faataga talimalo. O le mea lenei e galogata i lenei lima tausaga o lea o le a uma ae le mafai ona galo ia Falealupo lenei mea, faamalo le faalelei atunuu. Lau Afioga i le Palemia, e le galo na mea. A o a ni mea faaletonu e tatau ona silafia? Ia o le mea moni lava e le na ma le laina, leaga faatoa tupu lava lea o se mea iinei. Ioe. Ua iloa uma. O le Lipoti lea a le Suetusi lau Afioga ma le Aiga Minisita, ou te alu ai ma le faanoanoa ma ou tuua lenei Paeaiga, aisea? Leaga sa tuufuaina le taimi lea.

O le fautuaga lau Afioga, e talitonu ua i le aai o finagalo, leaga e le lelei, leaga e i lalo o le tou puleaga. A o le mea foi e faigata tele i lau maitau, e leai se mea o faia i ai. E leai se mea a outou o faia i a ii lenei faaletonu. E tagi faauu le tamaloa Falealupo i mea ia. E i ai nisi e sili ma le lelei, e i ai foi mea anagata e tatau ona fai, leaga e tatau ona fai, leaga o la e vaai le atunuu. O ai e faia? E fai e le Palemene. O fai? O le tali e leai. Ona faanoanoa lea o le tamaloa. Ia o le lauga lenei lau Afioga, tau ina logona ma oo atu i lenei itu o le malu, o mea ia leaga ua tuu mai le faatuatuaga o le tatou atunuu i le Palemene. Lelei, leaga, o le tatou matafaioi lenei. A o lea o le a maitau atu o le a tatou tuua ma uma le tatou Paeaiga, Ou te musu ou te fia i ai i totonu. Na e i ai foi i totonu o le tou mea lea sa fai o le tou Paeaiga?

Lau Afioga i le Fofoga Fetalai, o le tatalo, o moomooga ma saafi, e talitonu e tutusa uma lava tatou, e tutusa uma lava le mamalu filifilia, o tulati ma tulatoa o Samoa iinei, e fia fai ni mea lelei ma mea silisili mo le atunuu. Viia le Atua i a tatou galuega. Ia o moomooga ia ma saafiafiga, atoa ai foi ma faamavaega, pe tatou te toe feiloai faapenei i le isi Paeaiga, a o le agaga lenei. Ia alofa le Atua ia toia i tatou, muaau ma muliau i apaau o le alofa, e taitaiina ai pea le Palemene nei, e faatinoina ai ma faataunuuina ai ana galuega. Ia manuia lau Afioga i le Fofoga Fetalai, manuia le Palemene. Soifua.

FOFOGA FETALAI: Malo faafetai saunoa i lau Afioga i le Sui Taitai o le Itu Agai. Ia ua faafofoga foi le Maota, ma e le tau sula le toga lelei i le tofa faalele. E manatu foi ua loa lou soifua i totonu o le Palemene, ua logona foi tuleiga ma saunoaga e le gata i lenei afiafi a o futia ua sola ma aso ua alu. Ia, e leai se iota e maligi fua. E talitonu ua faamaumauina i faamaumauga a le Palemene lou sao taua i nei tausaga e tele e tautua a ii totonu o le Palemene, e le gata foi i le aveai ai o lau Afioga ma Fofoga Fetalai i tausaga ua sola ma aso ua alu, ae o lo o faamaumauina pea lou soifua auauna aua le tauavagameaina o le galuega e oo mai lava i lenei itula.

Ia, o lea ua tatou taunuu ma ii le Afioga i le Taitai o le Itu Agai, Hon Palusalua Faapo II. Ia, tulai maia lau Afioga e faaii mai saunoaga ona lafo atu lea i le Taitaifono ma tali ai le tatou Malo.

Afioga Hon PALUSALUA FAAPO II: Ou te tulai ma le ava tele ma le faaaloalo mo le avanoa ua tuuina mai e lau Afioga i le Fofoga Fetalai. Ua maea foi ona paelago ma paepaeulufanua paia o le Maota, pe oo i ai sau tala

pe leai e tumau lava, ae a le tapuaiga a Samoa mai mauga tetele seia oo i mauga iti, faatulou atu. Ae ua ou tulai atu ma le faaaloalo lau Afioga i le Fofoga Fetalai, o lea lava ua sasaa faaoti le utu a le faimea, ua sasaa atu faiva a le tautai matapalapala i sausaunoaga a Minisita Agai, e leai se vaipanoa e lei oo i ai, e tuu atu i ina i lau Afioga i le Palemia ma le Kapeneta ma lena itu e matimati ai o tatou faiva ma o tatou tiute aua o le tatou vaa e fau faatasi. E avatu aumai, ae tasi lava le manulauti, ia manuia Samoa. A manuia le tagata, e ola fiafia. A i ai tupe, e olioli ma faafetai, ae a mativa le tagata, e ola falolo ma fiaola. O le tiute lena o so o se Malo. O o tatou faiva ia, ia manuia le tagata Samoa. Aua le mauoloa lava isi ae pagatia isi. Po o a a tatou faiga o lo o fai nei, e tasi lava le tali, e tasi lava le faamasinoga, o ola fiafia le atunuu po o ola falolo? Ua faoa meatotino, ua faoa galuega, o le tali lena e tali ai le atunuu. I. Na pau lava le mea taua i le Samoa, ia maua le meaai, lea e malie i saunoaga, e leai se isi e fia ai. E sao lelei. Ua avatu foi le faamalo a lenei Itu i lau Afioga i le Minisita mo Faatoaga, aua e sao lelei lava, e leai se fiaai. A o le mea la e tupu, e leai se tupe, leai se tupe. Ia o lea lava e fai a tatou faatosina, o lo o uunai foi e le Malo ina ia galulue. E sao lelei outou. Ia galulue, ae eseese lava tagata.

O le mea lea lau Afioga i le Fofoga Fetalai, ou te nofo ma ou mafaufau aua foi i lata vaai lea e laulauvivilu ai lena Vaega, o le mea e lelei i Apia, e lelei i nuu i tua, e lelei i Savaii. Manaia tele lea anavatau. A o la e ta te vaai leaga out e oo i tua, out e oo foi i Savaii. O le faamasinoga lena o tatou galuega.

FOFOGA FETALAI: Malie le sui usufono o lo o saunoa se i fai sau malologa.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o le Aso Tofi nei o lo o i ai le faamoemoe e tatala ai auala e fa i Savaii, masalo ua leva e le i toe oo le Taitai o le Itu Aga ii Savaii. Ae o le lua vaiaso talu ai na tatala ai le auala o Aleipata. O le vaiaso talu ai o Magiagi ma Moataa. E fiu lava la Palu e fai au upu, ae o le a la le mea na e alu atu ai i ina? E te musu e fai le mea e manao i ai le Malo e faaulufale mai taavale e taumatau foeuli ina ia faafaigofie ai ona atinae Savaii atoa ma Upolu atoa. O le a la le mea lea ua i ai nei? Le mea na e musu ai?

Afioga Hon PALUSALUE FAAPO II: Lau Afioga o le mea e fia faasao.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: O le a e toe tulai mai nei ma e faapea mai e le o lelei le atinae a le atunuu? Ua e vaai i ai, tasi lena fua. Ua oo i Savaii, o isi aiga ua tailua taavale, o le mea sa e musu ai. E le mafai ona e atinae le aiga ma le atunuu pe a leai se auala e atiae ai le laueleele, e te alu a ii lelotu, ave ai fanaua i le aoga. Se e malie lava mea o upu, na o tagata e fai mata ae le vaai, fai taliga ae le faalogo. E le o ni mea e faia na o le Vaega lenei, o lea tatou te faia faatasi, leaga foi o tupe ia e aumai i i ona pasia atu ai lea i totonu o le Palemene lenei? E le faapea la na o le Vaega lenei e tau ai. A o le a le mea lena e te faia? O lena lava e te nofo ma toe tuu oe i lalo, toe tuu le Palemene lenei i lalo? O le a le mea lea ua tupu nei? Tau mai mai e ave i fafo, o mai e tupu mai i le a? O taumafa, tele taumafa, ae sa le faapena i le 20 i le 30 tausaga

talū ai. E tatau ona e... masalo po o le taimi o e i fafo sa tele ai ina tūfao pūsaapa. Ioe. 1979, 1980, 1981, 1982, na o ponaivi o moa. Masalo o le taimi lena o la e te i o a o matou lea e iinei. Na o mea o ponaivi o moa ma patuamoa e ai. O le mea tonu lava lena na ala ai ona savavali le aufaigaluega a le Malo, e le mafai ona sii o latou totoi ua leai ni tupe. Ae faapefea ona e toe sau e saunoa ma ii mea faapena? Na o le tagata e fai mata ae le vaai, na o le tagata e fai taliga ae le faalogo.

FOFOGA FETALAI: Tulai mai le Taitai o le Itu Agai.

Afioga Hon PALUSALUE FAAPO II: Lau Afioga, ou te le i alu ese ona ou te musu e aumai ni taavale, o le auala na e faia ai, fai toatasi, ua tetei le Vaega Faaupufai... Ou te le i alu ese faapea ou te musu e aumai ni taavale.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, sa e i a ii totonu o le Kapeneta? E leai ni mea faapena e faia, aemaise o Tulafono e aunoa ma le pasia e le Kapeneta. E oo foi i Tulafono o le Faavae lea na pasia nei e lima, ua uma foi ona pasia e le Kapeneta. A o le a le mea lea na e faia? Ia e te tu ae lava fai mai o Tulafono na ou faia toatasi? Palu, ua leva ona e i le Kapeneta, lona uiga o lea taimi umi sa e i a ii le Kapeneta e te le malamalama i ala o mea? E le mafai ona aumaia se Tulafono iinei seiloga e pasi muamua e le Kapeneta. A uma loa se mataupu ona ave loa lea e le Kapeneta i le Vaega, talanoa. A o le mea lea na e alu ese ai, o lea ou te iloa lelei, e le o le mea lena.

FOFOGA FETALAI: Ia, tulai mai lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, e faamasino le Atua, ioe, leaga e ese le mafuaaga na ala ai ona ou alu ese. Ua ou le faatuatuaina oe e avea ma ou taitai, ioe. O le mea lena na ala ai ona ou alu ese.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Ioe, aua foi na o oe na e alu ese ae faatuatuaina uma lava e le Vaega lenei au. Na o oe lava na e alu ese ma e tomumu? Oi e fai atu le isi sui usufono ae e faalii mai i ai ma e tomumu? O le faiga lena a le Vaega lenei, e te saoloto e te sau e te saoloto foi e te alu ese pe a e fia alu ese.

FOFOGA FETALAI: Ia, ou te manatu ua malamalama lea vaisua.

Afioga Hon PALUSALUE FAAPO II: Lau Afioga i le Fofoga Fetalai, ona ua vavevave mai le Afioga i le Palemia ae o lau folasaga lea e alu atu out e le i oo i le Tala o le Tupe.

FOFOGA FETALAI: Ia, oo loa i le Tala o le Tupe.

Afioga Hon PALUSALUE FAAPO II: Fai mai le manatu autu, e fua le manao i le seleni e maua. Ua faafagogo tagiao lea mea, fua le manao i le seleni ua maua. E faavae i se faasoā ua utiuti pei o lau saunoaga lau Afioga i le Palemia. E tele tupe faaalu ona o le Tsunami, o mea masani lava, o

faalavelave faalenatura, o afa, o le mea lea ua tele ai tupe fai mai ua utiuti ai le faasoa. O lea e i totonu o le lauga, faitau manino lelei i ai. Ae manatua lau Afioga i le Fofoga Fetalai, e le na o ni tupe ua faaalu, e faitau miliona ma miliona tupe na maua ma ii fesoasoani i mala faalenatura sa feagai ma tatou, e tele tupe, ioe.

FOFOGA FETALAI: Malie le sui usufono mamalu se i avatu le avanoa.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea e fia faasao, e tataua ona faigofie ona e malamalama i le mea lenei, ioe. Ae aumai e fai ai galuega e pei o taimi uma e te malaga atu ai e te alu i Safata. Vaai i ai i le lamolemole o auala na e i Tiavi ma Siumu? O le lamolemole ia o auala. A uma la ona aumai tupe e faaalu ma uma ona fai le galuega, ia ona leai foi lea o se tupe. E faapena alii le mea. O le mea lea na ou fai atu ai ananafi, you cannot have a piece of cake, we cannot have a piece of cake and have it too. O lona uiga, e le mafai ona e tausami lau fasikeke ma e manao lava e nofonofo mai pea i ou luma. E fai lau filifiliga, a e manao e ai le fasikeke, aua e te toe naunau ia taatia mai pea i ou luma. E faapena mea o galuega, a uma ona faaalu tupe, ia tino mai le galuega, ua uma foi na tupe. O lena e te taumafai e tau mai. E le o se mea faigata ona malamalama i ai, e oo lava i le tamaitiiti e le i alu i le aoga, e malamalama lelei. O le ala lena o fesoasoani nei e aumai mai fafo ma fesoasoani e sau mai tuutuuga mama ma foai, a aumai lava i le mea e faaalu ai, a uma, ua uma. Ua finito.

Afioga Hon PALUSALUE FAAPO II: O le a la le mea ua toe tagi ai Vi ina ua i luga o le vaa o Eneli?

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e faapena fuafuaga, e leai se fuafuaga e alu pea i luma. A lea e saunoa mai isi sui usufono ua leva ona avatu matou talosaga, aua a uma ona fofo mea na ona toe foi mai lava lea o le Malo e faaauau isi polokalame ua leva ona faataoto. O le ala la lena o lea e sau ai le upu, e fuafua tatou galuega i a tatou tupe e maua. Ioe. E maua mai fea? O tatou lava tupe masani. Lua, o foai mai fafo, tolu o tatou nogatupe e mama tului. O mea na e tolu. O le sao lena, ona o lea out e vaai atu, e oo foi i le faamalamalamaina o lea mea, pei e le o malamalama i ai.

FOFOGA FETALAI: Tulai mai lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, ae te le i saunoa mai ua ou malamalama. Ioe. Ia silasila la i lau saunoaga, fua le manao i le seleni ua maua.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: E sese, o mea ia e le o maua. O mea ia e le o maua ua avatu i i.

Afioga Hon PALUSALUE FAAPO II: O lea e \$96miliona e sili ai tupe faaalu na i lo tupe maua.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: O lea e avatu i totonu i i. Se i vaai, a ou faamatalaina le mea lea i se tamaitiiti e le i aoga, e malamalama.

Afioga Hon PALUSALUE FAAPO II: A lea ou te fai atu ai?

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: A o lenei lava e te le malamalama.

FOFOGA FETALAI: Ua tatou taunuu i le tatou taimi malolo. Ou te manatu ua tataua ona vavae foe, e moomia sina vai vevela o le afiafi ma sina vai malu. Ou te faasilasila atu o le a faataatiaese Taulumaga a le Fono Aoa mo lana malologa o lenei afiafi.

Na faataatiaese Taulumaga a le Fono Aoa mo lana malologa i le itula e 9:00 i le po ma toe faaauau i le itula e 9:34 i le po.

FOFOGA FETALAI: E momoli atu le faafetai ma le faamalo i lenei vaega o le afiafi. E manatu o lea ua tatou taunuu mai i le vaega mulimuli o le tatou Fonotaga. E momoli atu pea le agaga faafetai ma le faamalo i sui usufono mamalu ua maea ona tulei saunoa, faamalo saunoa, faamalo malele, faamalo fetalai. O lea ua tatou taunuu mai, ua toe o se aga ona avatu loa lea o le avanoa i le Taitaifono, e faapena le tali a le Afioga i le Palemia ma le Kapeneta ma faaauau ai pea taulumaga o le tatou Tala o le Tupe.

Ia, tulai maia lau Afioga i le Taitai o le Itu Agai e faai maia le saunoaga.

Afioga Hon PALUSALUE FAAPO II: Ia, atonu ua maua foi se faasiliga malosi i lau Afioga ma le paia o lenei Maota i le malu afiafi pei ona maua ai le faamalositino. Malo faafetai i le Maota e tusa ai ma le tautuaina o le Maota nei. E pei lava na gata i le mea lea e faapea mai ai le Palemia e tusa ai ma lana saunoaga, e fua le manao i le seleni e maua. A o le eseese o le manao ma le tupe lea na maua, e \$96miliona, toetiiti lava \$100miliona. E sili le tau o le \$100miliona e tau gofie. O lona uiga, o tupe maua ma tupe faaalu, e \$96miliona le eseese. O le ala lea ou te faamalie atu i lau Afioga i le Palemia, o le matua sese lava o lau manatu autu lea na aumai, o le matua sese lava.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e le mafai lava ona ou tuua se mea sese e alu loa. O le upu lea na taiala, e fua le manao i le tupe ua maua. O lea la e talanoa i totonu o le Paketi lea, lea, ioe. O tupe la ua maua, e aofia ai a tatou tupe maua masani, e aofia ai tatou foai mai fafo, e aofia ai tatou nogatupe e faatupe ai le faasiliga lea, ona maua loa lea o le tupe aofai e \$785miliona, le Paketi lea, ona faapea loa lea, o isi lava la mea e manao i ai e le o i totonu i i, e faamalie atu, o mea na e fai i le isi tausaga, tausaga fou ma le isi tausaga. E pei e foliga mai e le o malamalama le Maota o le principal o le budgeting le igoa tonu o le upu lea. A sauni loa le Tala o le Tupe, e fua lava le tupe faalu i le tupe lea e mafai ona maua, i vaega ia e tolu.

Muamua, o le tupe e mafai ona maua i luga o tatou lava suegatupe. Lua, o tupe e mafai ona maua mai foi mai isi atunuu, ma lona tolu, o le tupe ua mafai ona oo i ai lo tatou malosi. Ia, o le tulaga lena, o nisi la mea e le o i totonu o le Budget, e faamalie atu, tuu la mea na se i oo i le tausaga fou ma le isi tausaga ma le isi tausaga. O le principal of budgeting lea e faasino i ai le upu lea. O le faalavelave, o lea tatou te talanoa i le Tala o le Tupe lea, ae pei e ese le mafaufauga lea e mafaufau i ai, o lea e talanoa i mea ia e avatu i i, e le o talanoa i nisi lava manao. O nisi manao, faatali se i oo atu i lena tausaga ona toe tilotilo foi lea i tupe maua i lena tausaga. E a? Ua e malamalama?

Afioga Hon PALUSALUE FAAPO II: E pei e sili lou faitauina atu o le faaupuga lea e i i.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Palu, o mea uma lava na o lea e lavea i totonu i i, lea ua uma ona ou tau atua. O le a e toe faitau maia foi o lea ua uma ona ou tau atua?

Afioga Hon PALUSALUE FAAPO II: O lea o le a ou faitauina atu le...

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Ma o nisi lava la mea e le o i i, faalogo mai, o nisi lava mea e le o i i, o mea la na, taatia atu i le tausaga fou ma le isi tausaga. A o manao ia ua mafai ona faatino, o lea e i totonu i i. Ua e maua mai? Na o le pau lava manao e mafai ona faatino, o manao ia e i totonu o le tusi lea.

Afioga Hon PALUSALUE FAAPO II: Lau Afioga, e leai lava ni manao o i totonu i i e faapea o le isi manao ma le isi manao e tuu i le isi tausaga. Na pau lava le faaupuga lea e i i, o le faasiliga o tupe alu ma tupe maua, e \$96miliona.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Palu, o le mea e fia faasao. E leai se mea o le a aumai ai fua le tausaga e 3,000 ta te le o talanoa i se tausaga e 3,000, o lea ta te talanoa i le Paketi o le 2016, tausaga fou. Ua e maua mai? E leai la se mea o le a aumai ai fua le Budget o le 2017 ma le 2018. Na o le pau lava manao ia e mafai ona faatino, lea e avatu i totonu i i. Vaai i ai i le faigofie?

Afioga Hon PALUSALUE FAAPO II: O lena e sao. A o le faaupuga lea e i ai, ua sili tupe alu i lo le manao, lea e i i, lea e i i. O le mea lena o lea ou te taumafai atu ai. E tutusa lelei lava le tusi lena ma lea.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: O le manao lea ou te fia talanoa atu ai, o le manao lea e i totonu i i e faatino.

Afioga Hon PALUSALUE FAAPO II: E le o ova o lea e paketi. E le o ni manao e faatino i le 2019, o le manao e faatino i le Tala o le Tupe lea tatou te talanoaina. Se matuai e mafiafia tele.

FOFOGA FETALAI: Se i fesoasoani mai le Taitaifono.

Susuga Hon Papaliitele Niko Lee Hang: Lau Afioga i le Fofoga Fetalai, e le fia faalavelaveina foi le finauga a le Palemia ma le Taitai o le Itu Agai. O lau faitau i le Tala o le Tupe, ona o lea e folafola mai e le Taitai o le Itu Agai le \$100miliona lea e ova ai tupe faaaoga. A e silasila o lena e i ai le nogatupe lena e mama le tului e \$84,000. Na o le pau le tupe lea ua sili e \$12miliona. E sese la lau saunoaga e \$100miliona, leaga e i ai le nogatupe lea e faatino ai le isi galuega lea o le atinae, lea e faaaogaina ai le tupe lea e nono mai e mama le tului. A o le tulaga o le lua finauga, ou te malamalama foi i le auga po o le feau lea e aumai i le Tala o le Tupe. A silasila lau Afioga, o lea e manino lava i i, e sao e le o maua le tatou tupe maua e faatino uma ai galuega, a o galuega e tatau ona faatino, o lea la i le Tala o le Tupe e pei ona saunoa le Afioga i le Palemia, faatino lava na o galuega ia ua i totonu o le Tala o le Tupe, a misi le galuega, aua ou te iloa pe maua lava se isi tupe a o faagasolo le Tala o le Tupe e faaatoa ai le \$12miliona lea, aua o mea ia tatou te talanoa ai o mea o Budgets, o Estimates.

E pei o le tulaga lena e fesoasoani atu ai, se i tau toa mai le sui usufono mamalu, ma le faaaloalo lava.

Afioga Hon Palusalua Faapo II: Lau Afioga, ua atili sese ai ina ua tulai mai le Taitaifono, ae a le \$12miliona lea e i ai le.....ioe, e ala ona fai le loan ona o lea e i ai le \$12miliona lea.....

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga e tatau ona e malamalama lelei, o le mea e fia faasao. O le uiga o le Budget, na o ni mea fuafua, e sao le mea lea e saunoa mai ai le Taitaifono, na o ni mea e fuafua. O fuafuaga uma lava ia, o lea e fua agai i luga i le taimi e faatino ai, na o le pau lava mea ia e avatu i i, o manao ia mafai ona tuu i totonu e fuafua e faatino mo le tausaga lenei, a o nisi lava manao lea e aofia ai mea nei, o le mea moni lava, masalo pe ova i le \$2piona le mea lea na talosaga mai ai ia pe a faatupe lea e talosaga uma ai lava ia Ministries e faatino, ia ona tipi tipi lava lea e le Ofisa o Tupe, na o mea e mafai ona faatino i le taimi lenei tuu i totonu o le Tusi mafiafia lea, a o nisi mea mo le tausaga fou 2017, ia o mea na se i tulai mai foi le Palemene o le tausaga fou latou tilotilo i ai ma tuu foi i totonu o le Paketi i lena taimi.

FOFOGA FETALAI: E manatu ua manino ma malamalama le....

Afioga Hon Palusalua Faapo II: Ia o le a ou see ese, ma lou faaaloalo.

FOFOGA FETALAI: Ia malie ia, e taua foi lou finagalo, o lea ua tali manino le Malo, ia e le faia so tatou loto, o lea ua faamalamalama ua fesoasoani mai foi le Taitaifono o la outou Komiti, malie lau Afioga i le Taitai o le Itu Agai, ia faasolo le tatou lauga.

Afioga Hon Palusalua Faapo II: O lea la o le a ou fai atu i le mea e ala ai ona le paleni, o le a le mafuaaga, o le a le mafuaaga ua ala ai ona tele lenei tupe faaalu? O lau tali i ai, o le faapelepelega o ē e lagolagoina le HRPP, ioe, a silasila i ai i tupe ia, e faamalie ma faapelepele tagata uma e lagolagoina le Malo.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Lau Afioga i le Fofoga Fetalai o se mea e fia faasao.

FOFOGA FETALAI: O lea o le a faamalamalama le itulau lea e te saunoa i ai.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: O lea sa amata le saunoaga a le sui usufono pei e foliga mai e le o lava galuega a le Malo e lagolago ai i i lo tatou atunuu, ina ia fai ni atinae ai lo latou soifua, ia maua seleni, a o lea la ua saunoa mai nei, e pei e foliga mai i le manatu o le Taitai o le Itu Agai, o le faapelepele. Ua ou tautala atu i lau Afioga, tilotilo ane lava i le itulau e (xi) faaloma, o lena e alu atu ai le polokalame tele lava e faatino ai le anoano o vaegatupe nei aemaise lava mea nei o fesoasoani mai fafo. Vaega o aoaoga, polokalame fesoasoani mo aoaoga Ausetalia ma Niu Sila lea o lo o aumai, o le tausaga lea e faagasolo nei e \$8miliona mai Ausetalia, \$7miliona i le tausaga fou le tausaga lenei o lo o faagasolo, ia ona faasolosolo mai lava lea i lalo i le anoano o vaega o faatoaga, polokalame o atinae o faatoaga lea e faaii i le tausaga nei le \$6.8miliona, e oo mai lalo i le polokalame mo le faaleleia o faatoaga mai aafiaga o le Afa o Evani, e \$3.7miliona ia le tausaga fou lea tatou te talanoa ai nei, ae \$5.4miliona le tausaga tuai.

Ia ona oo mai ai lea i le vaega o le Malosiaga, e faasolosolo mai lava, a o maua mai la, e le o ni mea o atinae, ogaoga atinae nei mo le soifua aoaoina o tatou fanau, ia ma le soifua atinae o tagata o lo tatou atunuu.

Ona oo mai ai lea i lalo o le Siosiomaga, o lena e alu atu ai le anoano o galuega eseese mo le puipuiga o le gataifale, ioe, e manatua la o le puipuiga o le gataifale e aofia ai ma mea nei o taligalu, ia ona soso mai lea i lalo i le vaega o Tagata Tafafao Maimoa Mai Fafo.....

Afioga Hon Palusalue Faapo II: Lau Afioga i le Fofoga Fetalai.....

FOFOGA FETALAI: Se i avatu pea le avanoa se i faamalamalama atu.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: E ala ona ou avatua mea ia, e tolu vaiaso o tuu atu le Tala o le Tupe lenei e mafiafia e te faitau ai, a o lenei lava e aliali mai e te le i faitauina.

FOFOGA FETALAI: Ia tulai maia e faaii mai le saunoaga.

Afioga Hon PALUSALUE FAAPO II: Lau Afioga i le Fofoga Fetalai, o le Tala o le Tupe lenei ou te faatusaina o se fasi povi, vaeatu lava le faafogafoga mai a le atunuu ma lenei Maota, o se fasi povi o lo o tele mea lololo nai lo i mea augagase, o le faatusaga lea. O lau fautuaga, tipi ese mea lololo ia tatou te mamai ai, tipi ese. O le ala lena o lou fai atu i tupe ia e alu i mea ia, tipitipi ese, o lea na e saunoa ai lau Afioga i le Taitaifono i luga o le pepa, ioe, o mea faapena, o mea lololo na, aua a tatou aia, tatou te mamai ai, lea e ala ai ona mamai le tatou Tala o le Tupe, ioe, mo atinae tele ua alu tupe ae le o maua mai ai ni tupe, ia le uafu i Satitua, o le atinae o le malae vaalele lea o le a fai.....

FOFOGA FETALAI: Malie lau Afioga i le Taitai o le Itu Agai, se i tuu atu le avanoa i le Taitaifono.

Afioga Hon PALUSALUE FAAPO II: Oi o lea e te tulai mai.

FOFOGA FETALAI: Ia tulai mai lau Afioga i le Taitaifono.

Susuga Hon Papaliitele Niko Lee Hang: Faafetai, ma le faaaloalo lava ua ou tulai atu e tali foi ona o lea ua taua au i le faamatalaga o le Taitai o le Itu Agai, ou te le o malamalama la po o a mea lololo ia na ou talanoa ai i le...ia ae se i...ou te fia malamalama la po o a mea lololo ia, ona ou tali atu lea po o le a le tulaga o lau saunoaga.

FOFOGA FETALAI: Ia e fautuaina foi le sui usufono, leaga e le na o tatou lea e fono, paga foi lea ne i avea foi le naunau ae fua foi i a tatou faamatalaga ma faatusatusaga, ina ne i meaane ua tauvaleina le galuega sa feagai ma la outou Afioga, e le gata foi i le Taitaifono, a o lau Afioga foi i le Taitai o le Itu Agai, e manaia ae fai nisi faatusa i se isi mea, ne i te i ua faapea mai le atunuu e le talafegai le faatusatusaga o mea le lelei ma mea lelei o lo o i totonu o tatou Paketi. A o le agaga lena e fautua atu ai.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoui: Lau Afioga i le Fofoga Fetalai, o le mea lea e taumafai i ai le Malo, e avatu i le Tala o le Tupe faamatalaga ma auililiga o polokalame uma lava nei. A silasila i ai i le (x)faaloma ma le (xi) o atinae, aemaise lava le atinae xi, lea e alu atu, o le tele o galuega tetele nei o le vai, lea sa tatou pisapisao ai nei atinae o le vai, vaitaumafa. O lea pei e foliga mai o lo o fetuu e le Taitai o le Itu Agai, a o mea ia o lea faatoa uma atu nei lava le tele o saunoaga o agai mai, ia taumafai le Malo e faalelei le vaitaumafa, a o i tonu lava i itulau ia, o lea e sau ai le aano o le tele o galuega a le Malo, o mea ia o lo o tagi mai ia outou o sui usufono e fai mo outou itumalo. O le mea lea na ou fai atu ai i lau Afioga, e te le o malamalama i le Tala o le Tupe. Na faapefea ona fai lau galuega? Ona e nofo lea ma saunoa mai i upu e upuvaleina atinae nei e manuia ai le atunuu, aemaise polokalame o mea tau aoaoga, mea tau le vai, mea tau le togafitiga o gasegase, o lea e i ai uma lava i totonu i i. O le ala foi lena e ala ai ona aumai ia fesoasoani nei mai fafo, ona o i tonu lea e agai mai ai a latou polokalame mo le atinae lautele o le tatou atunuu. O le fesoasoani atu lena i le Afioga i le Taitai o le Itu Agai.

FOFOGA FETALAI: Tulai mai.

Afioga Hon PALUSALUE FAAPO II: Lau Afioga, o le faigofie ia, o le faalavelave o le Afioga i le Palemia, e te milomiloa au upu ia e avatu, e leai ma sou agai i le soifua maloloina, o le vai, o aoga, e leai, na o atinae ia o le a fai, le malae vaalele i Aleipata, o le uafu i Satitoo, o mea ia ou te fai atu ai, o mea lololo ia o lea ou te fai atu ai, tipitipi ese, a o mea ia e i totonu o le Paketi, e leai, e leai, o mea aoga, falemai, aoga, vai, eletise o mea uma faapena, e matuai ou lagolagoina lau Afioga. E ala ona ou taua mea ia, o mea o lo o fefetevale ai ma tupe o lo o alu ai, e tele a tatou atinae e fia fai. O lea ua sausaunoa Afioga i lenei itu ma lena itu, ae.....

FOFOGA FETALAI: Malie lau Afioga i le Taitai o le Itu Agai, se i tuu atu le avanoa i le Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, masalo e ma te le finau, ma te le finau ma le Taitai o le Itu Agai. O nei foi tiute tatou te faia, po o a lava upu e tatou te tautala i ai, e le taua lena, ae tautala galuega.

FOFOGA FETALAI: Tulai mai lau Afioga i le Taitai o le Itu Agai.

Afioga Hon PALUSALUE FAAPO II: Lau Afioga i le Fofoga Fetalai, a lea na ou fai atu i le amataga o le folasaga o lau lauga, e faamasino le atunuu, i a tatou galuega o lo o fai, ioe, galuega lelei e manuia ai le atunuu, ae le o manuia uma le atunuu, o la foi e i ai nisi o lo o fia maua le fesoasoani, o le tiute lena o tatou, tiute fai faatasi. A o le tulaga i atinae e manuia ai le atunuu, o lea ua sausaunoa Minisita agai, e avatu le lagolago, e tatou te galulue faatasi ina ia maua le manulauti.....

FOFOGA FETALAI: Ia tulai mai lau Afioga i le Palemia.

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e tatou te faitau eseese, a, se i outou omai outou i i, ae tatou te faitau eseese, e mamao lava le eseese o le tatou faitau i mea e manuia ai le atunuu, a lena ua e teva atu i ina, ona o lou tetee i le faaulufale mai o taavale ma le suiga o le Tulafono. E eseese mamao lava mea e tatou te faamasino ai mea e aoga i le atunuu, e le mafai la ona gauai atu o matou mafauauga i lau finau, leaga o lea foi matou te manatu, o le matua faavalevlea lava o le mea lena e te finau mai ai. E le mafai la ona gauai atu ia o matou mafauauga ae tuu i le atunuu e fai e latou le iuga, a lea ua faaiva ona palota mai le atunuu iinei, afai e faaiva ona palota mai e faafoi mai ia le HRPP, o lona uiga, e tatau lava la ona tatou taunuu i se taunuuga o la e fiafia le atunuu i mea la e fai, tai pei la o taavaleafi ia. Ae malie ia, e leai nisi mea o totoe, aua o lea e te taamilomilo lava isi mea e tasi, e le mafai foi la ona gauai atu lou mafaua i mea na e te fai mai ai, leaga o lea ua uma ona faamaonia, o mea ia e fai e le vaega lenei, o mea e moomia e le atunuu.

FOFOGA FETALAI: Ia malie ia, malie ia le Taitai o le Itu Agai, e manatu e le o ni ai i ave a i lau Afioga, ae saunoa.

Afioga Hon PALUSALUE FAAPO II: Lau Afioga i le Fofoga Fetalai, aua o le tiute lava lea o le Malo, o le tiute lea o le Malo so o se Malo e tulai mai e faalelei ai galuega ia e te saunoa i ai, ioe, faamuamua aoga, faamuamua le soifua maloloina, so o se Malo lava, o mea na e fai, ae le o se mea e tatou te mitamita ai, leaga o le tiute lena o le Malo e fai, e faalelei mea ia mo le soifuaga....

Susuga Hon Tuilaepa Fatialofa Auelua Lupesoliai Aiono Neioti Sailele Malielegaoi: Lau Afioga i le Fofoga Fetalai, e le o se mea foi e matou te mitamita ai, matou te le o mitamita ai. E pau lava le mea lea e matou te finau atu ai, afai e le o agaga le atunuu i mea ia e fai e le vaega lenei, e faigofie, ua

leva ona le toe palota mai le atunuu i sui usufono o le vaega lenei, na o le pau lava lenei o le faaiuga, e tatou te le faia ni a tatou faaiuga.

Afioga Hon PALUSALUE FAAPO II: Lau Afioga, ua ou manatu ua ou manatu ua vela le fala, ioe.....

FOFOGA FETALAI: Ia malo, e pule ia i lou loto lau Afioga i le Taitai o le Itu Agai.

Afioga Hon PALUSALUE FAAPO II: Aua e avatu aumai, ia e talitonu lava le Afioga i le Palemia ia ia ia, ae ou te talitonu foi au ia i au mea ia e fai....

FOFOGA FETALAI: Ia e saolele lou finagalo ae fai foi le finagalo o le Malo.

Afioga Hon PALUSALUE FAAPO II: O lona uiga, e alu lava le po o ma finau. O le mea lea Tuilaepa, e leai e leai se agaga faapena, e leai se agaga. O le faamoemoe ma le manulauti o tatou uma, e fai mea uma ina ia manuia o tatou tagata. O lea la faatoa ou fai atu, aua e leai lava sau faafetai ua avatu. Sa ou fia faafetai, ae ua ou musu foi e faafetai i lau Afioga, a o lo o silafia e le Atua a outou galuega lelei o fai. Malo le galulue. Ae ua ou manatu, ua lava foi lea finau, ua lava foi lea finau. Na pau lava lau tala mulimuli, o lea e iinei le Manu Samoa, o lea e Taitaifono ail au Afioga. Na pau lea o se mea out e fiafia ai ona o le aumaiga o le All Blacks tatou te taaalo. O le mea lea, out e faatalofa atu i alo ma fanau o le atunuu o lo o omai e tauave le fua a le atunuu tatou te mitamita uma ai. O moomooga alofa, o outou faiva na, o outou mama na ina ia manuia le faamoemoe, e tapuaia e lenei Palemene aemaise le atunuu le alofaiva atu o le tatou Manu Samoa. Ia tatou o uma e tapuai ina ia vaai mai le au, o tatou tutu faatasi atu, ioe. E ui lava ina ta finau i le tele o taimi, ae ta te faauouo i o e tapuai le tatou au. O le mea taua, ia tatou lagolago pei ona tatalo le Afioga i le Palemia. Ia tatou lagolago uma aua o se mea maoae lenei mea i le talafaasolopito o Samoa nei, o lea ua oo mai le All Blacks iinei e taaalo ma le tatou Manu Samoa. O le mea lea, tatou tuu i le Atua ina ia aua ne i faamanualia se isi ae tatou tatalo ina ia maua se taaloga manuia ma se taaloga fiafia.

Si ou itumalo, e seasea ou lauga i lou itumalo, ona o lou tiute o Samoa atoa, o Samoa atoa, out e le faimea faapito o la e faafogafoga mai lou itumalo. Na pau lava le mea, o lea ua outou faafogafoga ma ii le Tala o le Tupe, e ui lava ina sese, ae fua le manao i le maua o le tupe. E leai o lo o tu i le foe lou uso a sui usufono o lo o i ai le uta a le faimea e polo faasoasoa ina ia manuia Samoa. O a mea e fai, tatou tatalo i le Atua. Lau Afioga i le Minisita mo Galuega, Felauaiga ma Atinae Eeseese, o ou mama na e maua ai au palota, fai mea o le ta itumalo.

O sau tala lea ma le faaaloalo lau Afioga i le Fofoga Fetalai, o le a sau faafogafoga mail au Afioga i le Palemia ma lenei Itu, a outou Afioga i Minisita o le Kapeneta, e leai e le o se tetee, o le faufautua ma tuualalo atu. Se i vaai i fautuaga na avatu. Faafetai o lea ua outou faaaogaina fautuaga, a o isi fautuaga ia, tautuana, ia faaoga ae le i oo i le palota. O le a foi sa outou faafogafoga a i ai ni upu ua laavale, ia lafo i nuu le aina, a o outou mama na i

galuega o lo o totoe o lenei Paeaiga, ia alofagia e le Atua ia maua la outou tofa ma le faautautaga lau Afioga i le Palemia ma le Kapeneta, aua lo outou alofaiva e tusa ai ma lo outou alofaiva.

FOFOGA FETALAI: Malie lau Afioga i le Taitai o le Itu Agai se i tuu atu le avanoa.

Tofa Lealailepule Rimoni Aiafi: Lau Afioga i le Fofoga Fetalai, o lea ua ma femusuai ma le sui usufono mo Aana Alofi Nu.3, out e fesili i lau Afioga i le Taitai, o le mea ea ua e faamavae? O lea ua ma faalogologo atu ua e faamanuia i le Minisita mo Galuega, Felauaiga ma Atinae Eseeese ma ave i ai palota a lou itumalo. Ia, fai mai se tala sao ae se i ma piipii i le sui usufono mo Palauli le Falefa po o le a le tonu. O lea e fesili sao, ae afai ua e faamanuia le Afioga i le Minisita, faafetai.

FOFOGA FETALAI: Ia, se i tulai mai le Afioga i le Minisita mo Galuega, Felauaiga ma Atinae Eseeese.

Afioga Hon Manualesagalala Mati Tuigamala Enokati Posala: Lau Afioga i le Fofoga Fetalai, sa fai au tatalo ina ua saunoa le Taitai o le Itu Agai, faafetai o lea ua to le matupalapala, ia o lau pule lea.

Afioga Hon PALUSALUE FAAPO II: Ia, o maua o le aiga, e fealofani. A o ai e palota maua? O le itumalo, fai le finagalo o le itumalo.

E faauma atu ai au upu i lau Afioga, talofa e, malo faatoatoa i lau Afioga. O lau tatalo, ia saga faamanuia le Atua i lau Afioga, ioe. Ia utupupuina fulu o le segaula, leaga e faigata e le o oe o se tagata faigofie. Ae faafetai mo le avanoa ua e tuuina mai. Ia manuia le Fono, manuia lenei Palemene. Faafetai.

FOFOGA FETALAI: Malo. E i ai le upu sa saunoa i ai le Toeaina foi lea o Vavae Toma i aso ia i Vaivasetai, “E le tele lava ni lasi, e ala ona tele lasi o le taufaasee.”

Faafetai atu i le saunoaga manino a lau Afioga i le Taitai o le Itu Agai. E manatu e le taia if ale le tanoa ma le saunoaga matagofie i lenei vaega o le afiafi. E leai e te le alo lava i le ata o le laau i ou tiute. O lea foi ua faafofoga lava ma le manino le Maota aemaise foi o le faafofogaaga Samoa, ona matou manatu lea, malo le faatautai. O le tulaga lava o tu ma aga i taimi faapenei o le Tala o le Tupe, e le milia faauu upu. O lou lava tiute o le agai o le Malo, tele pe itiiti, sao pe faaletonu ona lafo lea e fai le finagalo ma le tofamamao ma le tofasilasila a le Malo e silasila i fautuaga ua avatu. E faai ai saunoaga i lenei afiafi i lauga uma a sui usufono, ia, e momoli atu le faafetai ma le faamalo i lau Afioga i le Taitai o le Itu Agai. E manatu e le tau faamatalaina lou sao, aemaise nei tausaga e fia sa e aifilofilo a ii tulatoa o le Palemene ua faailagi le folauga, o lea foi ua faeaina oe ua avea oe ma Taitai o lea Itu o le Maota. Ia, o le Atua o tofiga, ia lava pea lou onosai, o a foi upu ma tala e te lua felafoai ai ma le Palemia, ia e foli lava tama a o le uso. E tasi le faafitiga o aleaga, ia manuia Samoa.

Ona ou manatu lea lau Afioga i le Taitaifono, tulai maia e saunoa faaii ona amata ai lea ona tali le Malo i lenei itula afiafi. Tulai mail au Afioga i le Papaliitele.

Susuga Hon PAPALIITELE NIKO LEE HANG: E momoli atu le faafetai i lau Afioga i le Fofoga Fetalai mo le avanoa. Faamalo atu foi i lau Afioga le onosai i lenei po, e talitonu foi ua vela le fala, ma e le umi foi se manatu e fia faaalai i le Tala o le Tupe, ona o le tele o manatu ma fautaga a le Komiti o lea ua i totonu o le Lipoti. Ae na ona ou talanoa puupuu lava i le Tala o le Tupe, e tusa ai ma le feau lea ua tuuina mai, ua faafagogo tagiao foi i le faafofoga mai a le Palemene nei i le saunoaga a le sui usufono mamalu i le fua lea o le ofu i le ie. A o lau faitau i le faauigaina o le matua lea po o le feau lea, o la e sau ma le faaupuga ia tuuititia tupe faaalu e aunoa ma le oia o le auaunaga a le mamalu o le atunuu. E faataua la ia te au le tulaga lea, ona e pei o le feau lea e tau tuuina mai i le theme lea, ina ia fuafua tupe faaalu i tupe la e i totonu o le Tala o le Tupe ina ia aua ne i toe faasili atu i le tulaga lea ua tuuina mai ai ona o le popolega, a silasila lau Afioga i le summary lea o tupe maua ma tupe totogi e pei foi ona faasea ai le Taitai o le Itu Agai, o lo o maitauina ai i ina e fai si laitiiti o le tatou tupe maua ae ua tele tupe faaalu. Ma o le popolega lena out e talitonu ai o le uiga foi lea o le feau lea ina ia fuafua tatau le faaaogaina o tupe. O le mea lea, o lau fautuaga foi lena i Matagaluega a le Malo ona o lea e utiuti le faasoa, faaoga tupe i le tulaga foi lenei e prioritise le faaaogaina o tupe ina ia aua ne i oia auaunaga a le mamalu o le atunuu. Ia o sou manatu lea i le tulaga lea.

Ae ou te toe famanatu atu foi i le Taitai o le Itu Agai, o mea nei o Tala o Tupe, na o ni tupe fuafua, estimates. A tulai mai se tulaga faapea e le lava, ia, e le iloa po o le a le sao o lea tulaga, se i vagana ua tulai e faatino ona popole lea. A o le tulaga lea e i ai, atonu o lea lava e uma tausaga faaletupe, o le lima lenei o tausaga o matou iloiloina le Tala o le Tupe, e le i tulai mai lava ni tulaga ogaoga faapea ua ova faapea, e aumai lava actuals o la e talafeagai lava. E tele foi tupe fuafua mai ua ova atu actuals, a o la e i ai isi vaegatupe e faapena ona faasoa i Matagaluega ina ia paleni le faaaogaina o tupe e tusa ai ma le Tulafono lea pe a pasia.

O se fesoasoani atu lea i le Tala o le Tupe, ae i ai nai mataupu ia pe tasi pe lua ou te fia tautala i ai, ona e i ai lou manatu o fautuaga ia masalo o le tele o tatou e le faitauina. Ae i ai nai tulaga ia sa matou mauaina i le Tala o le Tupe i le Matagaluega lea o le Fono, o le Maota Fono. O lo o faaagaaga i ai se tupe e \$500,000 i le latou Tala o le Tupe mo le tuuina lea i lalo o le Maota Fono po o le demolition. Ae na matou molimauina foi o la e foi e budget ai foi le Matagaluega o le Tupe. O le tali la na tuuina mai ina ua fesiligia, e tatau ona faatupe e le Matagaluega o Tupe le \$500,000 lea. Ona aamia foi lea o le Failautusi o le Fono, o lana faamatalaga e le auau le faasoa a le Matagaluega ona e tele mea e tapena, e le gata o lea o le a faamaape le Palemene, faafeiloai le Palemene fou ma le tapenaga foi o le siitia i Tuanaimato pe a aulia le tausaga fou.

O le fautuaga la a le matou Komiti lea ua tuuina mai, e malie le Malo aemaise foi le Matagaluega o Tupe e taatia pea le \$500,000 lea i totonu ona e tele galuega fuafua a le Maota, aemaise o le auaunaga i a outou Afioga i sui usufono mamalu o le Palemene.

Lau Afioga i le Fofoga Fetalai, e faanoanoa lava ona o le tulaga lea i tupe ia e fuafua mo le Ofisa o le Palemene, ona ia te au e faatauaina tele mea nei o asiasiga, aemaise lava le Komiti o Tupe, ina ia faamaonia galuega sa faaaogaina ai tupe a le Malo, o le tulaga tonu lava lea e taua ai ia te au le tulaga lea. Ma e tatau foi la ona o lea e tulai mai i le Tala o le Tupe lea tatou

te talanoaina nei le tulaga lea ua sue atu se tupe e faatino ai le asiasiga ua pa le paketi a le Matagaluega. O lea la e avatu le fautuag alau Afioga, se i silasila ane i le tulaga lea ona e tatau ona i ai se tupe e faaagaaga mo asiasiga nei, aemaise le Komiti lea o Tupe pe a uma ona faatalanoina le Tala o le Tupe, ina ia mautinoa e aumai se faamatalaga e sao ma atoatoa. Aua e le gata ina faalogo ma vaai atu, ae ou te talitonu e sili lava ona tagotago i ai ma lotelote, e pei ona saunoa se sui usufono mamalu ananei ina ia faamaonia le tulaga o aseta ma tulaga faapena. A o le tuualalo la, se i manatua lau Susuga i le Faialutusi o le Fono, e tatau pea ona tuu se tupe e faaagaaga mo asiasiga a le Komiti o le Tupe, aemaise foi o nisi Komiti Faapalemene, e taua a latou asiasiga ina ia faamaonia lipoti ia e faataunuuina. Ae ona ua laaloa se faamatalaga, ae sa muamua ona ou fia faatulou atu i le paia o le Maota, i le afio o lau Afioga i le Fofoga Fetalai, faapea foi le Afioga i le Palemia ma le Sui Palemia ma le paia ma le mamalu o le Aiga Kapeneta, lau Afioga i le Taitai o le Itu Agai ma le Sui Taitai, Afioga i Minisita Lagolago tainane foi le mamalu o sui usufono o le Palemene.

Ou te fia faatalofa atu foi i le tapuaiga a Samoa mai mauga tetele seia paia mauga iti, o le paia lava lea i Tama ma o latou Aiga, Aiga ma Tama, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ou te fia faatalofa atu foi i Lana Afioga Mamalu O Le Ao o le Malo ma lau masiofo, faapea foi le afio o lau Afioga i le Sui o le Fono a Sui Tofia faapea ma le masiofo.

Lau Afioga i le Faamasino Sili ma le aiga Faamasino, faapea foi i Ofisa Sili o Pulega o Maagaluega ma Faalapotopotoga ua mafai ona tatou faatasi i lenei po.

Ou te fia faatalofa atu foi i lou Itumalo fou lea o le Nofoa Tutaulaga i le Itu Sasae po o le Urban East, sei maua se taimi ona ou toe faamatala ma faamanatu atu le tulaga o le suiga ua i ai ona ua maea ona pasia e le Palemene le Nofoa o le Au Palota Tutoatasi ua liliu ma ii le Nofoa Tutaulaga o Sasae ma Sisifo. Ou te faatalofa atu foi i Susuga i Faafeagaiga Taulagi i nuu ma afioaga ma fata faitaulaga e fia, o lo o nonomanu aua se manuia o Samoa.

Lau Afioga i le Fofoga Fetalai, e i ai ma le isi Matagaluega lea o Falepuipui ona o lea e i ai le fautuaga a la matou Komiti, peitai o lea e faitau atu i le Lipoti e le o i ai se faamatalaga. O lo o i ai se vaegatupe faapea e totonu ai se vaega o le fanua i Lalomanu. O le asiasiga a la matou Komiti na matauina ai e le o lelei le nofoaga o lo o nonofo ai alii mamalu o le Malo o lo o vaaia le Falepuipui i Olomanu ona e le o saogalemu aemaise o se ofisa fou o le Komesina fou i Tafaigata, o lo o manaomia se seleni e faatupe ai lea galuega. O le tuualalo pe le mafai ona fetuunai le tupe ua faaagaga mo le totogiina o se vaega o le fanua ae ave sei fesoasoani ai i galuega o lo o manaomia le fia faaleleia i se taimi vave lava. O le talosaga lena ua tuuina atu e auala atu i lau Afioga i le Minisia mo Falepuipui aemaise foi o le Minisita o le Ofisa o le Mao Fono.

Ona ou oo mai ai lea i le manaoga o lou Itumalo fou, ua uma ona saunoa le sui usufono mo Vaimauga Sisifo, ou te faamalulu atu foi i sui usufono mo le Vaimauga Sisifo ma Vaimauga Sasae ona o le fuafuaga lea ua i ai le Nofoa o nuu taulaga e aafia ai uma nuu o Vaimauga Sisifo ma Vaimauga Sasae ona pau le eseese o le mamalu o le atunuu o lo o alaala ma papa aao i fanua umia saoloto, e mafai ona agavaa i le Itumalo fou lea. A faapea lava o lo o alaala ma papa aao i fanua faaleaganuu e le mafai lava ona outou resitala i le

Itumalo fou lea. Ua na o nai manaoga e pei ona ou taua e pei ona saunoa le sui usufono mo Vaimauga Sisifo i le auala e agai atu – e amata atu i le Minisita mo Galuega, Felauaiga ma Atinae Eseeese, le auala lea e amata atu i Tanugamanono seia oo i Tiavi ua ou faalogo ua tapena foi le Malo mo le faaleleia o lea auala. O le taua o lenei auala ona o lo o nofo ai le High Komisi o Niu Sila, High Komisi o Ausetalia, Amapasa o Amerika, Amapasa o Saina, pei o le tulaga lena. O le auala lenei e fai lava sina va iti, a e malaga atu i luga ae fetai ma se pasi e ausulusulu solo le mamalu o le atunuu o lo o savavali i le autu aua e vaiti tele le auala ma ono tulai mai ai se faalavelave pea le vave tapena. Ona pau foi lea o le auala tu taulaga e ese le galugalua, o le uiga e le lamolemole, a e malaga i luga e te faalogo atu lava e pao lau taavale tusa lava pe fou ae faafetai ua i ai le fuafuaga a le Malo mo lea auala i se taimi vave.

Lau Afioga i le Minisita mo Galuega, Felauai ma Atinae Eseeese, o le agai i luga i Malololelei o lo o i ai se Aoga a le Ekalesia Katoliko o le Divine Mercy masalo po o le lua nei o tausaga talu ona faatua lea aoga a ua manaomia le faatua o le auala ona o faiga masani lava a le Malo a i ai se aoga e tataua lava ona faata le auala aemaise o le suavai taumafa. O lo o pagatia foi lea vaega o le atunuu i le suavai taumafa aemaise o le auala pea oo ina tetele timuga e matua faaletonu ai lava aemaise o lea ua faaoga e nai alo ma fanau o lo o aoga ai i le Divine Mercy. Sa saunoa foi le sui usufono mo Vaimauga Sisifo e uiga i le Vaisigano River, ua toe tatalo atu ai foi i lau Afioga, ou te talitonu ua i ai fuafuaga e tapena ai le river band lea ona a tetele le timuga ma papa ai vai ma overflow i luga ma aafia ai ma nai aiga o lo o alaala i Vaisigano. O lau lena foi tatalo ona ua tele tafega e aafia ai lava lea vaega o le atunuu pea pa le vai pea oo ina tetele timuga ma lologa.

Ona ou oo atu lea i lo matou – e ui e le i amataina le Nofoa fou ae ona ua maea pasia le Tulafono ma ua liliu au le Nofoa o le Au Palota Taitoatasi i Nofoa Tutaulaga, e avatu ai lau faafetai i taimi o matou mafuta e ui ua vaelua le isi vaega o le matou au palota a o e o lo o tumau pea i lenei itu, faafetai i lo outou lagolagoina o lou nei tagata faatauvaa e fai ma o outou sui usufono. Masalo o le 3 nei o Paeiga a ua 15 tausaga o aumai pea lo outou faatuatuga ia te au. O le tatalo ina ia toe tuuina mai la outou faatuatuga ma le talitonuga ina ia toe faaauau ai le auunaga mo le tatou Itumalo, ao i ai se pati ua sala po o se gagana ua le tau taamaalii i la outou faafofoga mai, ia malu ave i fale i so outou finagalo faatamaalii, e moni lava e poto le tautai ae le lava ia o lona vaa.

O se faamatalaga lea lau Afioga e avatu ai foi se sao i le tatou Tulafono Tau Faaofi o le Faatatauina o Tupe 2015/2016, tau ina ia agalelei le Atua i lau Afioga ma ia faafualeva lou soifua maloloina aemaise ia faatumu le utu aua le feagai ai ma galuega fita o lo o feagai ma lau Afioga aua le faatautaiga o galuega Palemene. O se faamatalaga lea e tuuina atu ma lou faaaloalo lava. Faafetai.

FOFOGA FETALAI: Malo. Ua faamauiina le agaga faafetai ona o lea ua tapau tia o le tautiaga aua le faalelegafulu i tuleiga ma saunoaga i lenei afiafi ma ua taualuga mea uma i le saunoaga a lau Afioga i le Taitaifono o le Komiti o Tupe Maua ma Tupe Totogi. Ia faia ia lou leo e fai ma fofoga tau momoli o lenei Palemene out e manatu e le mama le galuega sa feagai ai ma lau Afioga i le Taitaifono, Sui Taitaifono ma sui usufono uma o le Komiti o Tupe Maua ma Tupe Totogi. Sa matauina sa outou galulue i le ao ma le poi

la outou galuega faifai pea aemaise o sailiiliga mautu ma la outou galuega faatino ua manatu ua atoa ai lenei afiafi i saunoaga ma tuleiga. Lau Susuga i le Taitaifono o le Komiti o Tupe Maua ma Tupe Totogi, malo le fai o le faiva, malo le tauatai ma galulue, o lea lava ua tini tauao la outou galuega. Ua o se faiva lava o sasaa ai le Palemene ma ua tatou manatu ma le agaga faafetai ua maua ai fautuaga, timaiga ma saunoaga, o le a ave i le Malo aua le faaauauina o lenei galuega.

Ona ou manatu lea, o se laolao lelei lenei o le a lafo atu i lau Afioga i le Palemia e amatamea ina ia faaauau loa ma faasolo Tali a le Malo e pei o tu ma masani. Tulai mai lau Afioga i le Palemia.

Susuga Hon TUILAEP A FATIALOFA AUELUA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetala, o tulaga masani pea talanoaina le Tulafono Tau Faaofi o le Faatatauina o Tupe 2015/2016, na o sina au upu puupuu ona amata faasolo tali atu lea i mataupu sa laga e amata mai i le Minisita mo Leoleo ma Falepuipei ma faasolo mai ai i le Minisita mo Galuega, Fealuaiga ma Atinae Eese, a totoe ai ni toega e lei talia, ona ou taumafai atu lea i ai e toe tali atu ao le tele lava o mea ua maea.

Ae out e le i nofo i lalo, e tatau ona ou tulai atu ma le agaga faaaloalo e molimoli atu le agaga o le faafetai ma le faamalo i lau Afioga i le Taitai o le Itu Agai ma le Sui Taitai ma lenei Itu o le Maota o lo o agaia lenei Itu o lo o tu ai le Malo. Ou te faafetai ona ua fai sina loaloa o faa-aa gagase i le talanoaina o le Tulafono Tau Faaofi o le Faatatauina o Tupe 2015/2016, o le a faagaioi ai le tatou Malo e amata mai i le masina o Iulai o lumanai nei po o le masina fou seia oo atu foi i le masina o Iuni o le tausaga fou. O le agaga fiafia ia te au ona o le faagasologa o a tatou felafolafoaiga ma fefaasoiga e le o suia ai lava aga masani o le tatou Maota nei, o le faatino lea i le faatalitalie, sua faatamaalii, o uiga ia ou te manatu e ese ai lo tatou Palemene, e faatupulaia ai le agaga o le fealofani ma le vatapuia. O a foi ni lafoga e mao atu i lea taimi e talia lava i luga o le agaga lea o le faatalitalie ua tatou masani ai, ae le mafai ona aveesea ai tu ma aga faaaloalo. Ina nei faapea mai i le taimi matou te tutulai atu ai pei e foliga ua matou tali aa i nisi o finagalo faaalua, aua nei manatu matou te le o amanaia le loloto o fautuaga o lo o tuuina ma ii lenei foi Vaega. O le tulaga matou te le faaalua ia te outou le taua, ao lea o lo o teu loto ia i matou ma faaogaina ia matou foi faiga filifiliga. O upu e ave ia Faleata, “E tetele lava i pesega ae matua i le oo”. O le faafetai lea i le faaaliga o taofi, out e manatu ua oo lava i ooooga i le tele o mataupu sa aumai ai la outou tofa mamao ma atagia ai foi le tele o le sailiiliga sa fai.

Iate au la, ou te iloa e puupuu lava nai vaega ou te taofi e tatau ona ou talanoa atu ai. Ou te toe fia pai lava i le Tulafono Tau Faaofi o le Faatatauina o le Tupe 2015/2016 i tulaga masani o le tapenaga o le Tala o le Tupe Autu lenei e amata ia Aperila, ona a alu le mea e igoa o le Budget Corp e faamanatu atu a ii Matagaluega a latou fuafuaga mo le tausaga fou ona aumai ai lea o a latou Tala o le Tupe, e le gata o tupe fuafua e faaalu ma tupe fuafua e maua, ona alu loa lea o le faatalanoaga i le va o latou ma le Matagaluega o Tupe. O i ina e tele ina ooti ese le vaega tele ma faatino ai i ina le Tulafono lea “fua le manao i tupe e fuafua e maua.” O i ina la e amata mai ai le gaioiga lea o le tulafono auro lea o le tapenaga o nei mea o Tala o Tupe. A

maea ona avatu lea i le Kapeneta. O le lua ai lena o faatalanoaga lenei, ae togi mai i inei i le Komiti o Tupe a le Palemene. A i ai la ni mea foi nei e fesasiai, e faasao atu lava i le vaega lea. O le ala lena e taua tele ai le tatou Komiti o le Palemene, aemaise o lea o lo o i le Komiti o le Palemene le avanoa e valaau uma ai lava Faalapotopotoga ma Matagaluega a o lea foi e i totonu o le Komiti o Tupe sui usufono uma o Vaega tetele nei e lua, sui usufono o le Malo faapea foi ma lena Itu e latou te vailiilia le Tala Autu atoa o le Tupe.

Masalo pe ova i le piliona talosaga manao e aumai e Matagaluega, ae oti oti lava e le Matagaluega o le Tupe ona aumai lea i lalo, ina ia i ai le mea foi lele o le prioritise. O lona uiga ia faatulaga le mea e ave i ai le faataua e mafai ona faatino nei, a o nisi mea taatia. E fai foi le talanoaga o le Tala o le Tupe i le tausaga fou ona toe aumai ai lea. O le uiga la o upu ia sa avatu, o le tulafono auro e faafoe ai tapenaga o le tupe, i le Tala Autu atoa lava lea e i totonu i i, na o le pau lava lea o atinae e mafai ona faatino. O nisi manaoga sa manao i ai Matagaluega ina ia tali atu ai, o le ala lea na ala ai ona valaau Ofisa Sili o Pulega ma Pule Sili o Matagaluega ma Faalapotopotoga a le Malo e omai. Na amata mai le faiga faavae lea a le Malo i le tausaga e 1984, na amata ai ona valaau Ofisa Sili o Pulega ma Pule Sili e omai e faalogologo. Afai o a ni mataupu e laga mai e le Itu Agai, e vave ona aumai le tali sao ina ia faamalamalama aua ne i i ai se mea e faafenumiai. O lea foi la e malamalama latou pe a oo ina tapena a latou lipoti mo mea e tataua ona tuu i totonu. Ona avatu loa lea i Matagaluega, le Matagaluega lea i so o se Malo, o latou lea ua i ai tagata ua lava tapena, latou te tilotilo i tupe maua ma fua loa lea i ai otupe alu. A o tupe maua, e tolu auala e sau ai, o a tatou lava alagatupe masani ma fesoasoani e foai mai isi Malo, ia, ma tatou nogatupe e fuafua i tuutuuga po o aiaiga mama. O lea foi la o lo o avatu i totonu o le Tala o le Tupe le lisi uma lava o tatou nogatupe o la e faagasolo e le i maea. O lona uiga, o le tele o mea ia faapea ua ova ai le Tala o le Tupe, o la e ua i ai tupe mai nogatupe ia aua foi o le tele o tatou atinae ia e fai, e tolu, fa tausaga o faatino. E pei o se faataitaiga o le falemai, e le i faia i se tausaga e tasi, a o le nogatupe lea e mama le tului, e tasi lava le taimi na fai ai, ona amata loa lea ona faagasolo. O lea la e pei e foliga mai ua manatu sese ai nisi, ai o ni nogatupe fou lea e fai. E leai o lea lava e faaauau, faaauau. E i ai le vaega e faaaoga i le 2013, i ai le vaega e faaaoga i le 2014, e i ai le vaega e faaaoga i le 2015, i ai le vaega e faaaoga i le 2016. O le tulaga la lena i le uiga tonu o le upu lea na avatu, e fua le manao i tupe e mafai ona maua e le Malo e faatino ai ana gaioiga, lea e pei e tetei mai ai isi, a o le Tulafono auro lena e tapena ai le Tala o le Tupe a so o se Malo ma so o se Faalapotopotoga. E le ese Tulafono e tapena ai Tala o le Tupe a le Malo ese le Tulafono e tapena ai le Tala o le Tupe a mea nei o kamupani. Ae manatu foi la lau Afioga i le Fofoga Fetalai, e le gata ai i ina, e i ai le vaega lea e mafai onafaalu e le Malo le fuafuaina e fua i letolu pasene o le tatou Tala o le Tupe, tusa lea ma le lata i le \$20miliona lea e mafai ona faaalu e le Malo i mea e le i fuafuaina. O le teuteuga lena o le Faavae lea na pasia i tausaga ua tuanai, masalo po o le ono nei tausaga talu ai, na aumai ai le teuteuga i totonu. Sa tasi le pasene muamua ona toe tuu loa lea i le tolu pasene ina ia aua ne i taofia le Malo i sevaegatupe moomia a o lea e le i pasia i totonu o le Tala o le Tupe. O lea la na i ai le faatagaga lena e mafai ai ona faaaoga e le Kapeneta le malosi lena e tusa ma le tolu pasene o le Tala o le Tupe lea ua faataga mai e le Faavae.

O le vaega lua, a alu alu foi... ia manatua mea nei o Tala o Tupe, e le o ni mea moni. O lona uiga o le isi igoa, o mea e fuafua. O lona uiga o mea e fuafua ae le o ni mea moni. E faatoa moni lava ina ua maua tonu le tupe. Na o le toatasi lava le tagata na te iloa le mea e tupu taeao, na o le Atua, a o tatou la, o lea e fuafua i le 12 masina agai i le lumanai. Ma e leai lava se tagata soifua i le lalolagi lenei, o le mea lenei na fai atu ail au upu i le aso muamua, e leai lava se tagata na soifua ma ii le lalolagi lenei e mafai ona ia valoia mea tutupu i le 12 masina o lumanai ai. E le o ni upu aveane ai la upu ia na ou aveatua i le aso muamua, sue mai se Malo e paleni ni a latou paketi, e leai se Malo i le lalolagi e mafai ona latou faia le mea lenei. Aisea? Single fact. E leai se tagata soifua n ate iloa le mea e tupu taeao ma talaatu taeao aemaise o le 12 masina lea tatou te talanoa ai. O le mafuaaga lenei o lea e fai ai tatou Supplementary Budget, mea o Tala Faaopoopo. Aua foi o le taimi lenei e mafai ai loa ona toe review atoa ai ma toe sailiili po o sao fuafuaga ia na fai, toe maua ai lea o le fetuunaiga i ina, toe maua ai ua sili pe maua ane ua toe pau i lalo ona toe maua ai lea o le isi fetuunaiga. Ae le o taofia foi i ina le monitoring function. O lona uiga, o le vaavaai i aso uma aso uma lava o Matagaluega e lua, o le Tupe ma le Okika. A vaai mai loa le Tupe ua le lava aemaise o le fesootai mai, mo sina faataitaiga; o le tupe ua fia faaalu, ona fesootai atu lea o le tatou Clerk, le Faauluuluga o le tatou Palemene i le Matagaluega o Tupe ae fai mai le Matagaluega o Tupe ua uma le tou tupe lea na faaagaaga, taofi le asiasiga lenei e aua ne i alu. Ia ona tuu lava lea o le asiasiga e le alu. O lona uiga, e le o taofia ai le galuega lea e siaki i aso uma aso uma a Matagaluega e lua o le Tupe ma le Okika, aua e uma ona siaki i i ona ave lea siaki mai luga i le Okika.

O le mea la lenei lau Afioga i le Fofoga Fetalai, e leai lava se mea e popole vale a ii mea ia sa ou talanoa atu ai.

O le tulaga o atinae lau Afioga i le Fofoga Fetalai, o le mafaufau taiala o Malo uma o le lalolagi, e taumafai ina ia faaleleia vaega uma o le atunuu. O i ina tonu lea e faavae ai le manatu taiala lea a le HRPP, o le mea e lelei i Apia e lelei foi i nuu i tua. O le manatu taiala e le fitoitonu na o le HRPP, o le manatu taiala lenei i Malo uma lava o le lalolagi, ona o le mafuaaga lenei, e maua i le taulaga mea uma, services, ona laga mai loa lea o tagata i letaulaga feomia ai ma tele ai le mau solitulafono e fai. O le mea la e fai ina ia taofia le mea lea o le taumafai o le Pulega e ave i tua atinae e taofi ai tagata o le atunuu i nuu i tua aua le lolofi ma ii le taulaga. O le tulaga lenei na ala ai ona uunaia faletalimalo e ave i tua, lea ua tele ai atinae o faletalimalo ua salalau i tua. O le manatu foi lenei e tasi lea ua faavae ai le fausia o kolisi, ina ia aooga ai fanau ma nonofo i tua ma atinae nuu i tua, aua le omai i totonu o le taulaga ma faamimisa ai ma ai marijuana ai, aua o uiga masani na o lea e tutupu i le tatou olaga i le taimi lenei. Ave i tua ma isi services, falemai, o le fuimu. Ia, ma atinae aai ne ii tua e pei o Salelologa, Aleipata. Ia atinae aai nei ia mafai ai ona taofiofi le aufaipisinisi i tua aua ne i lolofi mai i le taulaga. O le luitau o mea uma nei, ia toso le vai, toso atu ma le eletise. O le mafuaaga lenei e tuai ai ona faatino isi taumafaiga faapea, ona o le tuai atu o le eletise po o le tuai atu foi o le vai ona o mafuaaga ia sa tatou talanoa atu ai, e oo foi i le vai, e tau eli le manava o le elele. O ni nuu foi e maua ai le vai, o la e foi e tele faafitauli e faafeagai ma lenei nuu ma le Malo. Lau Afioga i le Fofoga Fetalai, o mea na e fai e le Malo.

Na ala ona ou taua le itu lea, ona sa faaataata a lafoga le tagofia o le mataupu lea lea na faapea atu ai i le atinae atoatoa o le aai fou i Salelologa, e manaomia ni pisinisi se tele e faatu ai i ina ina ia taofia ai tagata i Savaii ona soona lolofi mai ae ia nonofo ai pea ma atinae Savaii. O le isi atu tausaga o lumanai, o le mea moni lava, e tele atu le atinae e maua i Savaii nai lo Upolu, ona o le tulaga maoae o le laueleele, e tele le eleele i Savaii, e faigofie ona tele ai atinae mo le lumanai. O lona uiga, o le Savaii lava e mamao lana vaai, e le tau sau fua i inei i Upolu ae nofo ai pea i Savaii e atiae Savaii, ma o le mafuaaga foi lona na ala ai ona vave tele ona agai le Malo e atinae le pokalate. Na pau lava le mea faafitauli i le pokalate, ua alu alu le tipiga o laau ua televave tele ona toe taaifala loa lea ma toe o ese atu i fafo. O fuafuaga mamao foi a le Malo sa fuafua mo le uafu i Asau, e tele lava le faaletonu i ina, sa tui le ava. O le ava e le o se natural harbor, ia manatua foi o le ava e fanau ma ii le natura o mea ona o le vaitafe, o le afa lona e loloto, a o le ava lea na fai i Asau, na tui le papa ua sosolo i luga o le aau. Sa aumai la e le Malo i le taimi lona Saienisi mai Holani, ia manatua o Holani o le atunuu lea e tautaua i mea o pa tetele e taofi ai le sami. Na maua i lalo le isi saienisi nofonofo ai i lalo ma fai le test o le papa sosolo. O lona tala, e leai se fanaia e mafai ona tui le malo o le papa lona e i le alavaa. O lona na mafua ai ona le mafai e le Malo i lona taimi a Tupua Tamasese Lealofi le IV ona toe fai se galuega tele i Asau. A o le mea moni, ua toe fai le alavaa ona o le mea uma lea na tanu ai le malae vaalele lea na sau i totonu o le ava, ua toe foi uma lava i totonu o le ava ina ua tupu le afa lea o Ofa, lea sa i ai le malae vaalele i ina i tai, ua sau lava le sami toe taenai uma lava le maa ma le eleele atoa, o la e ua i totonu o le ava i le taimi lenei. O lona uiga la, o le atinae o le uafu lona e i Asau, e moomia le toe faaloloto o le ava ina ia mafai ona faaoga e vaafagota.

O le masina o Oketopa nei lea e faamaea ai le faatalanoaga ma Bumble Bee, faatatau mo le fale ia lona lua, lea ua i ai nei le isi fale ia. O le agaga atoa lava, ia taumafai e uunai ese mea nei mai totonu o le taulaga e aveese atu ma latou. Ae i ai faafitauli e feagai ma i latou, o tagata nei e omai, o tagata faipisinisi, o lona uiga, e vaai foi latou i auala e tele ai le latou tupe maua ae laititi le tupe faaalu. Ma o tulaga faigata na o lea e faafeagai ma le Malo, ae le o moe le Malo, o lea lava e vaavaai pei foi ona taoto ai le tatou Tulafono lea mo le taumafai e faatosina mai le aufaipisinisi. O le mataupu moni lava lona o lea o loo taumafai i ai le Malo, e vaavaai atili i pisinisi e mafai ona uunai mo Savaii, onao le lumanai o Samoa e i Savaii, e le o i Upolu, ona o letele o le laueleele o Savaii.

Lau Afioga i le Fofoga Fetalai, ia, o nai mataupu na sa ou manatu ou te talanoa i ai, ae toe momoli atu le faamalo. O le a foi sa outou maitau i le matou tali atu, e tasi lava le agaga, ia mafai ona matou maua mai le agaga tonu o le manatu o lo o i ina, ina ia mafai ai ona matou tali atu, a o lea foi e tele mea lelei ia tou te aumaia matou te faaogaina mo le faaleleia atili o le tatou Malo. A o le a faagasolo loa le tatou galuega, ona amata mai ai lea mai o le Afioga ia Sala, toe faaiu mai ia te au. Ia manuia le tatou Fono.

FOFOGA FETALAI: Malo faafetai i lau Afioga i le Palemia, ma e manatu o le a le toe faasilia se leo, ua e saunoa e tali atu i finagalo o sui usufono mamalu sa laga i a latou lauga.

Afioga Hon SALA FATA LISATI PINATI: E momoli atu le agaga faafetai i lau Afioga i le Fofoga Fetalai e faapea foi le paia o le Maota o sasao nei i lau Afioga i le Palemia, Sui Palemia ma le Kapeneta. E faapea foi lena Itu o le malu i lau Afioga i le Taitai o le Itu Agai faapea foi sui usufono mamalu o le Palemene, tainane Ofisa Sili o Pulega ma Pule Sili o Matagaluega ma Faalapotopotoga ua faapea ona tatou molimauina lenei po e tusa ai ma le Fonotaga a Samoa. Sa faalogologo lava ma le totoa i saunoaga foi e malie eseese foi nota, ae talitonu lava pei o le autu lava o le fua o le mea e fai po o le manao i le tupe o la e i ai. Atonu o lea le vaega o lea faapea ona ou tali atu ai e tusa ai ma manaoga sa faapea ona folasia i le Maota i lenei itula afiafi ona e talitonu e tele fuafuaga o lo o faataotooto e Matagaluega i mea tau Leoleo, Falepuipui faapea foi Auaunaga o Tinei Mu.

O le a ou amata mai i taavale, a o le fesili po o faapefea ona oo mai taavale i Samoa? Ia, o lena le tali, a utiuti le seleni e faapena foi ona fua i ai le malosi. E faapena foi le pou, e talitonu le faamoemoe o lo o moomia e le atunuu i lea afioaga ma lea afioaga pou nei e puipui ai le atunuu ma faapea ona faatino ai le auaunaga, ae paga lea, e utiuti le faaso, e utiuti le faaso. Out e tatalo atu ai i le paia o le Maota ma le faafofogaaga a le atunuu ia lavapapale mai ma onosai. E taua foi le keke, ae omai i isi fai mai o le pai ea, ae fai mai foi Vao, “Maimau e, o mea uma na, e faatino uma lava mea na tou te mananao i ai pe ana maua.”

Le paia e o le Maota, e ala ona ou taua mea ia, ona e leai se mea e le mafai ona faatino, o taavale, o pou, o le anoanoai o mea o lo o fia faaleleia, ae utiuti le faaso. O le academy lea e taua, o le miti lea, ma o le miti e taunuu le miti lea. O i o le a maua mai ai ni alo aotauina popoto aua le tautuaina o le atunuu, ae le gata i lea, a o le a faapena foi ona auina atu i fafo i galuega e maua mai ai tupe ma seleni o lo o manaomia e tausi ai aiga, o tupe maua a le Malo, a o le faamaoni foi la e fai ai, aua a le faamaoni alo ma fanau i le aoga lea, e le mafai ona taunuu le miti lea pei ona i ai.

Lau Afioga i le Fofoga Fetalai, ou te manatu ua maea ai i i se tali e tusa ai foi ma le fanoga ma manaoga o le Maota, ae ou te faafetai atu foi i lou itumalo mo le tapuaiga. Faafetai lava i lau Afioga i le Fofoga Fetalai ma le mamalu o le Fono.

FOFOGA FETALAI: Malo faafetai. Ia, ou te manatu leaga o lea ua tatou tulalata i le tatou taimi malolo, ou te manatu e le o se galuega faigofie pe a faapea e tuu atu le avanoa i le Afioga i le Minisita mo Galuega, Felauaiga ma Atinae Eeseese. Ae manaia le amatamea a taeao e lelei lena e soofau ai le saunoaga ma le folasaga, ae avatu le avanoa lenei e tapena lelei ai lau Afioga i le Minisita mo Galuega, Felauaiga ma Atinae Eeseese, Kamupani Vaa ma isi tulaga uma, ona tatou amatamea ai lea mo le aso a taeao. Ou te manatu ua tataua ona fai se tatou malologa, ua api foi le uli. Ua faapea foi ona vela le fala ma ua sau foi le sau o le vaveao, ona lagona lea, ua tataua ona fai se malologa.

A o le i faia se tatou malologa, e momoli atu le faafetai tele i le paia ma le mamalu maua o le tatou Maota i lenei itula afiafi, ou te lagona u atele le tatou galuega ua ausia i lenei aso. E pei lava ona ou fai atu i le taimi ua sola, viia le Atua ona o lo outou malosi faafouina ua mafai ai pea ona faaauauina le tatou galuega i lenei itula o le po.

E faafetai atu foi i le tapuaiga a Samoa. E manatu le atunuu, o le taimi e lelei ai la outou malolo a o lo o faapena ona galulue pea lou Palemene i lenei aso.

E talitonu o lo o tui mai pea le mulipapaga ma outou tapuaia o matou faiva, ia viia le Atua i Lona alofa ma Lona agalelei. E momoli atu foi le faafetai i ona tulaga uma, le pule mamalu a alii ma faipule, o tupu ma ee, failauga, faletua ma taus, saoa ma tamaitai, malo le galulue i lenei aso.

E faamauina foi le faafetai i Ofisa Sili o Pulega ma Pule Sili o Matagaluega ma Faalapotopotoga a le Malo, malo faafetai, o lea lava e maitau atu ma le totoa, tou te le o taumamao lava i lenei aso aua le tapuaiga ma le alofaiva a lou Palemene.

Ia, Tuisa, leaga o lau Susuga o le Tiakono o le tatou fono tatalo, e avatu le avanoa lenei e te saunoa ai se tatou sauniga lotu puupuu ona faaiu ai lea o le tatou Fonotaga.

Na tolopo Taulumaga a le Fono Aoao i le itula e 10:56 i le po seia aulia le Aso Lulu, 24 Iuni 2015 i le itula e 9:00 i le taeao.